

Kyaamz Matthe

Ceu Kheuz Yesuhz

(Lukas 3:23-38)

1 An ni naeh craangz ceu kheuz Yesuhz
Khris an cur truz thaz khunz Dawit
boh Abraham.

² Abraham naeh paz Isaac,
Isaac naeh paz Yakop, Yakop naeh paz
Yudah keuh kuanz mai,
³ Yudah naeh paz Peres boh Serah, mah
keuh naeh Tamar,
Peres naeh paz Hesron,
Hesron naeh paz Ram,
⁴ Ram naeh paz Amminadap,
Amminadap naeh paz Nahson,
Nahson naeh paz Salmon,
⁵ Salmon naeh paz Boas, mah keuh naeh
Rahap,
Boas naeh paz Obet, mah keuh naeh
Rut, Obet naeh paz Yesse,
⁶ Yesse naeh paz khunz Dawit.

Khunz Dawit naeh paz Solomon, mah
keuh naeh yah trimz Uriah,
⁷ Solomon naeh paz Rehoboam,
Rehoboam naeh paz Abiyah,
Abiyah naeh paz Asa,
⁸ Asa naeh paz Yehosaphat,
Yehosaphat naeh paz Yehoram,
Yehoram naeh paz Ussiah,
⁹ Ussiah naeh paz Yotham,
Yotham naeh paz Ahas,
Ahas naeh paz Heseekiah,
¹⁰ Heseekiah naeh paz Manasseh,
Manasseh naeh paz Amon,

¹¹ Amon naeh paz Yosiah,
Yosiah naeh paz Yekhoniah keuh kuanz
mai, maen meuz talz nyawpz lan
prij Babilon.

¹² Waaiz lan prih Babilon ne
Yekhoniah naeh paz Shealtiel,
Shealtiel naeh paz Serupbabel,

¹³ Serupbabel naeh paz Abiut,
Abiut naeh paz Eliakim,
Eliakim naeh paz Asor,

¹⁴ Asor naeh paz Sadok,
Sadok naeh paz Akhim,
Akhim naeh paz Eliut,

¹⁵ Eliut naeh paz Eleasar,
Eleasar naeh paz Matthan,
Matthan naeh paz Yakop,

¹⁶ Yakop naeh paz Yosep, an naeh tahz
Mari an keut Yesuhz, an ihz raak
Khris.

¹⁷ Abraham taw phraez khunz Dawit naeh
seu kawlz ponz siupz, khunz Dawit taw
phraez kraao ihz nyawpz lan keuh prih
Babilon naeh seu kawlz ponz siupz, waaiz
lan prih Babilon taw phraez Khris naeh
seu kawlz ponz siupz.

Lawng Yesuhz Khris keut

(Lukas 2:1-7)

¹⁸ An Yesuhz Khris keut samz, Yosep a wa
maanyz Mari an ngaz naeh mah Yesuhz,
meuz maat yaetz kawmz ne Mari keun
¹⁹ meur tawiz Khuanz Seu Ngamz. Yosep
naeh ihz rak, nam sunz aez Mari sre luh

²⁰ rae kyaam praasz thengz pras pras. Meuz hnhz kyaam boh ne teu maan kaang raaoz Phraz Cen Cen plaesz toz lao tuhز yaetz reu muh daz, “Yosep, kheuz khunz Dawit aez, yak doz daehz bawnz leh Mari aez naeh yah mih. Kuanz ngaak tuhز klungz hnhz ne keun meur tawiz Khuanz Seu Ngamz ²¹ eu. Hnhz ngaz keut kuanz keur meh, mih bawnz peuk mus Hnhz Yesuhz, kawp daz Hnhz ngaz khyawt ihz Daehz thaz reung dengz kawi keuh.”

²² An ni aez keunyz mony reu ma Phraz Cen ²³ Cen tawiz ihz taangz Daehz daz, “Yawt raez, trawsz teuk rac ne ngaz keun meur maang kuanz keur meh, ihz keui raak hnhz Emmanuel,” an loz daz, “Phraz Pen Caoh naeh kawmz ehz.”

²⁴ Meuz Yosep dangz ne cih tawiz mony reu ma teu maan kaang raaoz Phraz Cen Cen ²⁵ lao rae hnhz leh Mari cih yah daehz. Keuiz daz taw maat maang kuanz ne nam yaetz kawmz. Yosep kaw peuk mus kuanz keur meh an diz daz, Yesuhz.

Ihz maang pinya thaz prih reu lae

2 Meuz co khunz Herot ne Yesuhz keut tuhز weng Betlehem, prih Yio, ihz maang pinya teur ka thaz prih reu lae keui truz phraeoz a weng Yerusalem rae ² maanyz, “Kuanz ngaak an ngaz penz khunz Yio ne keut a naez? Eh z a wa awlz seuk muny Hnhz lae thaz reu lae rae eh z ngaz truz waiz Hnhz.”

³ Meuz khunz Herot ngar z lawng an diz ne kawcz phawmz baaiz, ihz weng Yerusalem kaw kawcz phawmz tawiz hnhz hac z aamz.

⁴ Hnhz raak teur cuhz beunz caangz keui, boh ihz mawz kyaamz keui, maanyz keuh nahz, “Khris ngaz keut a naez?”

⁵ Keuh daz, “Ngaz keut tuhz weng Betlehem, tuhز prih Yio, an ihz taangz ⁶ phraz daz, ‘Oz weng Betlehem, tuhز prih Yio, weng an diz nam anz weng keulz keulz an upz peung prih Yio, keuiz daz ihz upz peung ne ngaz keut tuhz weng an diz, Hnhz ngaz cih ihz peur aacz kheuz Israel.’”

⁷ Meuz phangz an diz khunz Herot rah dawmz raak leh ihz maang pinya keui rae maanyz kraao seuk muny seun teungz ⁸ paw. Hnhz lao keuh, “Lan dawmz kuanz ngaak rak rak tuhз weng Betlehem raez, meuz pehz awlz ne lao tang ohz, aez ohz bawnz lan waiz tang daehz.”

⁹ Ihz maang pinya keui kaw teuk ngar z an khunz seumz rae lae lan ne awlz mial seuk muny thaz reu lae an daehz awlz. Seuk muny an diz aacz lan keuh deukz lang kol ¹⁰ ti kuanz ngaak naeh. Meuz keuh awlz mial ¹¹ seuk muny an diz ne keuh seuz baaiz. Keuh kut tuhз kaang, meuz keuh awlz kuanz ngaak boh mah keuh Mari ne seuk deumz kingz sangz waiz Hnhz. Keuh lawk kraep phan ta daehz rae lu kuanz ngaak nahz ¹² khamz, naam sa boh mar hawm. Yak aez keuh weng cu mial khunz Herot ne keuh awlz pyatik tuhз reu muh rae keuh weng prih daehz tawiz reung dengz thaengz seu senz boh.

Tiunz lan prih Ekip

¹³ Waaiz ihz maang pinya keui lae lan ne teu maan kaang raaoz Phraz Cen Cen lao Yosep tuhз reu muh daz, “Rawi, leh kuanz ngaak boh mah hnhz kraai lan prih Ekip raez! Thonz taw ohz lao weng truz mial ne moh a diz raez. Kawp daz khunz Herot khahz sawkz piamz Hnhz.”

¹⁴ Meuz borz an diz Yosep rawi leh kuanz
¹⁵ ngaak boh mah keuh lan prih Ekip. Keuh
 moh a diz thonz taw khunz Herot yam. An
 ni aez mony reu ma Phraz Cen Cen keunyz
 tawiz ihz taangz Daehz daz, “Ohz raak
 Kuanz Ohz thaz prih Ekip.”

Piamz kuanz ihz kyehz

¹⁶ Meuz khunz Herot mas ihz maang pinya
 keui kaoz daehz ne sunz ca baaiz. Hnhz
 cao siukz daehz piamz kuanz keur meh
 aarz khopz cur thaz wa, tuhz weng
 Betlehem boh tawiz rim weng, tawiz mony
 reu ma ihz maang pinya keui lao hnhz
 kraao seuk muny paw.
¹⁷ An diz aez keunyz mony reu ma ihz
¹⁸ taangz phraz Yeremiah daz, “Reus yaam
 lengz lengz boh reus kraang baaiz keui
 ngarz a weng Ramah, Rachel yaam tawiz
 kuanz daehz yam ne nam phre phawmz.”

Weng truz mial thaz prih Ekip

¹⁹ Waaiz khunz Herot yam ne teu maan
 kaang raaoz Phraz Cen Cen lao tuhz reu
²⁰ muh Yosep, tuhz prih Ekip daz, “Rawi raez,
 leh kuanz ihz boh mah keuh weng prih
 Israel raez, kawp daz ihz kyaam piamz
²¹ Hnhz keui a wa yam.” Yosep kaw leh kuanz
 ihz boh mah keuh weng cu prih Israel.
²² Keuz daz meuz hnhz ngarz reu oiz
 Archelaus penz khunz ti paz daehz khunz
 Herot ne nam yaak weng a diz. Samz
 bawnz mony reu ma tuhz reu muh rae lan
²³ prih Kalile, keuh lan moh a weng Nasaret.
 An diz aez keunyz mony reu ma ihz taangz
 phraz daz, “Hnhz ngaz bawnz raak ihz
 Nasaret hawkz.”

Traz Yohn tahz teuk sruz

(Markus 1:1-8, Lukas
 3:1-18, Yohn 1:19-28)

3 Meuz diz Yohn tahz teuk sruz truz
² rawz tuhz ruk prih Yio. Hnhz daz,
 “Caanz reung dengz kawi raez, kraao prih
³ kaang raaoz a wa thatz tae.” Yohn naeh
 ihz an ihz taangz phraz Isaiah lao mok
 daz, “Reus ihz hawkz an raak tuhz ruk daz,
 ‘Meu rae reung dengz Phraz Cen Cen, aez
 reung dengz keu sangz ta Hnhz nuar.’”
⁴ Tahz Yohn kap kreung an leh hukz me
 rang maang soz cih. Hnhz leh seum mat
 hurz mat peur ngeun daehz. Suamz caarz
⁵ boh ngaam ceun ngur ruk. Ihz weng
 Yerusalem, ihz prih Yio boh ihz moh waar
 omz Yordan hacz aamz keui truz cu Hnhz.
⁶ Keuh lao plaez reung dengz kawi daehz rae
 keuh leh teuk sruz a hnhz tuhz omz rawng
 Yordan.
⁷ Hnhz awlz Pharise boh Saduse keui truz
 cu daehz ngaz leh teuk sruz ne daz keuh
 nahz, “Pehz naeh kheuz heunyz raai! Yaeh
 aez seu tih aez pehz tiunz lawt thaz phez
 taam Phraz Pen Caoh an ngaz phraeoz?
⁸ Cih aez daehz kiungz an caanz reung
⁹ dengz kawi raez. Yak daz daehz naeh
 kheuz Abraham. Ohz daz pehz nahz, Phraz
 Pen Caoh leh kawnz reu aangz keu ni
¹⁰ cih bawnz kheuz Abraham. Tam mok tam
 maetz a rias Khaehz ne teungz an nam
 plaehz plaehz an rak keui ngaz teunyz sapz
¹¹ tuhz ngal. Ohz aez pehz nahz teuk sruz
 omz ta caanz reung dengz kawi, keuz daz
 maang thaengz Hawkz, an mawh myaat
 lak ohz ne truz thaz puatz ohz. Ohz nam
 theukz tawnz tang cawng khlapz Hnhz.
 Hnhz ngaz aez pehz nahz teuk sruz tuhz

¹² Khuanz Seu Ngamz boh tuhz ngal. Kaai tihz Hnhz tawnz mok seum pat, Hnhz ngaz pat tuhz paangz tiz ngohz, cakz kuhz keui sapz tuhz taen, cakz hiapz keui tucz sapz tuhz ngal an nam ngat seu pawk.”

Yesuhz leh teuk sruz

(Markus 1:9-11, Lukas 3:21-22)

¹³ Meuz diz Yesuhz moh prih Kalile truz cu Yohn tawz omz Yordan ne ngaz leh teuk

¹⁴ sruz. Keuz daz Yohn kan Hnhz daz, “Toz ohz taan leh teuk sruz a Mih nam anz haz da, caang daz truz cu ohz?”

¹⁵ Keuz daz Yesuhz tawpz daz, “Seu ni aez naeh ceun diz raez, kawp daz aiaz lo cih reung dengz keu sangz klawhz meoz keui aez keunyz.” Yohn kaw prawm.

¹⁶ Yesuhz leh teuk sruz, meuz Hnhz lae truz thaz omz ne kaang raaaz peun lawk, Hnhz awlz Khuanz Phraz Pen Caoh cur

¹⁷ truz deukz a Hnhz naeh ceun ploiz. Reus rawhz truz thaz kaang raaaz daz, “Hnhz an ni naeh Kuanz Ohz, an Ohz yaw, an Ohz trohz phawmz.”

Yesuhz talz an kyaam ya

(Markus 1:12-13, Lukas 4:1-13)

4 Waaiz an diz Khuanz Phraz aacz lan Yesuhz tuhz ruk aez Manaas kyaam

² ya Hnhz. Waaiz Hnhz kaerz seum suamz ponz kawlz seu ngihz ponz kawlz borz ne

³ Hnhz coh. Tahz an kyaam ya ne truz lao Hnhz daz, “Beuk Mih naeh Kuanz Phraz Pen Caoh kaw, lao kawnz reu aangz keu ni aez penz kaaiz mun raez.”

⁴ Yesuhz kaw tawpz daz, “Taemz mok tuhz kyaamz lik daz, ‘Ihz ehz leh taw seum

suamz damz phawmz nam anz, leh mony reu ma an truz thaz mony Phraz ne damz.’”

⁵ Manaas kaw leh Hnhz lan a weng seu ngamz rae mok Hnhz kaai cakz cakz wat

⁶ ne daz Hnhz nahz, “Beuk Mih naeh Kuanz Phraz Pen Caoh kaw plawiz teuk klaez toz Mih raez. Taemz mok tuhz kyaamz lik daz, ‘Phraz Pen Caoh ngaz cao teu maan kaang raaaz Daehz keui yawt Mih, keuh ngaz pumz leh Mih, yak aez cawng Mih teu reu aangz.’”

⁷ Yesuhz kaw tawpz daz, “Tuhz kyaamz lik daz thaengz, ‘Yak kyaam ya Phraz Cen

⁸ Cen Phraz Pen Caoh daehz.’” Manaas kaw leh Hnhz raw thaengz rang trawng baaiz, plaeh Hnhz nahz prih keu tehz hacz aamz

⁹ an diz keui. Manaas daz, “Beuk Mih seuk deumz waiz ohz kaw ohz ngaz aez Mih nahz an keu ni hacz aamz.”

¹⁰ Yesuhz lao hnhz, “Tiunz yaan yaan raez Satan! Taemz mok tuhz kyaamz lik daz,

¹¹ ‘Seuk deumz waiz Phraz Cen Cen Phraz Pen Caoh daehz, waiz Hnhz pan.’” Manaas kaw praasz Hnhz, teu maan kaang raaaz keui truz lum la Hnhz.

Yesuhz seun teungz rawz

(Markus 1:14-15, Lukas 4:14-15)

¹² Meuz Yesuhz ngarz Yohn klaez khawk ne

¹³ Hnhz truz cu mial prih Kalile, praasz weng Nasaret, lan moh tuhz weng Kapernaum, weng an diz naeh waar nawngz Kalile, naeh tuhz eungz Sebulun boh eungz

¹⁴ Naptali, aez keunyz mony reu ma ihz

¹⁵ taangz phraz Isaiahs daz, “Tawiz eungz Sebulun boh eungz Naptali, tawiz waar nawngz, thaz tui omz Yordan, tuhz prih

Kalile tawz ti ihz an nam anz kheuz Yio keui
¹⁶ moh, ihz moh tuhz an bimz keui a wa awlz
 an thaangz aasz baaiz rae an thaangz ne a
 wa thaangz kaai ihz moh tuhz eupz reung
 dengz yam keui.”

¹⁷ Tae leh kaanz diz Yesuhz seun teungz
 rawz daz, “Teur aacz daehz caanz reung
 dengz kawi raez, kraao prih kaang raaoz a
 wa thatz tae.”

Seun teungz penz teu paez Yesuhz

(Markus 1:16-20, Lukas 5:1-11)

¹⁸ Meuz Yesuhz nuar boh waar nawngz
 Kalile ne awlz Simon, an ihz raak Petros
 boh seum boh hnhz Andre. Kaar yeung
 rup boh kahz tuhz nawngz kawp daz
¹⁹ kaar naeh tahz kahz. Yesuhz lao kaar,
 “Lan tawiz Ohz raez, Ohz ngaz cih paarz
²⁰ naeh tahz kahz khahz ihz.” Kaar kaw mok
 thengz luat rup daehz kaw lan tawiz Hnhz.

²¹ Moh a diz lan thaengz samz awlz kuanz
 mai keu aarz Yakop kaar Yohn an naeh
 kuanz Sebede. Kaar naeh teur kawmz tang
 paz daehz yeung meu rae boh rup daehz
²² tuhz ceun luang. Yesuhz raak kaar, kaar
 kaw mok thengz luat paz daehz boh ceun
 luang daehz rae lan tawiz Hnhz.

Yesuhz seuk neum ihz penz

(Lukas 6:17-19)

²³ Yesuhz lan tawiz prih Kalile, sawnz aez
 ihz nahz tawiz crawp, rawz reu oiz rak
 lawng prih Phraz boh cih aez ihz penz
²⁴ klawhz meoz keui moh rak. Reu oiz Hnhz
 kaw sirz lan tuhz prih Siria rae ihz keui leh
 truz ihz penz klawhz meoz, ihz suhz ihz rit,

ihz phiz kut, ihz penz ngaanz, ihz yam seu
 plaakz keui cu Hnhz rae Hnhz cih aez keuh
²⁵ moh rak. Wungz ihz tuhz prih Kalile, ihz
 prih Dekapolis, ihz weng Yerusalem, ihz
 prih Yio boh ihz thaz tui omz Yordan keui
 lan tawiz Hnhz.

Bawnz an rak

(Lukas 6:20-23)

5 Meuz Yesuhz awlz wungz ihz ne, Hnhz
 raw lang rang keu dez a diz. Teu
² paez Hnhz kaw truz cu Hnhz. Hnhz seun
³ teungz sawnz aez ihz daz, “Ihz peuk daelz
 phawmz daehz keui bawnz an rak, kawp
⁴ daz prih kaang raaoz naeh prih keuh. Ihz
 phawmz kyehz keui bawnz an rak, kawp
⁵ daz keuh ngaz sa phawmz. Ihz phawmz
 keu ceum keui bawnz an rak, kawp daz
⁶ keuh ngaz bawnz caam prih keu teh. Ihz
 coh nguat reung dengz keu sangz keui
 bawnz an rak, kawp daz keuh ngaz phre
⁷ phawmz. Ihz mawz teur yawng keui bawnz
 an rak, kawp daz keuh ngaz bawnz khaam
⁸ reung dengz teur yawng. Ihz phawmz keun
 ra keui bawnz an rak kawp daz keuh ngaz
⁹ awlz Phraz Pen Caoh. Ihz cih aez ihz teur
 maen daehz keui bawnz an rak, kawp daz
 ihz ngaz raak keuh naeh kuanz Phraz Pen
¹⁰ Caoh. Ihz talz ihz pae suamz daehz kawp
 reung dengz keu sangz keui bawnz an rak,
 kawp daz prih kaang raaoz naeh prih keuh.
¹¹ Meuz ihz plawng pehz, pae suamz pehz,
 boh daz khatz pehz an nam anz thanz paw
¹² keunyz kawp Ohz ne bawnz an rak. Seuz
 phawmz lah. Kawp daz a keoz pehz mawh
 baaiz lang kaang raaoz, ihz taangz phraz
 an truz aacz pehz kaw a wa talz ceun diz.”

Suakz boh an thaangz*(Markus 9:50, Lukas 14:34-35)*

¹³ “Pehz naeh suakz prih keu tehz. Keuiz daz beuk nam taap leui kaw ngaz cih seu naez aez hnhz taap mial? An ni nam kut naehz leui, wiurz thengz thaz nawk rae aez ihz paenz thengz pan.

¹⁴ Pehz naeh an thaangz prih keu tehz.

Weng an naeh lang rang ne nam caang

¹⁵ seun tapz. Beuk a wa kleoz ngal ngawiz kaw yaeh nam leh piat dupz. Mok kaai khrengz ngal rae cih aez ihz kaang keui

¹⁶ awlz. Naeh ceun khuz an diz aez a kyaangz rak pehz thaangz aacz ngaai ihz aez ihz keui awlz rae lupz phrawz Paz pehz an naeh lang kaang raaoz.”

Sawnz aez lawng sinz traz

¹⁷ “Yak thaang Ohz truz ya thengz kyaamz sinz Moses boh kyaamz ihz taangz phraz keui hacz aamz. Ohz nam truz ya, Ohz truz

¹⁸ cih aez kyaamz keu diz keunyz. Ohz daz mawn pehz nahz, thonz taw kaang raaoz boh keu tehz bilz lan ne mah lik seu toz seu cakz an kyehz lak ihz tuh sinz traz

¹⁹ maat keunyz ne nam bilz keuiz. Ihz nam cih tawiz sinz an kyehz rae sawnz aez ihz nam aez cih tawiz sinz ne ngaz naeh ihz kyehz lang prih kaang raaoz, keuiz

daz ihz cih tawiz sinz an diz rae sawnz aez ihz nahz ne penz an mawh lang prih kaang raaoz. Ohz lao pehz nahz, beuk pehz nam kyaangz leuz ihz mawz kyaamz boh Pharise kaw ngaz nam bawnz kut tuh prih kaang raaoz.”

Lawng piamz ihz

²¹ “Pehz a wa ngarz sinz ihz meuz neungz daz, ‘Yak piamz ihz. Beuk piamz kaw ngaz

²² talz taam.’ Keuiz daz Ohz lao pehz nahz, ihz ca kuanz mai daehz nahz keuiz kaw bawnz talz taam. Ihz an daz kuanz mai daehz nahz, ‘Mih naeh ihz thengz maat,’

ne ihz an diz taan bawnz raw rumz, ihz an daz kuanz mai daehz nahz, ‘Mih naeh ihz kleuhz klahz,’ kaw ihz an diz taan talz

²³ taam ngal tuh ngal raai. Kawp ceun diz meuz daehz ngaz taangz kreung lu tawz khrengz pukz caw ne beuk mih tang an mih cih pleung mok kaai kuanz mai daehz kaw,

²⁴ mok thengz kreung lu daehz aacz ngaai khrengz pukz caw rae cih aacz aez daehz teur maen. Beuk a wa caang kai truz pukz caw raez.

²⁵ Meuz mih yeung naeh kawmz ihz cih a muz sapz mih tawiz reung dengz lan rumz ne cih raamz rip aez maen hnhz. Beuk nam cih ceun diz hnhz ngaz leh mih aapz a ihz

mawh tatz traz, ihz mawh tatz traz samz aapz tuhz tihz siukz pao khawk rae mih

²⁶ ngaz talz klaez khawk. Ohz daz mawn pehz nahz, ka ni maat phre hacz ne pehz nam caang lae thaz khawk.”

Kamesuhz

²⁷ “Pehz a wa ngarz sinz ihz meuz neungz

²⁸ daz, ‘Yak kawi kamesuhz.’ Keuiz daz Ohz daz pehz nahz, ihz yawt keun nyah tawiz lomz teu na ne tuh phawmz hnhz a wa pleung kamesuhz tawiz keun nyah an diz.

²⁹ Beuk ngaai takz kaai mih cih aez mih

pleung kaw klawkz thengz. Nam maang ngaai seu plaakz ne rak lak luh sumz tang
³⁰toz tuhz ngal raai. Beuk tihz takz kaaiz mih cih aez mih pleung kaw tatz thengz. Nam maang tihz seu plaakz ne rak lak luh sumz tang toz tuhz ngal raai.”

Lawng tahz yah teur thengz

(*Matthe 19:9, Markus 10:11-12, Lukas 16:18*)

³¹ “Kyaamz sinz daz thaengz, ‘Ihz sunz thengz yah ne taemz aez hnhz nahz lik
³²thengz.’ Keuiz daz Ohz lao pehz nahz, neuz lak keun nyah yaetz keulz ihz rae ihz an thengz yah daehz ne cih pleung kamesuhz kaai yah daehz. Ihz leh yah raat kaw cih pleung kamesuhz.”

Teung kaa

³³ “Samz thaengz, pehz a wa ngarz sinz an lao mok ihz meuz neungz keui daz, ‘Yak cih teuk luh an daehz teung kaa, lo pao mony reu ma an daehz teung tawz Phraz
³⁴Cen Cen.’ Keuiz daz Ohz lao pehz nahz, yak teung laz laz. Yak teung kaang raa, kawp daz kaang raa naeh plaang Phraz
³⁵Pen Caoh. Yak teung keu tehz, kawp daz keu tehz naeh ti tam cawng Phraz Pen Caoh. Yak teung weng Yerusalem, kawp daz weng an diz naeh weng Khunz an bunz
³⁶mawh. Yak teung kingz daehz, kawp daz hukz kingz pehz seu senz keuiz kaw pehz
³⁷nam caang cih aez traz aez lang. Pehz lo lao anz kaw anz, nam kaw nam. Neuz lak

mony reu ma keu diz naeh an truz thaz khunz an nam rak.”

Yak tawpz tihz ihz

(*Lukas 6:29-30*)

³⁸ “Pehz a wa ngarz sinz daz, ‘Ngaai taw
³⁹ngaai, raangz taw raangz.’ Keuiz daz Ohz lao pehz nahz, yak tawpz mial ihz cih pleung daehz. Beuk maang ihz paapz mawp pehz plaakz takz kaaiz kaw aez hnhz paapz thaengz plaakz takz dahz raez.
⁴⁰Beuk ihz mawr leh seu kaeng mah pehz kaw aez thaengz tang cung cui daehz raez.
⁴¹Beuk ihz peun pae pehz lan reung dengz seu lakz kaw lan tawiz hnhz aarz lakz lah.
⁴²Aez tawz ihz maanyz pehz raez, aez ihz rawm an maanyz rawm tawz pehz raez.”

Rak raan su

(*Lukas 6:27-28,32-36*)

⁴³ “Pehz a wa ngarz sinz traz daz, ‘Rak boh
⁴⁴daehz, ceuh raan su daehz.’ Keuiz daz Ohz lao pehz, rak raan su daehz raez, suz tawngz aez ihz an pae suamz daehz raez,
⁴⁵beuk cih ceun diz pehz ngaz penz kuanz Paz pehz an naeh lang kaang raa. Kawp daz Hnhz cih aez seu ngihz ne thang kaai ihz raai boh ihz rak, cih aez cung klaez kaai
⁴⁶ihz cih an rak boh ihz cih an raai. Beuk pehz rak ihz an rak daehz pan kaw bawnz a keoz naehz tawz Phraz Pen Caoh? Ihz seutz khawn keuiz kaw yeung cih boh teur
⁴⁷diz nam anz haz? Beuk pehz tak kuanz mai daehz pan kaw pehz maat cih rak leuz ihz.

⁴⁸ Ihz nam yum Phraz Pen Caoh keuz kaw yeung cih boh teur diz nam anz haz? Kawp ceun diz pehz lo keunyz rak ceun Paz pehz lang kaang raaoz keunyz rak.”

Lawng aez ihz phaanz

6 “Seu tih yak cih aez ihz awlz daehz naeh ihz phraz traz. Beuk pehz cih ceun diz, pehz ngaz nam bawnz a keoz tawz Paz pehz an naeh lang kaang raaoz.
² Kawp ceun diz meuz pehz aez ihz peur teuk keui nahz ne yak tiz mawng ceun ihz seuk cih daehz naeh ihz rak keui cih tuhز crawl boh tawiz reung dengz, aez ihz thanz paw lupz daehz. Ohz daz mawn pehz nahz keuh a wa bawnz a keoz daehz seu
³ keuh trohz bawnz. Kawp ceun diz meuz pehz aez ihz peur teuk keui nahz ne tihz takz kaaiz mih cih ne yak aez tihz takz
⁴ dahz mih mas, kawp ceun diz an pehz aez ne aez naeh an seun tapz. Waaiz an diz Paz pehz an awlz an seun tapz hacz aamz ne ngaz aez pehz nahz a keoz.”

Mony suz tawngz

(Lukas 11:2-4)

⁵ “Meuz pehz suz tawngz ne yak cih ceun ihz seuk cih daehz naeh ihz rak, kawp keuh song ceng suz tawngz tawiz tuhز crawl boh tawiz seu dukz reung dengz, aez ihz keui awlz heungz. Ohz daz mawn pehz nahz keuh a wa bawnz a keoz an
⁶ keuh trohz bawnz. Keuz daz meuz pehz suz tawngz ne kut tuhز lukz daehz, dapz keur wah rae maanyz tawz Paz pehz an leh ngaai yawt nam awlz. Waaiz an diz Paz

pehz an awlz an seun tapz hacz aamz ne ngaz aez pehz nahz a keoz.

⁷ Samz thaengz meuz pehz suz tawngz ne yak upz samz samz mony reu ma daehz ceun ihz nam yum phraz. Kawp daz keuh thaang an suz tawngz hanz hanz ne Phraz
⁸ Pen Caoh teuk ngarz. Yak cih ceun keuh, kawp daz Paz pehz mas an pehz lo thaz
⁹ meuz maat maanyz tawz Hnhz. Kawp ceun diz suz tawngz daz ceun ni raez,

‘Paz ehz an naeh lang kaang raaoz, aez mus Mih naeh ti ro se se kamz.
¹⁰ Aez prih Mih tae se kamz, ceun reung dawhz Mih keunyz lang prih kaang raaoz ne aez keunyz tuhز prih keu tehز se kamz.
¹¹ Aez ehz nahz seum suamz kumz ta seu ngihz meu ni se kamz.
¹² Ceun ehz plawiz lawt reung dengz kawi ihz cih pleung ehz ne plawiz lawt aez ehz se kamz.
¹³ Yak aez ehz lan tawiz reung dengz kyaam ya, khyawt leh ehz thaz an nam rak se kamz.
 Aez a na, taanz khoz boh bunz keui aez naeh an Mih cen cen se kamz. Amen.’

¹⁴ Beuk pehz plawiz lawt reung dengz kawi ihz kaw Paz pehz kaang raaoz kaw ngaz
¹⁵ plawiz lawt pehz eunz. Beuk pehz nam plawiz lawt reung dengz kawi ihz kaw Paz pehz ngaz nam plawiz lawt pehz eunz.”

Kaerz seum suamz

¹⁶ “Meuz pehz kaerz seum suamz ne yak cih ngaai kyehez ceun ihz seuk cih daehz naeh

ihz rak. Keuh cih aez ihz mas daehz kaerz seum suamz rae cih ngaai kyezh. Ohz daz mawn pehz nahz, keuh a wa bawnz a keoz¹⁷ seu keuh taan bawnz. Keuiz daz meuz pehz kaerz seum suamz ne thukz nam man a¹⁸ kingz rae khez ngaai daehz raez, beuk cih ceun diz ihz nam mas an daehz kaerz seum suamz, keuiz daz Paz pehz leh ngaai yawt nam awlz ne mas boh. Paz pehz an awlz an seun tapz hacz aamz ne ngaz aez pehz nahz a keoz.”

Phan ta lang kaang raaoz

(Lukas 12:33-34)

¹⁹ “Yak rawmz ta daehz nahz phan ta tuhز prih keu tehz an ni, an ruk raak boh mah phrihz keui caang ya, an peun rah keui²⁰ caang klawkz caang rah. Keuiz daz rawmz ta daehz nahz phan ta lang kaang raaoz tui raez, ti an ruk raak boh mah phrihz keui nam caang ya, ti an peun rah keui nam²¹ caang klawkz nam caang rah. Kawp daz phan ta daehz naeh a naez kaw pehz takz phawmz a diz.”

Ngaai naeh ceun ngal ngawiz toz

(Lukas 11:34-36)

²² “Ngaai pehz naeh ngal ngawiz toz pehz. Beuk ngaai pehz rak kaw thaangz tang toz.²³ Beuk ngaai mih nam rak kaw bimz tang toz. Beuk an thaangz tuhز mih ne bimz kaw an bimz an diz naeh bimz lang aez teuk.”

Tahz keu aarz

(Lukas 16:13, 12:22-31)

²⁴ “Yaeh kaw nam cih bawnz peur cao tahz keu aarz. Hnhz ngaz ceuh hawkz, rak hawkz, nam anz kaw ngaz nap suamz hawkz, nam saangz suamz hawkz. Pehz nam cih bawnz peur cao Phraz Pen Caoh boh paekz.”

Yak kawcz phawmz

²⁵ “Kawp ceun diz Ohz lao pehz nahz, yak khiz ta phawmz daehz, ngaz suamz naehz, ngaz tiangz naehz? Yak khiz ta toz daehz ngaz kap naehz? Phawmz myaat lak seum suamz, toz myaat lak kreung nam anz haz?²⁶ Yawt simz ploiz keui, keuh nam plihz nam buiz, nam woc, nam sapz mok tuhز taen, keuiz daz Paz pehz kaang raaoz damz keuh. Pehz myaat lak keuh nam anz haz?²⁷ Reung dengz khiz ne caang cih aez a saak hanz thaengz seu keun teungz haz?²⁸ Cih naehz khiz phawmz ta kreung kap a? Wonz yawt teungz ruk keui cih seu naez daakz truz. Keuh nam cih kaanz nam peusz²⁹ nam kez. Keuiz daz Ohz lao pehz nahz, kreung khunz Solomon bunz mawh ne aatz³⁰ nam taan daakz ruk keu diz. Phraz Pen Caoh yeung kap aez teungz ruk keui nahz kreung imz tuhز ruk meu ni bawnz sapz tuhز ngal kap siz ne kaai pehz baaiz aez bawnz kap leuz lak ruk keu diz nam anz haz, euz ihz reung dengz yum lany keui?

³¹ Kawp ceun diz yak khiz phawmz daz, 'Ngaz suamz lan naehz? Ngaz tiangz lan
³²naehz? Ngaz kap lan naehz?' Ihz nam yum Phraz keui khahz an keu diz hacz aamz. Paz pehz kaang raaaz mas an pehz lo hacz
³³aamz. Khahz aacz prih Phraz Pen Caoh boh reung deng keu sangz raez, waaiz an diz
³⁴Hnhz ngaz aez an pehz lo hacz aamz. Kawp ceun diz yak kawcz phawmz ta kap siz. Kawp daz kap siz an diz kawcz phawmz ta hnhz. An peur teuk meu ni kaw kumz ta seu ngihz meu ni."

Yak nae ihz

(Lukas 6:37-38,41-42)

7 "Yak nae ihz, beuk cih ceun diz Phraz
²Pen Caoh kaw nam nae pehz. Kawp daz seu pehz nae ihz ne pehz kaw talz seu diz, pehz tuang aez ihz nahz seu naeh kaw
³pehz ngaz bawnz seu diz. Nam awlz hikz khaehz tuhز ngaai daehz samz awlz mun
⁴tuhz ngaai kuanz mai daehz seu naez? Mih lao kuanz mai daehz nahz ceun nae, 'Aez

ohz leh thengz mun tuhز ngaai mih naz,' samz nam yawt hikz khaehz tuhز ngaai
⁵daehz cih naehz? Ihz seuk cih aez, leh thengz aacz hikz khaehz tuhز ngaai daehz raez, waaiz an diz mih caang awlz caem caem mun tuhز ngaai kuanz mai daehz eu.
⁶Yak aez sohز keui nahz an seu ngamz. Yak seum patz aez lek keui nahz saengz plaez. Beuk mih cih ceun diz keuh leh cawng paenz teuk nac rae truz kak pehz."

Maanyz, khahz, khrazk

(Lukas 11:9-13)

⁷ "Maanyz raez, ngaz bawnz. Khahz raez, ngaz awlz. Khrazk keur wah raez, ngaz
⁸lawk aez boh pehz nahz. Ihz maanyz keui bawnz, ihz khahz keui awlz, ihz khrazk
⁹keur wah kaw ngaz lawk aez boh. Tuhz pehz ne maang yaeh, beuk kuanz hnhz maanyz kaaiz mun samz leh aez reu
¹⁰aangz? Beuk maanyz kahz ne anz maang
¹¹paz an leh aez heunyz? Pehz naeh ihz nam rak kaw mas boh leh aez kuanz daehz nahz

an rak, Paz pehz an naeh lang kaang raaoz tui baaiz aez ihz maanyz Hnhz keui nahz an rak.

¹² Pehz sunz aez ihz cih daehz ceun nae kaw cih kaai ihz ceun diz. An ni naeh ti wa kyaamz sinz Moses boh kyaamz ihz taangz phraz keui hacz aamz.”

Keur wah seuk ngiak boh keur wah waas

(Lukas 13:24)

¹³ “Kut tuhز keur wah seuk ngiak raez. Kawp daz keur wah lan ti luh ne waas, reung dengz kaw yoh, ihz kut tuhز keur ¹⁴wah an diz kaw heungz. Keur wah kut tuhز an phawmz imz ne seuk ngiak, reung dengz kaw kreuk. Ihz awlz rae kut ne lany.”

Teungz boh plaehz

(Lukas 6:43-44)

¹⁵ “Seu tih ihz taangz phraz plawmz keui raez, keuh truz cu pehz raang naeh ceun soz, keuz daz tuhز nao keuh naeh ceun ¹⁶sohz prawk raai. Yawt leh plaehz keuh kaw mas teungz. Cing seur keutz nam plaehz plaehz seu pit. Teungz seur keutz nam ¹⁷plaehz plaehz laangz wah. Teungz rak kaw plaehz rak, teungz nam rak kaw plaehz ¹⁸nam rak. Teungz rak nam caang plaehz plaehz an nam rak, teungz nam rak kaw ¹⁹nam caang plaehz plaehz an rak. Teungz an plaehz nam rak keui ngaz teunyz sapz ²⁰tuhz ngal. Kawp ceun diz yawt leh plaehz keuh kaw mas keuh.”

Ohz nam ti mas pehz

(Lukas 13:25-27)

²¹ “Ihz an raak Ohz, ‘Tahz, Tahz,’ keui ngaz nam bawnz kut tuhز prih kaang raaoz klawhz ihz, keuz daz ihz cih tawiz reung dawhz Paz Ohz an naeh lang kaang raaoz ²²pan bawnz kut a. Kaai seu ngihz an diz ihz heungz baaiz ngaz truz lao Ohz daz, ‘Tahz, Tahz, ehz leh mus Mih a wa rawz, a wa wah thengz phiz, a wa plaesz an laak laaiz.’ ²³Meuz ceun diz Ohz ngaz lao keuh nahz keu sangz, ‘Ohz nam ti mas pehz, ihz cih meukz keui, tiunz yaan yaan Ohz raez.’”

Ihz cih kaang keu aarz

(Lukas 6:47-49)

²⁴ “Kawp ceun diz ihz ngarz mony reu ma Ohz rae cih tawiz ne naeh ceun ihz maang ²⁵pinya cih kaang tam kaai reu aangz. Cung klaez, omz lus, kurz pat kaang an diz kaw kawp daz tam kaai reu aangz rae nam yaatz. ²⁶Ihz ngarz mony reu ma Ohz rae nam cih tawiz ne naeh ceun ihz kleuhz klahz cih ²⁷kaang tam kaai macz. Cung klaez, omz lus, kurz pat kaang an diz ne yaatz. An yaatz an diz na baaiz.”

A na Yesuhz

²⁸ Meuz Yesuhz upz teuk wa ceun diz ne wungz ihz keui teur aacz daehz sangz ²⁹baaiz an Hnhz sawnz. Kawp daz Hnhz

sawnz ne naeh ceun ihz maang a na, nam naeh ceun sra mawz kyaamz.

Yesuhz cih aez ihz tut moh rak

(Markus 1:40-45, Lukas 5:12-16)

² **8** Meuz Yesuhz cur truz thaz rang ne wungz ihz keui lan tawiz Hnhz. Maang ihz tut hawkz truz seuk deumz aacz ngaai Hnhz ne daz, “Tahz, beuk Mih sunz kaw cih aez ohz rak.”

³ Yesuhz kaw teuk pawrz tihz Daehz rae teu hnhz daz, “Ohz sunz boh, aez mih rak!” Meuz diz luat tut hnhz kaw a wa rak.

⁴ Yesuhz lao hnhz, “Yak lao yaeh nahz lawng an ni. Keuiz daz lan cu saangz longz plaiez toz mih. Pukz caw kreung lu ceun Moses seumz mok, aez naeh saak se aacz ngaai ihz.”

Reung dengz yum ihz mawh siukz

(Lukas 7:1-10)

⁵ Meuz Yesuhz kut tuhz weng Kapernaum ne maang ihz mawh siukz hawkz an upz seu peur ya ne truz maanyz aez kawr ⁶ daehz daz, “Tahz, peur cao ohz yam seu plaakz rae yaetz khin boh lang kaang ne.”

⁷ Yesuhz daz hnhz, “Ohz ngaz lan boh cih ⁸ aez hnhz moh rak.” Ihz mawh siukz an diz tawpz daz, “Tahz, ohz nam theukz Mih kut tuhz eupz kaang ehz. Maang mony reu ma seu khaw keuiz kaw peur cao ohz ngaz moh

⁹ rak. Kawp daz ohz naeh ihz tuhz keutz a na khunz. Tuhz keutz ohz kaw maang siukz heungz baaiz. Beuk ohz lao hawkz nahz, ‘Lan raez,’ daz kaw hnhz lan. Beuk ohz lao thaengz hawkz nahz, ‘Truz raez,’ daz kaw hnhz truz. Ohz cao peur cao daehz, ‘Cih an ni raez,’ daz kaw hnhz cih.”

¹⁰ Meuz Yesuhz ngarz an diz ne sangz, lao ihz tawiz puatz Daehz keui nahz, “Ohz daz mawn pehz nahz, tuhz kheuz Israel ne Ohz nam ti awlz reung dengz yum ¹¹ thanz teur ni. Ohz daz pehz nahz, ihz keui heungz baaiz ngaz truz thaz reu lae, thaz reu keutz rae keu dez suamz kaai pheunz kawmz Abraham, Isaac boh Yakop tuhz ¹² prih kaang raaoz. Keuiz daz kuanz prih kaang raaoz, an naeh kheuz Israel keui ngaz talz wah thengz an bimz thaz nawk, ti an keuh bawnz yaam boh teur kak raangz.”

¹³ Yesuhz lao ihz mawh siukz, “Lan, aez naeh ceun mih yum.”

Meuz diz luat peur cao hnhz kaw moh rak.

Yesuhz seuk neum ihz heungz

(Markus 1:29-34, Lukas 4:38-41)

¹⁴ Meuz Yesuhz kut tuhz kaang keuh Petros ne Hnhz awlz keunz keuh Petros reum ¹⁵ yaetz boh a diz. Hnhz teu tihz keun nyah an diz, reum hnhz kaw bilz. Hnhz kaw rawi cih damz Yesuhz boh.

¹⁶ Meuz teuk borz ne ihz keui leh ihz phiz kut truz cu Yesuhz. Hnhz kaw leh mony reu ma wah thengz phiz. Ihz penz keui kaw Hnhz ¹⁷ cih aez moh rak. An ni aez keunyz mony reu ma ihz taangz phraz Isaiah daz, “Hnhz leh thengz an suhz an rit ehz boh an suhz an penz ehz.”

Ihz an sunz penz teu paez Yesuhz

(Lukas 9:57-62)

¹⁸ Meuz Yesuhz awlz wungz ihz keui wit wit Daehz ne cao keuh lo lan thaz tui omz ¹⁹ nawngz. Maang sra mawz kyaamz hawkz truz lao Hnhz daz, “Tahz sra, ohz ngaz lan tawiz Mih ti Mih lan.”

²⁰ Yesuhz kaw mial daz, “Sohz keu tehz maang tuhz moh, simz ploiz keui kaw maang haanz, keuiz daz Ohz an naeh Kuanz Kingz Ihz samz nam maang ti tam kingz.”

²¹ Teu paez thaengz hawkz samz lao Hnhz daz, “Tahz, aez ohz bawnz weng saangz keo aacz paz daehz.”

²² Keuiz daz Yesuhz lao hnhz, “Lan tawiz Ohz raez, aez ihz yam keui saangz keo mial ihz daehz yam raez.”

Yesuhz peuk deukz kurz boh seuk mar omz

(Markus 4:35-41, Lukas 8:22-25)

²³ Meuz Yesuhz kut tuhz ceun luang ne teu paez Hnhz kaw lan tawiz Hnhz. Meuz diz luat penz truz cung longz kurz longz, ceun luang paw ngaz beukz tuhz keutz seuk mar omz. Keuiz daz Yesuhz samz yaetz reuk ngeut boh. Teu paez keui lan peun rawi Hnhz daz, “Tahz, khyawt ehz raez! Eh ngaz leucz omz.”

²⁶ Hnhz lao daz, “Oz, ihz reung dengz yum lany keui aez, cih naehz lah pehz doz baaiz a?” Yesuhz kaw ceng lao kurz boh seuk mar omz nahz rae deukz lan. Teu paez keui kaw sangz baaiz, teur daz daehz nahz, “Hnhz an ni naeh yaeh ez? Kurz boh seuk mar omz kaw teuk ngarz Hnhz.”

Yesuhz seuk neum ihz phiz kut keu aarz

(Markus 5:1-20, Lukas 8:26-39)

²⁸ Meuz Yesuhz phraez thaz tui omz nawngz eungz Kadara ne ihz phiz kut keu aarz truz saanyz Hnhz. Kaar kyaamz baaiz rae yaeh nam yaak lan reung dengz senz

²⁹ an diz. Kaar raak keurz daz, “Oz Kuanz Phraz Pen Caoh aez, Mih lo aaiz cih naehz? Meuz kraao maat phraez ne Mih ngaz truz aez ehz peur teuk haz?”

³⁰ A diz maang lek wungz mawh suamz
³¹ boh nam thatz nam yaan keuh. Phiz keui maanyz Yesuhz, “Beuk Mih wah ehz kaw aez ehz kut tuhz wungz lek keu diz.”

³² Yesuhz daz keuh nahz, “Lan raez.” Keuh kaw kut tuhz wungz lek, lek keui teuk basz cur tawiz phraakz rae leucz yam tuhz omz nawngz.

³³ Ihz khaenz lek keui wang lan lao ihz tuhz weng keui nahz lawng ihz phiz kut
³⁴ boh lawng an taamz naeh peun. Meuz ceun diz ihz tuhz weng keui lae truz aez daehz bawnz awlz Yesuhz. Meuz keuh awlz Yesuhz ne keuh maanyz Hnhz lae lan thaz eungz daehz.

Yesuhz seuk neum ihz yam seu plaakz

(Markus 2:1-12, Lukas 5:17-26)

² **9** Yesuhz kut tuhz ceun luang rae lo truz cu mial weng Daehz. Ihz teur ka leh ihz yam seu plaakz yaetz boh kaai saatz ne truz cu Hnhz. Meuz Yesuhz awlz reung dengz yum keuh ne daz ihz yam seu plaakz nahz, “Yak phawmz kyehz, kuanz Ohz, Ohz a wa plawiz lawt reung dengz kaw mihi.”

³ A diz maang sra mawz kyaamz teur ka keui daz tuhz phawmz daehz, “Hnhz an ni upz pleung Phraz Pen Caoh.”

⁴ Yesuhz mas keuh thaang ceun diz rae maanyz keuh nahz, “Cih naehz, tuhz phawmz pehz thaang nam rak ceun diz a?”

⁵ An nae lao yoh? ‘A wa plawiz lawt reung dengz kaw mihi,’ ne yoh haz? ‘Ceng nuar

⁶ lan raez, ' ne yoh haz? Aez pehz mas Kuanz Kingz Ihz maang a na tuhز prih keu tehز plawiz lawt bawnz reung dengz kawi," rae Hnhz lao ihz yam seu plaakz nahz, "Rawi raez, leh ti yaetz mih, weng kaang daehz."
⁷ Ihz an diz kaw rawi weng kaang daehz.
⁸ Meuz wungz ihz keui awlz an diz ne sangz, keuh lupz phrawz Phraz Pen Caoh an aez ihz nahz a na ceun diz.

Raak leh Matthe

(Markus 2:13-17, Lukas 5:27-32)

⁹ Yesuhz lae truz thaz a diz ne awlz ihz seutz khawn hawkz, mus hnhz daz Matthe, keu dez boh siungz seutz khawn rae daz hnhz nahz, "Lan tawiz Ohz raez." Matthe
¹⁰ kaw ceng lan tawiz Hnhz. Meuz Yesuhz suamz seum suamz teuk borz tuhز kaang Matthe ne ihz seutz khawn boh ihz maang reung dengz kawi keui truz suamz kawmz
¹¹ Hnhz boh teu paez Hnhz. Meuz Pharise keui awlz ne keuh maanyz teu paez Hnhz, "Cih naehz sra pehz suamz kawmz ihz seutz khawn boh ihz raai keui a?"
¹² Meuz Yesuhz ngarz ne daz, "Ihz moh rak keui nam lo tahz seu neumz, ihz penz keui
¹³ pan lo a. Tuhz kyaamz lik daz, 'Ohz song reung dengz teur yawng, nam song toz pukz caw,' an daz ne pehz lan sawnz leh raez. Ohz truz ta raak leh ihz keu sangz nam anz, keuz daz naeh ta ihz maang reung dengz kawi keui."

Maanyz lawng kaerz seum suamz

(Markus 2:18-22, Lukas 5:33-39)

¹⁴ Teu paez Yohn tahz teuk sruez keui truz maanyz Hnhz daz, "Ehz boh Pharise keui

kaerz seum suamz, cih naehz teu paez Mih keui nam kaerz a?"

¹⁵ Yesuhz kaw daz, "Meuz tahz seu naaoz yeung naeh kawmz boh khaekz daehz tuhز pawiz kopz ku ne anz keuh bawnz kawcz phawmz? Kraao leh tahz seu naaoz praasz lan keuh ne ngaz phraeoz boh, meuz diz
¹⁶ keuh ngaz kaerz seum suamz. Yaeh nam leh banz teun mehz teuk baangz kreung trimz, kawp daz banz teun mehz teuk rut
¹⁷ kreung trimz rae tuhز baaiz waas. Yaeh nam leh omz seu pit teun mehz sapz tuhز seu kiz hurz trimz. Beuk cih ceun diz, seu kiz hurz luh, omz seu pit kaw lae rae seu kiz hurz kaw luh. Omz seu pit teun mehz kaw sapz tuhز seu kiz hurz teun mehz leun, beuk ceun diz, caang mok bawnz ceu nawhz tang aarz meoz."

Kuanz keun nyah an yam boh keun nyah thawkz naamz

(Markus 5:21-43, Lukas 8:40-56)

¹⁸ Meuz Yesuhz daz boh ceun diz ne maang ihz mawh hawkz truz seuk deumz aacz ngaai Hnhz rae daz, "Kuanz keun nyah ohz taamz yam. Keuz daz truz rae leh tihz Mih taangz kaai hnhz ne aez hnhz imz mial."
¹⁹ Yesuhz kaw ceng lan tawiz hnhz, teu paez Hnhz kaw lan tawiz.
²⁰ Meuz phangz an diz, maang keun nyah hawkz naamz thawkz a wa bawnz seu kawlz aarz wit. Hnhz lan tawiz puatz Yesuhz rae teu caam caai kreung Hnhz.
²¹ Keun nyah an diz daz tuhز phawmz daehz, "Beuk ohz bawnz teu caam caai kreung Hnhz kaw an ohz penz ne ngaz bilz," daz ceun diz rae truz thaz puatz Yesuhz, teu caam caai kreung Hnhz.

²² Yesuhz waaiz yawt hnhz daz, “Yak kawcz phawmz kuanz, kawp mih yum rae a wa bilz.” Keun nyah an diz kaw moh rak luat meuz diz.

²³ Meuz Yesuhz kut tuhز kaang ihz mawh ne awlz wungz ihz keui ronyz rae putz piz

²⁴ tawiz ihz yam. Hnhz lao keuh, “Lae thaz nawk raez, kuanz keun nyah ne nam yam keuiz, yaetz reuk ngeut pan.” Keuiz daz

²⁵ keuh ngot keulz Hnhz. Meuz wungz ihz keui lae thaz nawk ne Hnhz kut tawnz tihz kuanz keun nyah, kuanz keun nyah kaw

²⁶ rawi truz. Reu oiz an diz sirz lan tuhز prih an diz.

Yesuhz seuk neum ihz ngaai bimz keu aarz

²⁷ Meuz Yesuhz lae lan thaz a diz ne maang ihz ngaai bimz keu aarz truz tawiz puatz Hnhz, kaar raak daz, “Kuanz khunz Dawit, teur yawng aaiz raez.”

²⁸ Meuz Yesuhz kut tuhز kaang ne kaar truz cu Hnhz, Hnhz kaw maanyz kaar, “Anz paarz yum Ohz cih penz bawnz?” Kaar kaw mial daz, “Yum boh, Tahz.”

²⁹ Yesuhz kaw teu ngaai kaar rae daz, “Aez naeh tawiz ceun paarz yum.” Ngaai kaar

³⁰ kaw a wa awlz. Yesuhz seumz mawn kaar nahz, “Yawt, yak aez ihz mas lawng an ni

³¹ naz.” Keuiz daz kaar lae teuk prae reu oiz an diz tuhز prih an diz.

Ihz ahz mawz reu ma

³² Meuz kaar lae lan ne ihz keui leh truz ihz ahz hawkz an phiz kut, truz cu Yesuhz.

³³ Meuz a wa wah thengz phiz ne ihz ahz an diz kaw mawz upz truz. Wungz ihz keui sangz baaiz rae daz, “Tuhz kheuz Israel ne nam ti awlz ceun ni.”

³⁴ Keuiz daz Pharise keui daz, “Hnhz ceuk naeng khunz phiz rae wah thengz phiz.”

Ihz cih kaanz lany

³⁵ Yesuhz lan tawiz weng tawiz pruh, sawnz aez ihz nahz tawiz crawp, rawz reu oiz rak lawng prih Phraz boh cih aez ihz

³⁶ penz klawhz meoz keui moh rak. Meuz Hnhz awlz wungz ihz ne Hnhz teur yawng keuh kawp daz keuh khiz phawmz rae

nam maang an kawr naeh ceun soz nam

³⁷ maang ihz damz. Hnhz lao teu paez Daehz keui nahz, “An rak seum woc leh keui heungz baaiz, keuiz daz ihz woc samz lany.

³⁸ Maanyz Tahz aez phuhz truz ihz woc leh tuhز maar.”

Yesuhz cao teu paez seu kawlz aarz

(Markus 3:13-19, Lukas 6:12-16)

10 Hnhz raak teu paez Daehz seu kawlz aarz rae aez keuh nahz a na wah thengz phiz boh cih aez ihz penz

² keunyz keui moh rak. Mus teu paez seu kawlz aarz samz, seun teungz naeh Simon

an ihz raak Petros, seum bohз hnhz Andre, Yakop, Yohn an naeh kuanz Sebede,

³ Phillip, Bartholome, Thomas, Matthe an naeh ihz seutz khawn, Yakop an naeh

⁴ kuanz Alphaeus, Thadae, Simon ihz plaakz prih omz Yio boh Yudas Iskariot an ngaz saz kokz Hnhz.

Kaanz teu paez seu kawlz aarz

(Markus 6:7-13, Lukas 9:1-6)

⁵ Yesuhz phuhz keuh seu kawlz aarz seumz daz, “Yak lan tawiz peur lah ihz an nam anz kheuz Yio, yak kut tawiz weng kheuz

⁶ Samari. Lan tawiz kheuz Israel an naeh
⁷ soz an bilz keui raez. Meuz pehz lan ne
 rawz daz, 'Kraao prih kaang raaos a wa
⁸ thatz tae.' Cih aez ihz penz keui moh rak,
 aez ihz yam keui meu rae imz, aez ihz
 tut keui rak, wah thengz phiz, ceun pehz
 bawnz maat ne aez ihz nahz maat maat.
⁹ Yak khaenz ron, khamz, tawng tuhز seum
¹⁰ mat, yak khaenz seu kiz lae reung dengz,
 kreung plut, cawng khlapz boh kawn teur
 leui keui. Kawp daz ihz cih kaanz ne theukz
 bawnz boh langz.
¹¹ Meuz kut tuhز weng tuhز pruh ne khahz
 kaang ihz an trohz thangz rae thangz
¹² kaang keuh thonz taw pehz lae mial. Meuz
 pehz kut tuhز kaang ihz ne tak keuh raez.
¹³ Kaang an diz beuk theukz kaw reung dengz
 nimz aez naeh kaai keuh, beuk nam theukz
¹⁴ kaw aez truz cu mial pehz. Beuk ihz nam
 saanyz rap pehz, nam teuk ngarz mony reu
 ma pehz kaw meuz pehz lae thaz kaang an
¹⁵ diz ne pisz thengz yangz cawng pehz. Ohz
 daz mawn pehz nahz, kaai seu ngihz tatz
 traz ne weng an diz ngaz talz na lak weng
 Sodom boh weng Komorrah.

Talz ihz pae suamz

(Markus 13:9-13, Lukas 21:12-17)

¹⁶ Ohz cao pehz lan naeh ceun soz plawiz
 peur lah sohز prawk. Kawp ceun diz lakz
 laem ceun heunyz, keu ceum ceun ploiz
¹⁷ raez. Seu tih ihz thiangz pehz. Keuh ngaz
 aapz pehz tawiz rumz keui, rotz pehz
¹⁸ tawiz cawp rawz traz keuh. Ihz ngaz laak
 lan pehz aacz ngaai khunz boh ihz mawh
 kawp Ohz, aez naeh saak se Ohz aacz
 ngaai keuh boh ihz an nam anz kheuz Yio.

¹⁹ Meuz ihz mat pehz ne yak kawcz phawmz
 ngaz daz naehz, ngaz daz ceun nae. Meuz
 diz luat Phraz Pen Caoh ngaz aez pehz
²⁰ nahz mony reu ma an trohz. Kawp daz nam
 anz pehz tahz lao leui, naeh Khuanz Paz ne
 lao tuhز pehz.

²¹ Kuanz mai teur deuiz ngaz aapz aez ihz
 piamz, kuanz paz kaw ngaz naeh ceun diz,
 kuanz keui kaw ngaz cih khatz mah paz
²² daehz rae aapz aez ihz piamz. Ihz keui
 ngaz ceuh pehz kawp pehz naeh teu paez
 Ohz, keuz daz ihz yum klakz taw dutz ne
²³ ngaz bawnz reung dengz khyawt. Meuz ihz
 pae suamz pehz seu ti ne kraai tiunz moh
 thaengz seu ti lah. Ohz daz mawn pehz
 nahz, co pehz maat sirz tawiz weng prih
 Israel ne Kuanz Kingz Ihz ngaz truz.

²⁴ Teu paez nam kyahz taan sra daehz,
 kuanz leng nam mawh taan tahz paz leng
²⁵ daehz. Teu paez naeh ceun sra daehz,
 kuanz leng naeh ceun tahz paz leng daehz
 kaw trohz. Beuk ihz raak tahz kaang naeh
 khunz phiz Beelsebul kaw kaai ihz kaang
 hnhz baaiz nam lo lao leui.

Tahz an lo doz

(Lukas 12:2-7)

²⁶ Kawp ceun diz yak doz keuh. Nam maang
 phrihz phrahz naehz an reupz bawnz, an
 seun tapz keui ngaz lawk. Nam maang ta
²⁷ ihz nam mas an unz bawnz. An Ohz lao
 tuhز an bimz ne pehz lao tuhز an thaangz
 raez, reus keu seoz an pehz ngarz kaw
²⁸ pehz sawz lang kusz kaang raez. Yak doz
 ihz piamz bawnz taw toz, an nam piamz
 bawnz khuanz. Lo doz Tahz piamz bawnz
²⁹ tang toz tang khuanz tuhز ngal raai. Simz

sriapz keu aarz ne saz paekz tawng seu pyaz nam anz haz? Beuk Paz pehz nam sunz aez naeh ne simz hawkz kaw nam ³⁰bawnz klaez tuhz keu teh. Paz pehz yawt pehz thanz paw dawgz mok hukz kingz ³¹pehz klawhz senz. Kawp ceun diz yak doz, pehz myaat lak wungz simz keu diz.

Ihz saanyz rap boh ihz nam saanyz rap

(Lukas 12:8-9)

³² Ihz daz daehz mas Ohz aacz ngaai ihz ne Ohz kaw ngaz daz Daehz mas hnhz aacz ngaai Paz Ohz an naeh lang kaang raaoz. ³³Keuiz daz ihz daz daehz nam mas Ohz aacz ngaai ihz ne Ohz kaw ngaz daz Daehz nam mas hnhz aacz ngaai Paz Ohz an naeh lang kaang raaoz.

Nam leh truz an nimz, leh truz waac

(Lukas 12:51-53, 14:26-27)

³⁴ Yak thaang Ohz leh reung dengz nimz truz cu prih keu teh. Ohz nam leh reung ³⁵dengz nimz truz, leh truz waac. Kawp daz Ohz truz cih teuk praasz kuanz keur meh aez khatz paz, kuanz keun nyah aez khatz ³⁶mah, kuanz moi aez khatz keunz. Raan su daehz kaw ngaz naeh truz ihz kaang daehz. ³⁷Ihz rak mah paz daehz leuz Ohz ne nam theukz Ohz, ihz rak kuanz daehz ³⁸leuz Ohz kaw nam theukz Ohz. Ihz nam baekz lakz klawngz klaengz tawiz Ohz kaw nam theukz Ohz. Ihz sunz aez phawmz daehz lawt ne ngaz luh sumz, ihz luh sumz phawmz kawp Ohz samz ngaz bawnz phawmz cen cen.

A keoz

(Markus 9:41)

⁴⁰ Ihz saanyz rap pehz keui naeh ihz rap Ohz, ihz saanyz rap Ohz kaw saanyz rap ⁴¹Tahz an phuhz Ohz truz. Ihz saanyz rap ihz taangz phraz kawp hnhz naeh ihz taangz phraz ne bawnz a keoz ceun ihz taangz phraz. Ihz saanyz rap ihz keu sangz kawp hnhz naeh ihz keu sangz kaw ⁴²bawnz a keoz ceun ihz keu sangz. Ohz daz mawn pehz nahz, ihz aez omz seu klakz tawz teu paez Ohz an kyehz lak ihz ne bawnz a keoz nam kaat.”

Yesuhz lao lawng Yohn tahz teuk sruz

(Lukas 7:18-35)

11 Meuz Yesuhz a wa seumz teu paez Daehz seu kawlz aarz ne lae lan sawnz aez rawz aez tawiz weng prih Kalile. ² Yohn moh tuhz thang ne ngarz lawng Khrih cih, hnhz cao teu paez daehz teur ka ³truz maanyz Yesuhz daz, “Mih naeh Tahz an te truz haz? Nam anz kaw ehz ngaz bawnz mang thaengz hawkz haz?” ⁴ Yesuhz mial daz, “Weng lao mial Yohn nahz an paarz ngarz boh an paarz awlz. ⁵Ihz ngaai bimz keui awlz, ihz cawng nam rak keui nuar, ihz tut keui rak, ihz lutz keui ngarz, ihz yam keui meu rae imz, ihz phaanz keui kaw a wa bawnz ngarz reu oiz ⁶rak. Ihz nam thaang pleung kawp Ohz ne bawnz an rak.” ⁷ Meuz teu paez Yohn keui weng lan ne Yesuhz lao plaetz wungz ihz keui nahz lawng Yohn daz, “Pehz lan yawt naehz tuhz ruk? Yawt teungz teur law kurz pat

⁸ haz? Beuk nam anz kaw lan yawt naehz? Ihz kap kreung laep haz? Ihz kap kreung
⁹ laep keui moh tawiz hawz khunz. Lan yawt naehz? Ihz taangz phraz haz? Anz, Ohz lao pehz nahz, hnhz mawh lak ihz taangz
¹⁰ phraz eu. Taemz mok lawng hnhz tuh kyaamz lik daz, 'Teuk ngarz raez, Ohz ngaz cao ihz krai reu oiz Ohz aacz ngaai Mih, hnhz ngaz meu rae reung dengz aacz ngaai
¹¹ Mih.' Ohz lao mawn pehz nahz tuhz keun nyah keut ne maat maang ihz mawh myaat lak Yohn tahz teuk srucz. Keuiz daz ihz kyehz lak ihz lang prih kaang raaocz ne
¹² mawh myaat lak hnhz boh. Tae leh seu ngihz Yohn tahz teuk srucz taw phraeocz seu ni ne prih kaang raaocz talz ihz kyaamz keui kut rae ihz tiu kut keu diz kaw rimz
¹³ leh. Kawp daz kyaamz ihz taangz phraz boh kyaamz sinz keui rawz tak phraeocz
¹⁴ co Yohn. Beuk pehz sunz saanyz rap kaw
¹⁵ hnhz an ni naeh Eliyas an ngaz truz. Ihz maang keu tiakz keui aez hnhz ngarz.
¹⁶ Ngaz leh naehz neungz ihz kaap seu ni? Keuh naeh ceun kuanz ihz keu dez tuhz teur laas keui teur raak daz daehz
¹⁷ nahz, 'Ehz putz ceu waasz kaw pehz nam kaz, ehz keun euiz kaw pehz nam lengz
¹⁸ lengz.' Kawp daz Yohn truz nam suamz nam tiangz ne keuh daz naeh ihz phiz
¹⁹ kut. Kuanz Kingz Ihz truz suamz suamz tiangz tiangz ne keuh daz, Hnhz an ni naeh ihz suamz leuz tiangz leuz, naeh tahz keu daaocz, naeh ihz cih boh ihz seutz khawn boh ihz nam taap keui. Keuiz daz pinya

Phraz Pen Caoh mas naeh an anz tawiz kaanz Daehz cih.”

Weng an nam caanz reung dengz kawi

(Lukas 10:13-15)

²⁰ Meuz ceun diz Yesuhz seun teungz nae ihz weng an Hnhz plaez mok an laak laaiz heungz keui nahz, kawp daz keuh nam
²¹ caanz reung dengz kawi daehz. “Oz, weng Korasin! Oz, weng Betsaida! An laak laaiz an plaez a pehz ne khanz seuk daz plaez kaai weng Taia boh weng Sidon ne keuh ngaz kap kreung teur haaocz rae keu dez tuhz keum rum, caanz reung dengz kawi
²² truz thaz meuz neungz. Ohz lao pehz nahz, kaai seu ngihz tatz traz ne weng an keu diz ngaz talz na lak weng Taia boh weng
²³ Sidon. Mih luz, weng Kapernaum, mih ngaz talz ihz phrawz daehz lang kaang raaocz haz? Nam keuiz, mih ngaz klaez phraeocz prih Maranahz. An laak laaiz plaez a mih ne khanz seuk daz plaez kaai weng Sodom kaw weng an diz yeung naeh phraeocz seu
²⁴ ngihz meu ni. Ohz lao pehz nahz, kaai seu ngihz tatz traz ne weng an diz ngaz talz na lak weng Sodom.”

Tahz aez an sa phawmz ta ihz khiz phawmz

(Lukas 10:21-22)

²⁵ Meuz kraao an diz Yesuhz daz, “Paz, an naeh Tahz kaang raaocz boh prih keu teh, Ohz taang kez cuz Mih kawp daz Mih

unz mok an keu ni ihz mawz ihz mas keui nahz, samz lawk plaetz kuanz ihz kyehz
²⁶keui nahz. Anz, Paz, kawp daz an ni naeh an Mih trohz phawmz.”

²⁷ Waaiz an diz Yesuhz kaw daz ihz nahz, “Paz Ohz aapz aez Ohz nahz hacz aamz. Neuz lak Hnhz yaeh nam mas Kuanz, neuz lak Kuanz boh ihz an Kuanz lawk plaetz ne yaeh nam mas Paz.

²⁸ Ihz khiz phawmz boh ihz baekz keu can keui truz cu Ohz raez. Ohz ngaz aez
²⁹pehz sa phawmz. Leh kaan Ohz baekz rae sawnz leh laai tawz Ohz raez, Ohz maang phawmz keu ceum rae khuanz pehz keui
³⁰ngaz sa phawmz. Kaan Ohz ne baekz yoh, lam Ohz kaw nyawngz.”

Tahz seu ngihz sinz

(Markus 2:23-28, Lukas 6:1-5)

12 Meuz phangz an diz Yesuhz datz lan tawiz maar ngohz kaaiz kyung kaai seu ngihz sinz. Teu paez Hnhz keui coh rae seur keut suamz seum kawr ngohz
²kaaiz kyung. Meuz Pharise keui awlz ne daz Hnhz nahz, “Yawt, teu paez Mih keui cih nam tawiz sinz traz.”
³ Hnhz mial daz, “Meuz khunz Dawit boh boh hnhz keui coh ne keuh cih naehz,
⁴pehz nam ti rawz maen haz? Hnhz kut tuhز kaang Phraz Pen Caoh rae suamz kaaiz mun an taangz aacz ngaai Phraz Pen Caoh, sangz daz tawiz sinz Moses naeh mok ne mas boh daehz boh kuanz boh daehz nam suamz bawnz, an saangz longz
⁵keui pan suamz bawnz. Pehz nam ti rawz tuhز sinz Moses haz? Sinz an nam bawnz cih kaanz kaai seu ngihz sinz tuhز wat daz kaw saangz longz keui nam cih tawiz

⁶ sinz kaw nam kawi. Ohz lao pehz nahz, a
⁷ niz maang ihz mawh myaat lak wat. Beuk pehz mas ti loz, ‘Ohz song reung dengz teur yawng, nam song toz pukz caw’ kaw pehz nam yaak nae ihz nam maang reung
⁸ dengz kawi. Kawp daz Kuanz Kingz Ihz naeh Tahz seu ngihz sinz.”

Ihz tihz wiatz seu plaakz

(Markus 3:1-6, Lukas 6:6-11)

⁹ Yesuhz lae thaz a diz rae kut tuhز crawp
¹⁰ rawz traz Yio boh. A diz maang ihz tihz wiatz seu plaakz. Pharise pao yawt aez daehz caang nae Yesuhz, maanyz, “Seuk neum kaai seu ngihz sinz ne anz tawiz traz haz?”
¹¹ Hnhz lao keuh, “Beuk pehz maang soz hawkz, klaez lu kaai seu ngihz sinz ne
¹² anz maang ihz nam leh plaetz? Ihz myaat lak soz baaiz baaiz. Kawp ceun diz cih an rak kaai seu ngihz sinz ne tawiz boh sinz
¹³ traz.” Yesuhz daz ihz an diz nahz, “Peuk caatz tihz mih raez.” Hnhz kaw peuk caatz tihz daehz rae a wa rak deuiz ceun thaz
¹⁴ seu plaakz boh. Keuiz daz Pharise keui lae lan rae teur daz daehz nahz, ngaz piamz thengz Yesuhz ceun nae.

Peur cao an Phraz Pen Caoh ras

¹⁵ Meuz Yesuhz mas lawng an diz ne lae lan thaz a diz. Ihz heungz baaiz lan tawiz
¹⁶ Hnhz, Hnhz cih aez keuh moh rak, aez seu tih yak aez ihz keui lao ihz nahz reung
¹⁷ naeh Daehz. An ni aez keunyz mony reu
¹⁸ ma ihz taangz phraz Isaiah, daz, “An ni naeh peur cao Ohz ras, an Ohz rak, an Ohz trohz phawmz, Ohz ngaz mok khuanz

Daehz kaai Hnhz rae Hnhz ngaz rawz traz an phrengz kaai kheuz ihz hacz aamz.
¹⁹ Hnhz nam rawhz, nam keurz. Nam maang ihz ngarz reus Hnhz tawiz reung dengz.
²⁰ Hnhz ngaz nam kaczk teuk peukz teungz teur law an wot, nam ku teuk ngat ngal ngawiz an teun kaz taamz tawhz thonz taw Hnhz cih aez traz an phrengz ne pae.
²¹ Kheuz ihz hacz aamz keui mang kaai mus Hnhz.”

Yesuhz boh khunz phiz Beelsebul

(Markus 3:20-30, Lukas 11:14-23)

²² Waaiz an diz ihz keui leh ihz ahz hawkz an phiz kut, ngaai hnhz kaw bimbz ne truz cu Hnhz, Hnhz kaw cih aez moh rak rae ihz ahz an diz kaw mawz upz truz rae a wa
²³ awlz. Ihz hacz aamz kaw sangz rae daz, “Hnhz an ni naeh Kuanz khunz Dawit hiuz nawz?”
²⁴ Keuiz daz meuz Pharise keui ngarz ne daz, “Hnhz ceuk naeng khunz phiz Beelsebul rae wah thengz phiz.”
²⁵ Yesuhz mas an keuh thaang ne daz keuh nahz, “Parih naehz kaw keu yaoz, beuk keuh teur kawi daehz kaw ngaz luh, weng an nae, kaang an nae kaw, beuk keuh teur kawi daehz kaw nam penz weng, nam penz
²⁶ kaang. Beuk Satan wah Satan kaw hnhz kawi mial daehz ne hnhz ngaz teuk praasz
²⁷ daehz rae prih keuh ngaz luh. Beuk Ohz ceuk naeng Beelsebul wah thengz phiz daz kaw teu paez pehz samz ceuk naeng yaeh rae wah thengz? Kawp ceun diz keuh ngaz
²⁸ naeh ihz tatz traz pehz. Keuiz daz beuk Ohz ceuk naeng Khuanz Phraz Pen Caoh

wah thengz phiz ne prih Phraz Pen Caoh a wa phraeoz a pehz keuiz.

²⁹ Samz thaengz, beuk nam mat teuk aacz ihz keum rang mawh ne ngaz cih seu naez rimz leh bawnz kreung kaang hnhz? Mat teuk aacz caang kai rimz leh bawnz rak
³⁰ rak. Ihz nam moh plaakz Ohz naeh ihz thiangz Ohz. Ihz nam woc nam rawmz
³¹ kawmz Ohz ne naeh ihz teuk beuz. Ohz lao pehz nahz, reung dengz kawi klawhz meoz boh ihz saehz Phraz keui caang plawiz lawt bawnz, keuiz daz ihz saehz Khuanz Seu
³² Ngamz samz nam lawt bawnz. Ihz upz thiangz Kuanz Kingz Ihz kaw caang plawiz lawt bawnz boh keuiz daz ihz upz thiangz Khuanz Seu Ngamz samz nam plawiz lawt caat ni boh caat truz.

Teungz boh plaehz

(Lukas 6:43-45)

³³ Teungz rak kaw plaehz rak, teungz nam rak kaw plaehz nam rak. Yawt leh plaehz
³⁴ keuh kaw mas teungz. Pehz naeh kheuz heunyz raai, pehz naeh ihz raai, ngaz cih seu naez caang upz an rak? Kawp daz tuh kingz keu nuasz maang ceun nae kaw upz
³⁵ plaehz ceun diz. Ihz rak kaw leh plaehz an rak thaz teuk phan ta kingz keu nuasz daehz, ihz nam rak kaw leh plaehz an nam rak thaz teuk phan ta kingz keu nuasz daehz.
³⁶ Ohz lao pehz nahz, ihz an daz boh mony reu ma nam laai lawng naehz ne ngaz talz taam klawhz khaw kaai seu ngihz tatz traz.
³⁷ Kawp daz talz taam kawp mony reu ma daehz, samz lawt taam kawp mony reu ma daehz.”

An laak laaiz Yonah

(Markus 8:11-12, Lukas 11:29-32)

- ³⁸ Ihz mawz kyaamz teur ka boh Pharise keui maanyz Yesuhz daz, “Tahz sra, ehz sunz awlz an laak laaiz a Mih.”
- ³⁹ Hnhz kaw daz, “Ihz meukz raai keu ni caang daz maanyz an laak laaiz ez. Neuz lak an laak laaiz ihz taangz phraz Yonah
- ⁴⁰ ne nam plaiez an laak laaiz naehz. Ceun Yonah bawnz moh tuhز klungz kahz waiz seu ngihz waiz borz ne Kuanz Kingz Ihz kaw ngaz bawnz moh tuhز klungz keu
- ⁴¹ tehز waiz seu ngihz waiz borz. Kaai seu ngihz tatz traz tui ihz weng Nineweh rawi ceng ngaz nae pehz. Kawp daz keuh caanz reung dengz kawi daehz kawp Yonah rawz. Yawt raez, a niz samz maang an mawh lak
- ⁴² Yonah. Kaai seu ngihz tatz traz ne naang khunz prih Seun Daalz rawi ceng rae ngaz nae pehz kaai seu ngihz tatz traz. Kawp daz hnhz truz thaz prih yaan rae truz teuk ngarز mony reu ma pinya khunz Solomon. Yawt raez, a niz maang an mawh lak khunz Solomon.”

Phiz raai mial kut

(Lukas 11:24-26)

- ⁴³ “Meuz phiz raai lae lan thaz a ihz ne phraeoz lan ti hawngz rae khahz dawmz ti
- ⁴⁴ preumz. Meuz nam awlz ne, hnhz daz, ‘Ohz weng cu mial kaang daehz an ohz lae truz.’ Meuz hnhz a wa phraeoz ne awlz kaang
- ⁴⁵ an diz lawnz, piz phreoz mok laep. Hnhz lan raak truz boh an raai lak daehz teu pulz rae kut moh tuhز ihz an diz. Reung naeh ihz an diz na lak meuz aacz boh. Kaai ihz meukz kaap seu ni kaw ngaz naeh ceun diz.”

Mah Yesuhz boh seum bohز Yesuhz

(Markus 3:31-35, Lukas 8:19-21)

- ⁴⁶ Meuz Yesuhz yeung rawz aez boh wungz ihz ne mah Hnhz boh seum bohز Hnhz keui truz ceng boh thaz nawk, sunz upz taw
- ⁴⁷ Yesuhz. Teur ka daz Hnhz nahz, “Mah Mih boh seum bohز Mih yeung ceng boh thaz nawk, ngaz upz Mih da.”
- ⁴⁸ Hnhz mial daz, “Yaeh naeh mah Ohz boh
- ⁴⁹ seum bohز Ohz a?” Seuk no sapz teu paez Daehz keui daz, “Keuh keu ni naeh mah
- ⁵⁰ Ohz boh seum bohز Ohz. Ihz cih tawiz reung dawhز Paz Ohz an naeh lang kaang raaoz ne naeh seum bohز Ohz boh mah Ohz.”

Pung taek ihz pakz seu maalز

(Markus 4:1-9, Lukas 8:4-8)

- 13** Kaai seu ngihz an diz Yesuhz lae thaz kaang an diz, keu dez boh
- ² waar nawngz. Wungz ihz keui truz cuhz a Hnhz rae Hnhz raw keu dez kaai ceun
- ³ luang. Ihz samz naeh lang pukz. Yesuhz leh mony pung taek keui sawnz lawng klawhز meoz ihz keui nahz, Hnhz daz, “Maang ihz hawkz lan pakz seu maalز.
- ⁴ Meuz hnhz pakz cakz ceu ne teur ka klaez tawiz reung dengz rae simz keui truz seutz
- ⁵ suamz. Teur ka klaez ti reu aangz heungz, keu tehز lany. Cakz ceu an diz liang lae
- ⁶ truz luat kawp daz keu tehز lany. Keuiz daz meuz seu ngihz raw ne a wa wiatz
- ⁷ hawngz kawp daz rias nam truh. Cakz ceu teur ka samz klaez peur lah ruk seur keutz,
- ⁸ seur keutz keui riat teungz an diz. Cakz ceu teur ka samz klaez tuhز keu tehز rak, keuh plaehz truz seu peur ya pun, tualz kawlz pun, waiz kawlz pun kaai hnhz pakz.

⁹ Ihz maang keu tiakz keui aez hnhz ngarz.”

Reung aanz mony pung taek

(Markus 4:10-12, Lukas 8:9-10)

¹⁰ Teu paez keui truz cu Hnhz maanyz daz, “Cih naehz lao ihz nahz mony pung taek keui a?”

¹¹ Hnhz mial daz, “Pinya an unz mok lawng prih kaang raaoz keui Ohz aez boh pehz mas, keuz daz kaai keuh samz nam aez

¹² mas. Kaai ihz maang ne ngaz aez thaengz rae hnhz ngaz leung, kaai ihz nam maang samz bawnz leh thengz tang seu hnhz

¹³ maang. Kawp ceun diz rae Ohz bawnz krai plaehz keuh nahz mony pung taek, ‘Keuh yawt boh kaw nam awlz, teuk ngarz boh

¹⁴ kaw nam loz phawmz.’ Ihz taangz phraz Isaiah tak mok aacz ne keunyz mawn kaai keuh daz, ‘Pehz yawt boh kaw nam awlz, teuk ngarz boh kaw nam loz phawmz.

¹⁵ Kawp daz kingz keu nuasz keuh tanz, keu tiakz keuh kaw niukz, ngaai keuh kaw itz. Beuk nam naeh ceun diz ngaai keuh kaw awlz, keu tiakz keuh kaw ngarz rae phawmz keuh plaak plaii truz ne Ohz cih aez keuh moh rak.’

¹⁶ Keuz daz kawp ngaai pehz awlz, keu tiakz pehz ngarz rae pehz bawnz an rak.

¹⁷ Ohz daz mawn pehz nahz, ihz taangz phraz boh ihz keu sangz keui sunz awlz ceu nawhz baaiz an pehz awlz kaw nam awlz. Sunz ngarz an pehz ngarz kaw nam ngarz.

Ti loz mony pung taek

(Markus 4:13-20, Lukas 8:11-15)

¹⁸ Teuk ngarz ti loz mony pung taek an diz

¹⁹ raez. Cakz ceu klaez tawiz reung dengz samz, ihz an bawnz ngarz reu oiz prih Phraz samz nam loz phawmz ne phiz truz truat leh an pakz mok tuh phawmz hnhz.

²⁰ Cakz ceu an klaez kaai keu teh reu aangz heungz samz, meuz hnhz ngarz reu oiz

²¹ rak ne seuz phawmz saanyz rap. Keuz daz nam maang rias, moh taw seu co pan.

Meuz hnhz talz reung dengz peur teuk boh ihz pae suamz kawp reu oiz rak ne phawmz

²² luh lan luat. Cakz ceu an klaez kaai ruk seur keutz samz, ihz ngarz mony reu ma

Phraz keuz daz kawcz phawmz ta daehz, phawmz takz ron khamz ciz cim riat mony

²³ reu ma Phraz rae nam plaehz. Cakz ceu an klaez tuhz keu teh rak samz, Keuz daz ihz saanyz rap reu oiz rak naeh ceun

cakz ceu klaez tuhz keu teh rak ne naeh ihz loz phawmz reu oiz rak. Hnhz plaehz

mawn seu peur ya pun, tualz kawlz pun, waiz kawlz pun kaai hnhz pakz seu maalz.”

Pung taek cakz wangz

²⁴ Yesuhz lao mony pung taek tang meoz daz, “Parih kaang raaoz ne naeh ceun ihz pakz cakz ceu an rak tuhz maar daehz.

²⁵ Meuz ihz keui yaetz reuk ngeut ne raan su truz pakz sapz cakz wangz peur lah kaaiz

²⁶ kyung kaw lan thengz. Meuz teungz kaaiz

kyung keui mawh, maang seum kawr ne teungz plaehz wangz keui awlz thaangz
²⁷truz. Peur cao tahz maar keui truz lao tahz maar daz, ‘Tahz sra, sapz mok cakz ceu an rak nam anz haz? Plaehz wangz
²⁸keu diz samz truz thaz naez?’ Hnhz mial daz, ‘Raan su cih eu.’ Peur cao keui kaw maanyz hnhz, ‘Anz mih sunz aez ehz
²⁹bawkz thengz?’ Hnhz kaw daz, ‘Nam, meuz pehz bawkz ne doz pa tang teungz kaaiz
³⁰kyung. Aez keuh mawh teur kawmz raez. Beuk woc tui ras leh teungz plaehz wangz, mat rae tucz thengz, kaaiz kyung samz sapz tuh z taen ohz.’”

Pung taek cakz mustart boh ceu

(Markus 4:30-34, Lukas 13:18-19)

³¹ Hnhz lao thaengz mony pung taek tang meoz daz, “Parih kaang raaoz naeh ceun cakz mustart, ihz leh cakz mustart pakz
³²sapz tuh z sraakz daehz. Sangz daz cakz an diz naeh cakz an kyehz lak ihz kaw meuz a wa mawh ne mawh lak teungz seu tuh z
³³keui hacz aamz rae simz ploiz keui truz cih sapz haanz a kaakz.” Hnhz daz mony pung taek tang meoz thaengz, “Parih kaang
³⁴raaoz naeh ceun ceu, keun nyah hawkz leh ceu sapz tuh z phangz kaaiz kyung waiz piat rae prae hacz aamz.” Yesuhz lao
³⁵wungz ihz keui nahz leh mony pung taek, beuk nam pa mony pung taek kaw Hnhz nam lao. An ni aez keunyz mony reu ma ihz
 taangz phraz keui daz, “Ohz ngaz aangz mony ohz tang mony pung taek rae lao plaehz an unz mok thaz meuz phaen cih parih
 keu teh z.”

Ti loz kaaiz kyung boh cakz wangz

³⁶ Waaiz an diz Yesuhz mok thengz wungz ihz rae kut tuh z kaang. Teu paez keui truz maanyz Hnhz daz, “Lao plaehz eh z nahz ti loz
 pung taek cakz wangz tuh z maar luz.”
³⁷ Hnhz daz, “Ihz pakz cakz ceu an rak ne
³⁸naeh Kuanz Kingz Ihz. Maar samz naeh parih keu teh z, cakz ceu an rak ne naeh kuanz parih Phraz, Cakz wangz samz naeh
³⁹kuanz Manaat. Raan su an pakz ne naeh Manaat, kraao woc samz naeh kam pha lawng, ihz woc samz naeh teu maan kaang
⁴⁰raaoz. Ras plaehz teungz plaehz wangz rae mat sapz tuh z ngal ne meuz kam pha lawng
⁴¹ne naeh ceun diz. Kuanz Kingz Ihz ngaz cao teu maan kaang raaoz Daehz ras plaehz ihz pleung boh ihz meukz keui thaz parih
⁴²Daehz. Teu maan kaang raaoz leh keuh wiurz sapz tuh z ngal an rok keur, ti bawnz
⁴³yaam boh teur kak raangz. Meuz ceun diz ihz keu sangz keui samz thaangz tuh z parih Paz daehz ceun seu ngihz. Ihz maang keu
 tiakz keui aez hnhz ngarz.

Pung taek phan ta an unz mok

⁴⁴ Parih kaang raaoz naeh ceun phan ta an ihz pluz mok tuh z maar. Maang ihz hawkz awlz an diz ne buiz mok meu rae. Seuz
 phawmz saz phrihz phrahz daehz hacz aamz rae yal maar an diz. Samz, parih
⁴⁵kaang raaoz ne naeh ceun ihz ka khahz yal saengz plaehz. Meuz hnhz awlz saengz
⁴⁶plaehz langz mawh ne lan saz phrihz phrahz daehz hacz aamz kaw yal saengz plaehz an diz.

Pung taek rup

⁴⁷ Samz thaengz, prih kaang raaoz ne naeh ceun rup teuk klaez tuhz omz rae bawnz ⁴⁸ kahz paw keunyz. Meuz kahz neuk boh tuhz rup ne tahz kahz keui laak plaез a waar. Keuh keu dez ras leh kahz an rak sapz tuhz yol, kahz an nam rak keui samz ⁴⁹ wiurz thengz. Meuz kam pha lawng kaw naeh ceun diz. Teu maan kaang raaoz keui ngaz cur truz teur phraez ihz meukz tuhz ⁵⁰ ihz rak rae, wiurz sapz tuhz ngal an rok keur, ti bawnz yaam boh teur kak raangz.”

Traz an anz an teun mehz boh an trimz

⁵¹ “Anz pehz loz phawmz an keu diz hacz ⁵² aamz?” Keuh kaw daz, “Loz.” Hnhz lao keuh, “Sra an a wa sawnz leh lawng prih kaang raaoz ne naeh ceun tahz kaang leh plaез kreung teun mehz, kreung trimz tuhz kaang daehz.”

Ihz nam saanyz Yesuhz tuhz weng Nasaret

(Markus 6:1-6, Lukas 4:16-30)

⁵³ Yesuhz lao mony pung taek keu diz kaw ⁵⁴ lae lan thaz a diz. Yesuhz weng mial weng Daehz rae sawnz aez ihz nahz tuhz crawl keuh. Ihz keui sangz rae daz, “Ihz an ni bawnz pinya thaz naez ez? Taanz khoz an plaез bawnz an laak laaiz ne truz thaz ⁵⁵ naez ez?” Hnhz nam anz kuanz lak seu maz haz? Mus mah keuh naeh Mari nam anz haz? Yakop, Yosep, Simon boh Yudas keui ⁵⁶ nam anz seum boh Hnhz haz? Seum bohz keun nyah Hnhz kaw naeh kawmz ehz nam anz haz? Hnhz bawnz truz taanz khoz an

⁵⁷ keu ni thaz naez ez? Keuh nam paw song Hnhz.

Yesuhz daz keuh nahz, “Neuz lak tuhz pruh, tuhz kaang daehz ne ihz taangz ⁵⁸ phraz keui maang sre klawhz ti.” A diz Hnhz nam plaез an laak laaiz heungz kawp daz keuh nam yum.

Yohn tahz teuk srucz ne yam

(Markus 6:14-29, Lukas 9:7-9)

14 Meuz ceun diz khunz Herot an upz peung prih Kalile ngarz lawng ² Yesuhz, hnhz daz peur cao daehz nahz, “An ni naeh Yohn tahz teuk srucz, a wa meu rae imz thaz reung dengz yam, kawp ceun diz rae caang plaез taanz khoz an laak laaiz thanz teur ni.” ³ Khunz Herot cawpz Yohn rae mok tuhz thang kawp Cao Naang Herodias, meuz aacz naeh yah seum bohz daehz Philip. ⁴ Kawp Yohn lao hnhz, “An tahz ehz leh keun ⁵ nyah an diz ne nam tawiz sinz traz.” Khunz Herot sunz piamz Yohn keuz daz hnhz doz ihz kawp daz ihz keui mok hnhz naeh ihz taangz phraz hawkz. ⁶ Kaai seu ngihz keut khunz Herot ne kuanz keun nyah Herodias kut kaz tuhz pawiz, ⁷ samz trohz phawmz khunz Herot. Hnhz aez keu tih teung kaaо daz ngaz aez seu hnhz maanyz. ⁸ Mah keuh lao hnhz rae hnhz daz, “Leh kingz Yohn tahz teuk srucz ne sapz tuhz pheunz an ni.” ⁹ Khunz ne sangz daz phawmz nam rak kaw kawp keu tih an hnhz mok aacz ngaai khaekz daehz rae hnhz lao ihz leh aez ceun ¹⁰ keun nyah kyehz maanyz mok. Hnhz cao ¹¹ ihz tatz kingz Yohn tuhz thang. Ihz leh

kingz Yohn sapz tuhz sroz paanz rae aez keun nyah nahz, keun nyah kyehz kaw lan ¹² aez mah daehz nahz. Teu paez Yohn keui truz leh saangz keo toz hnhz. Waaiz an diz keuh lan lao Yesuhz.

Yesuhz damz ihz hanz rengz

(Markus 6:30-44, Lukas 9:10-17, Yohn 6:1-14)

¹³ Meuz Yesuhz ngarz reu oiz Yohn ne tumz ceun luang lo omz nawngz Kalile lan ti yaan ihz taw Daehz. Meuz wungz ihz keui ngarz reu oiz Hnhz lan ne keuh lae truz thaz pruh thaz weng rae lan tawiz Hnhz ¹⁴ lang pukz. Meuz Yesuhz cur thaz ceun luang ne awlz wungz ihz keui heungz baaiz Hnhz teur yawng keuh rae cih aez ihz nam moh rak keui moh rak truz.

¹⁵ Meuz teuk borz ne teu paez Hnhz keui truz cu Hnhz daz, “A niz naeh ti yaan ihz, samz a wa borz. Cao wungz ihz keui lan khahz yal seum suamz daehz nahz tawiz pruh raez.”

¹⁶ Yesuhz mial daz, “Keuh nam lo lan ti yaan ihz. Pehz aez keuh nahz seum suamz raez.”

¹⁷ Keuh kaw daz, “Ehz maang kaaiz mun khantz boh kahz keu aarz pan.”

¹⁸ Hnhz kaw daz. “Leh truz a Ohz ne raez.”

¹⁹ Hnhz cao ihz keu dez kaai taak ngiar. Leh kaaiz mun khantz boh kahz keu aarz ne ngaw yawt lang kaang raaaz, taang kez cuz Phraz rae pekz aez teu paez Daehz, teu paez keui kaw teur phraez aez ihz

²⁰ nahz. Keuh suamz saakz klawhz ihz. Teu paez Yesuhz keui seutz leh an leuz ne

²¹ bawnz seu kawlz aarz piat neuk neuk. Ihz

suamz kaaiz mun nam nap keun nyah boh kuanz ihz naeh ihz hanz rengz.

Yesuhz nuar lang kol omz

(Markus 6:45-56, Yohn 6:15-21)

²² Meuz diz luat Yesuhz cao teu paez Daehz kut tuhz ceun luang aez lo omz nawngz Kalile lan aacz, teun peu tang plawiz weng ²³ ihz. Waaiz plawiz weng ihz ne Hnhz raw suz tawngz taw Daehz lang rang. Meuz teuk bimz ne Yesuhz naeh taw Daehz. ²⁴ Keuiz daz ceun luang samz naeh yaan waar, kawp daz kurz nam maen plaakz rae seuk mar omz keui lukz laakz sapz ceun luang.

²⁵ Kraao teuk ngup cao ne Yesuhz nuar kaai ²⁶ omz lan cu keuh. Meuz teu paez keui awlz Hnhz nuar lang kol omz ne keuh doz baaiz, keuh daz naeh phet. Keuh raak keurz.

²⁷ Keuiz daz Yesuhz daz luat keuh nah, “Yak doz, naeh Ohz eu, mok phawmz yaak yaak.”

²⁸ Petros mial daz, “Beuk naeh Tahz kaw lao ohz aez ohz nuar lang kol omz lan cu Mih.”

²⁹ Yesuhz kaw daz, “Truz raez.” Petros kaw lae thaz ceun luang, nuar lang kol omz lan ³⁰ cu Yesuhz. Keuiz daz meuz hnhz awlz kurz krang ne doz, seun teungz kitz rae raak daz, “Tahz, khyawt ohz lah!”

³¹ Yesuhz kaw teuk pawrz tihz Daehz takz leh luat hnhz rae daz, “Euz, ihz reung dengz yum lany aez, cih naehz thaang pleung a?”

³² Meuz kaar kut tuhz ceun luang ne kurz ³³ kaw deukz. Ihz an naeh kaai ceun luang keui waiz Hnhz, keuh daz, “Mih naeh

³⁴ mawn Kuanz Phraz Pen Caoh.” Meuz keuh

lo lan thaz tui omz nawngz ne phraeo
³⁵ eungz Kennesaret. Ihz moh a diz keui tang
 ngaai Yesuhz rae khahz lao ihz an naeh rim
 daehz. Ihz keui leh ihz penz truz cu Hnhz,
³⁶ ihz penz keui maanyz teu caam caai kreung
 Hnhz. Ihz an teu keui kaw moh rak klawhz
 ihz.

An seu ngamz boh an woi

(Markus 7:1-13)

15 Pharise boh ihz mawz kyaamz keui
 truz thaz weng Yerusalem rae cu
² Yesuhz maanyz daz, “Cih naehz teu paez
 Mih keui nam cih tawiz thungz caam ihz
 thao meuz neungz a? Meuz keuh ngaz
 suamz seum suamz ne nam khez tihz.”
³ Yesuhz mial daz, “Cih naehz pehz nam
 tawiz sinz Phraz Pen Caoh samz tawiz
⁴ thungz caam ihz thao a? Kawp Phraz Pen
 Caoh lao mok, ‘Ro se mah paz daehz,’ boh
 ‘Ihz plawng mah paz keui aez hnhz yam.’
⁵ keuz daz pehz daz beuk ihz hawkz daz
 mah paz daehz nahz, ‘Kreung an ohz trohz
 aez mah paz daehz ne ohz a wa lu tawz
⁶ Phraz Pen Caoh,’ ihz an diz nam lo aez mah
 paz daehz nahz kreung an diz leui. Kawp
 thungz caam pehz ne pehz thengz mony
⁷ reu ma Phraz. Ihz seuk cih keui aez, Isaiah
 daz mok lawng pehz ne tawz baaiz daz,
⁸ ‘Ihz keu ni leh mony nap suamz Ohz, keuz
⁹ daz kingz keu nuasz keuh yaan Ohz. Keuh
 koz kwaai Ohz maat maat, kawp daz keuh

sawnz aez thungz traz an ihz tam ne naeh
 ceun sinz traz Ohz.”

An cih teuk woi ihz

(Markus 7:14-23)

¹⁰ Yesuhz raak leh wungz ihz a Daehz
 rae daz keuh nahz, “Teuk ngarz aez loz
¹¹ phawmz raez. An kut tuhaz mony ihz ne
 nam cih aez ihz woi, keuz daz an lae truz
 thaz mony ihz ne cih aez ihz woi.”
¹² Meuz diz teu paez keui lan cu Yesuhz
 rae daz Hnhz nahz, “Anz Tahz ehz mas,
 Pharise keui nam song mony reu ma Tahz
 ehz lao?”
¹³ Hnhz mial daz, “Khaehz an Paz Ohz
 kaang raaaz nam peuk seumz ne bawnz
¹⁴ bawgz pa rias. Teungz mah keuh raez,
 keuh naeh ihz ngaai bimz an plaez reung
 dengz. Beuk ihz ngaai bimz teur deuz
 plaez reung dengz kaw ngaz klaez lu tang
 keu aarz.”
¹⁵ Petros lao daz, “Lao aez ehz nahz ti loz
 mony pung taek luz.”
¹⁶ Yesuhz maanyz keuh nahz, “Pehz maat
¹⁷ tuhaz lawh haz? An kut tuhaz mony rae kut
 tuhaz klungz, samz lae lan boh ne pehz nam
¹⁸ mas haz? Keuz daz an lae truz thaz mony
 ne lae truz thaz kingz keu nuasz rae cih aez
¹⁹ ihz woi. Kawp daz an lae truz thaz kingz
 keu nuasz ne naeh an wonz meukz, piamz
 ihz, kawi kamesuhz, pleung kuanz yah ihz,
 rah, khaam saak se an nam anz, saehz ihz

²⁰keu ni. An keu ni cih aez ihz woi, keuiz daz nam khez tihz rae suamz ne nam cih aez ihz woi.”

Reung dengz yum keun nyah Kanaan

(Markus 7:24-30)

²¹ Yesuhz lae thaz a diz rae lan pruh rim

²²weng Taia boh weng Sidon. Maang keun nyah Kanaan hawkz moh a diz ne truz cu Hnhz, yaam daz, “Tahz, kuanz khunz Dawit, teur yawng ohz! Kuanz keun nyah ohz phiz kut rae a wa khin baaiz.”

²³ Yesuhz nam tawpz mial nahz naehz. Kawp ceun diz teu paez keui truz cu Hnhz rae daz, “Cao hnhz lan yaan yaan, hnhz yaam tawiz boh thaz puatz ehz ne.”

²⁴ Yesuhz kaw daz, “Phraz Pen Caoh phuhz Ohz truz ta soz Israel an bilz keui nahz pan.”

²⁵ Keuiz daz keun nyah an diz truz seuk deumz aacz ngaai Hnhz daz, “Tahz, kawr ohz lah.”

²⁶ Hnhz mial daz, “Nam rak seum leh seum suamz kuanz ihz seum plawngz aez sohz keui nahz.”

²⁷ Keun nyah an diz kaw daz, “Anz mawn laai, Tahz, sangz daz sohz keui kaw caang seutz suamz boh an nyawi, an klaez thaz pheunz tahz daehz.”

²⁸ Yesuhz kaw daz, “Keun nyah aez, mih yum mawn baaiz, aez naeh ceun mih sunz.” Kuanz keun nyah hnhz kaw moh rak meuz diz luat.

Yesuhz cih aez ihz keui moh rak

²⁹ Yesuhz lae thaz a diz rae lan waar nawngz Kalile, Hnhz kaw raw lang rang

³⁰rae keu dez a diz. Wungz ihz heungz keui truz cu Hnhz, keuh leh truz ihz cawng teur kuangz, ihz ngaai bimz, ihz toz nam keunyz, ihz ahz boh penz tang meoz keui, mok rim cawng Hnhz. Hnhz cih aez keuh

³¹moh rak. Ihz keui sangz meuz keuh awlz ihz ahz keui upz, ihz toz raang nam keunyz keui rak, ihz cawng teur kuangz keui kaw mawz nuar, ihz ngaai bimz keui kaw awlz rae ihz an awlz an keu diz hacz aamz keui lupz phrawz bunz Phraz Pen Caoh Israel.

Yesuhz damz ihz ponz rengz

(Markus 8:1-10)

³² Yesuhz raak teu paez Daehz rae daz, “Ohz teur yawng ihz keu ni, keuh a wa naeh kawmz Ohz waiz seu ngihz, nam maang seum suamz naehz. Ohz nam sunz plawiz weng kawp keuh coh, doz keuh onz tawiz reung dengz.”

³³ Teu paez Hnhz keui mial daz, “Tuhz ruk an ni ngaz lan leh seum suamz ta wungz ihz keu ni nahz a naez?”

³⁴ Yesuhz maanyz keuh, “Pehz maang kaaiz mun seu naeh?”

Keuh mial daz, “Kaaiz mun teu pulz boh kahz teur nyaenz.”

³⁵ Hnhz lao wungz ihz keui keu dez kaai keu
³⁶tehz. Hnhz leh kaaiz mun boh kahz keu

diz, Hnhz taang kez cuz Phraz, pekz kaaiz mun boh kahz keu diz aez teu paez keui nahz, keuh kaw teur phraez aez ihz nahz.
³⁷ Ihz keui suamz saakz klawhz ihz. Teu paez keui seutz leh an leuz bawnz pulz yol neuk
³⁸ neuk. Ihz suamz kaaiz mun nam nap pa keun nyah boh kuanz ihz, naeh ihz ponz rengz.
³⁹ Waaiz Yesuhz plawiz wungz ihz keui weng ne kut tuhaz ceun luang, lo omz nawngz Kalile lan eungz Makadan.

Maanyz an laak laaiz

(Markus 8:11-13, Lukas 12:54-56)

16 Pharise boh Saduse keui sunz caam yawt Yesuhz rae truz maanyz aez cih plaaz an laak laaiz kaang
² raaaz. Yesuhz mial daz, “Meuz teuk borz ne pehz teuk soz awlz peu eumz rong kaw pehz daz, ‘Prih omz ne ngaz plaangz.’
³ Meuz teuk ngup ne pehz teuk soz awlz peu eumz rong kaw pehz daz, ‘Ngaz maang cung longz kurz longz.’ Pehz leh ngaai yawt plengz ne mawz tak boh, keuz daz pehz yawt an laak laaiz an Ohz cih kraao
⁴ seu ni ne pehz nam mawz tak. Naeh kheuz ihz meukz raai boh ihz nam maang keu tih ceun pehz ne maanyz yawt an laak laaiz, neuz lak an laak laaiz Yonah ne nam plaaz an laak laaiz naehz.”

Waaiz an diz Yesuhz kaw praasz keuh lan aarz diz boh.

Wiar ceu Pharise boh ceu Saduse

(Markus 8:14-21)

⁵ Meuz keuh yeung lo omz ne teu paez keui
⁶ teur wil leh kaaiz mun. Yesuhz daz keuh

nahz, “Mok seu tih! Pehz wiar thengz ceu Pharise boh ceu Saduse raez.”

⁷ Keuh teur deuz teur daz daehz nahz, “Kawp ehz nam leh truz kaaiz mun keuz.”

⁸ Yesuhz kaw mas rae daz keuh nahz, “Ihz reung dengz yum lany keui aez, kawp naehz teur daz daehz nahz nam maang

⁹ kaaiz mun a? Maat tuhaz lawh haz? Anz pehz nam tang meuz kaaiz mun khanz damz ihz hanz rengz ne seutz an leuz seu

¹⁰ naeh piat? Meuz leh kaaiz mun teu pulz damz ihz ponz rengz ne seutz an leuz seu

¹¹ naeh yol? Cih naehz pehz nam loz phawmz an Ohz lao nam anz lawng kaaiz mun? Mok seu tih ceu Pharise boh ceu Saduse raez.”

¹² Keuh kaw loz phawmz daz, Hnhz nam lao keuh nahz lawng ceu kaaiz mun keuz daz lao mony sawnz Pharise boh Saduse keui.

Petros daz Yesuhz naeh Khris

(Markus 8:27-30, Lukas 9:18-21)

¹³ Meuz Yesuhz lan eungz Kaesare Philippi ne Hnhz maanyz teu paez Daehz, “Ihz keui daz Kuanz Kingz Ihz naeh yaeh?”

¹⁴ Keuh mial daz, “Teur ka daz naeh Yohn tahz teuk sruz, teur ka daz naeh Eliyas, teur ka daz naeh Yeremiah nam anz kaw ihz taangz phraz seu hawkz hawkz.”

¹⁵ Yesuhz maanyz keuh, “Pehz samz daz Ohz naeh yaeh hoh?”

¹⁶ Simon Petros kaw daz, “Mih naeh Khris, naeh Kuanz Phraz Pen Caoh an phawmz imz.”

¹⁷ Yesuhz mial daz, “Simon, kuanz Yonah aez, mih bawnz an rak kawp daz ihz lao plaaz mih nam anz, naeh Paz Ohz kaang

¹⁸ raaaz lao plaaz mih nahz. Ohz lao mih, mih naeh Petros loz daz reu aangz, Ohz

ngaz tae cumz caoh kaai reu aangz an ni, taanz khoz ngal raai keui nam pae bawnz¹⁹ cumz caoh an ni. Ohz ngaz aez mih nahz sawz prih kaang raaaz keui, an mih mat tuhaz prih keu tehz ne ngaz mat mok lang kaang raaaz, an mih khawz mok tuhaz prih keu tehz kaw ngaz khawz mok lang kaang raaaz.”

²⁰ Yesuhz lao teu paez Daehz keui nahz yak aez keuh lao ihz nahz Daehz naeh Khris.

**Yesuhz lao teuk aacz
lawng an Daehz ngaz yam**

(Markus 8:31-9:1, Lukas 9:22-27)

²¹ Tae leh kaanz diz Yesuhz lao plaiez teu paez Daehz keui nahz loz loz, Daehz ngaz lan weng Yerusalem rae talz suhz peur teuk kaai tihz ihz mawh keui, beunz caangz keui boh ihz mawz kyaamz keui. Daehz talz ihz piamz, keuz daz moh waiz seu ngihz meu rae imz boh.

²² Petros kaw nap Yesuhz lae thaz nawk keuh rae nae Hnhz daz, “Aez Phraz Pen Caoh kan se kamz lah Tahz. Yak aez naeh kaai Mih hawkz hawkz.”

²³ Yesuhz waaz yawt Petros daz, “Tiunz Ohz yaan yaan, Satan, mih naeh seum keun doz aez Ohz taz, mih nam wonz ceun Phraz, samz wonz ceun ihz.”

²⁴ Yesuhz daz teu paez Daehz keui nahz, “Beuk yaeh sunz tawiz Ohz kaw bawnz thiangz thengz toz daehz, baekz lakz²⁵ klawngz klaengz daehz rae tawiz Ohz. Ihz an sunz khyawt phawmz daehz ne ngaz luh sumz, ihz luh sumz phawmz kawp Ohz ne

²⁶ ngaz bawnz phawmz cen cen. Ihz hawkz an diz peung tang prih keu tehz hacz aamz kaw beuk khuanz phawmz hnhz luh sumz ne maang a keoz naehz? Leh naehz teur yal

²⁷ bawnz khuanz phawmz ihz? Meuz Kuanz Kingz Ihz ngaz truz pa tang bunz Paz Daehz boh teu maan kaang raaaz Daehz ne phrawz aez klawhz ihz nahz an rak an raai²⁸ ceun keuh cih. Ohz daz mawn pehz nahz, ihz an naeh a niz teur ka keui beuk keuh maat awlz Kuanz Kingz Ihz penz khunz tuhaz prih Daehz truz ne keuh maat bawnz yam.”

Plut raang

(Markus 9:2-13, Lukas 9:28-36)

17 Moh tualz seu ngihz Yesuhz nap Petros, Yakop boh Yohn an naeh seum bohz Yakop rae aacz raw taw keuh² kaai rang trawng. A diz Hnhz plut raang aacz ngaai keuh. Mael Hnhz aasz ceun seu ngihz, kreung Hnhz kaw keun ra ceun an³ thaangz. Meuz diz luat Moses boh Eliyas⁴ paw truz reu ma Hnhz. Petros daz Yesuhz nahz, “Tahz, a niz naeh ti rak seum moh ehz nahz. Ehz sunz cih siungz keu waiz, hawkz ta Mih, hawkz ta Moses, hawkz samz ta Eliyas.”

⁵ Meuz hnhz yeung daz boh ne peu eumz aasz truz reupz keuh, reus lae truz thaz peu eumz daz, “Hnhz an ni naeh Kuanz Ohz, an Ohz yaw, Ohz trohz phawmz Hnhz, teuk ngarz Hnhz raez.”

⁶ Meuz teu paez keui ngarz ne doz baaiz, leh ngaai keuh kupz sapz tuhaz keu tehz.

⁷ Keuz daz Yesuhz truz cu keuh rae leh tihz teu keuh, Hnhz daz, “Rawi raez, yak doz.”

⁸ Meuz keuh ceuk ngawk yawt ne kiutz taw Yesuhz pan.

⁹ Meuz keuh cur truz thaz rang ne Yesuhz seumz keuh daz, “Thonz taw Kuanz Kingz Ihz meu rae imz thaz reung dengz yam ne yak lao ihz nahz lawng an pehz awlz.”

¹⁰ Teu paez keui maanyz Hnhz, “Cih naehz ihz mawz kyaamz keui daz Eliyas bawnz truz aacz a?”

¹¹ Yesuhz mial daz, “Anz, Eliyas truz aacz

¹² rae meu rae klawhz meoz. Keuiz daz Ohz lao pehz, Eliyas a wa truz, keuiz daz ihz keui nam mas hnhz, cih hnhz teur keuh sunz. Naeh ceun khuz an diz Kuanz Kingz Ihz kaw ngaz talz pae suamz tuhz tihz ihz.”

¹³ Teu paez keui kaw loz phawmz daz Yesuhz lao lawng Yohn tahz teuk sruz.

**Yesuhz cih aez kuanz
ihz maang muk moh rak**

(Markus 9:14-29, Lukas 9:37-43)

¹⁴ Meuz keuh phraeoz tawz wungz ihz ne maang ihz hawkz truz kupz aacz ngaai

¹⁵ Hnhz daz, “Tahz, teur yawng kuanz ohz. Hnhz lae muk na baaiz. Hnhz kai klaez tuhz

¹⁶ ngal boh tuhz omz. Ohz leh hnhz truz cu teu paez Mih, keuiz daz keuh nam caang cih aez hnhz moh rak.”

¹⁷ Yesuhz mial daz, “Euz, kheuz ihz nam yum boh nam tawiz keui aez, Ohz bawnz moh kawmz pehz seu naeh? Ohz bawnz nyeun pehz seu naeh? Leh kuanz keur meh

¹⁸ kyehz ne truz cu Ohz raez.” Yesuhz nal phiz rae phiz kaw lae lan thaz kuanz keur meh, tae leh kaanz diz hnhz kaw moh rak truz.

¹⁹ Teu paez Hnhz keui rah rah truz cu Yesuhz rae maanyz daz, “Cih naehz ehz nam wah bawnz phiz a?”

²⁰ Hnhz mial daz, “Kawp reung dengz yum pehz lany. Ohz daz mawn pehz nahz, beuk reung dengz yum pehz teuk krengez cakz mustart kaw lao rang an ni nahz, ‘Moh a niz kraai lan a tui lah,’ daz kaw hnhz ngaz kraai. An pehz nam penz bawnz ne

²¹ nam maang naehz. Keuiz daz neuz lak suz tawngz boh kaerz seum suamz ne phiz an diz nam lae.”

**Yesuhz lao teuk aacz
lawng an Daehz ngaz yam**

(Markus 9:30-32, Lukas 9:43-45)

²² Meuz keuh phraeoz prih Kalile ne Hnhz daz teupaez Daehz nahz, “Kuanz Kingz Ihz ne talz ihz aapz Daehz tuhz tihz ihz.

²³ Keuh ngaz piamz Hnhz. Moh waiz seu ngihz Hnhz meu rae imz boh.” Teu paez keui kaw phawmz kyehz baaiz.

Khawn Wat

²⁴ Meuz Yesuhz boh teu paez keui phraeoz weng Kapernaum ne ihz seutz khawn wat keui truz lao Petros daz, “Sra pehz nam thaamz khawn wat haz?”

²⁵ Petros mial daz, “Thaamz boh.” Meuz Petros kut tuhz kaang ne Yesuhz maanyz klatz hnhz, “Mih thaang ceun nae Simon? Khunz tuhz prih keu tehz keui seutz khawn tawz kuanz daehz haz? Tawz kuanz ihz haz?”

²⁶ Petros tawpz daz, “Tawz ihz eu.” Yesuhz mial daz, “Beuk naeh ceun diz kuanz keui

²⁷lawt eu. Keuiz daz yak aez khatz keuh ne lan keuh duhz kahz tuhz nawngz raez. Peun aangz mony kahz an bawnz aacz ihz ne mih ngaz awlz paekz ron seu pyaz, leh an diz sapz khawn ta Ohz boh ta mih.”

Yaeh mawh myaat lak ihz lang prih kaang raaoz?

(Markus 9:33-37, Lukas 9:46-48)

18 Meuz ceun diz teu paez keui truz cu Yesuhz rae maanyz, “Naeh yaeh mawh myaat lak ihz lang prih kaang raaoz a?”

² Hnhz raak leh kuanz ihz hawkz rae aez ³ceng teun khinz keuh. Hnhz daz keuh nahz, “Ohz daz mawn pehz nahz, beuk pehz nam plut phawmz aez naeh ceun kuanz ihz kyezh kaw ngaz nam bawnz kut prih ⁴kaang raaoz. Kawp ceun diz ihz peuk daelz phawmz ceun kuanz ihz an ni ne naeh an ⁵mawh lak ihz lang prih kaang raaoz. Ihz saanyz rap ihz ceun kuanz ihz an ni kawp Ohz ne saanyz rap Ohz.

Cih aez kuanz ihz pleung

(Markus 9:42-48, Lukas 17:1-2)

⁶ Keuiz daz beuk maang ihz teuk pleung kuanz ihz an yum Ohz ne kaai ihz an teuk pleung an diz leh reu aangz teur leui mawh hawiz kokz hnhz rae teuk kitz tuhz omz ⁷paang laai truh tui baaiz rak. Parih keuh teh ne naeh an nam rak kawp maang an teuk pleung ihz. An teuk pleung keui ngaz naeh. Keuiz daz kaai ihz cih teuk pleung ne bawnz an nam rak.

⁸ Beuk tihz cawng mih cih aez daehz pleung kaw tatz wiurz thengz. An tihz cawng nam

keunyz rae bawnz kut ti phawmz imz cen cen ne rak lak maang tihz cawng keunyz ⁹rae klaez tuhz ngal raai cen cen. Beuk ngaai mih cih aez daehz pleung kaw klawkz thengz. An ngaai nam keunyz rae bawnz kut ti phawmz imz cen cen ne rak lak maang ngaai keunyz rae klaez tuhz ngal raai cen cen.”

Pung taek soz an bilz

(Lukas 15:3-7)

¹⁰ “Seu tih yak cih an nam saangz suamz kaai kuanz ihz keu ni. Kawp daz teu maan kaang raaoz keuh bawnz awlz se se ngaai ¹¹Paz Ohz lang kaang raaoz. Kawp daz Kuanz Kingz Ihz truz khyawt ihz an bilz. ¹² Beuk ihz hawkz maang soz seu peur ya, samz bilz hawkz, hnhz ngaz cih seu naez? Hnhz ngaz nam mok thengz timz kawlz timz kaai rang rae ngaz nam lan khahz an ¹³bilz haz? Ohz daz mawn pehz nahz, meuz hnhz a wa awlz ne seuz phawmz kaai toz an bilz leuz lak kaai timz kawlz timz an nam ¹⁴bilz. Naeh ceun diz laai, Paz pehz an naeh lang kaang raaoz nam sunz aez kuanz ihz kyezh luh hawkz hawkz.”

Cih aez tawz reung dengz kaai ihz cih pleung

¹⁵ “Beuk kuanz mai mih cih khatz pleung mih kaw lan lao an hnhz pleung, aez naeh mih boh hnhz pan. Beuk hnhz teuk ngarz mih kaw mih a wa bawnz mial kuanz mai ¹⁶daehz. Beuk nam teuk ngarz mih kaw aez maang saak se ne nap lan ihz keu aarz, keu ¹⁷waiz tawiz mih raez. Beuk hnhz nam leh mony reu ma keuh kaw lao cumz caoh raez.

Beuk hnhz nam teuk ngarz cumz caoh kaw mok ceun ihz nam yum phraz nam anz kaw mok ceun ihz seutz khawn.”

An mat boh an plawiz

¹⁸ “Ohz daz mawn pehz nahz, an pehz mat tuhz prih keu tehz ne mat boh lang kaang raaoz, an pehz plawiz tuhz prih keu tehz ne plawiz boh lang kaang raaoz.

¹⁹ Samz, Ohz daz mawn pehz nahz, beuk ihz keu aarz tuhz prih keu tehz prawm rae suz tawngz naehz kaw Paz Ohz an naeh lang ²⁰kaang raaoz kaw ngaz aez. Kawp daz ihz keu aarz nam anz kaw ihz keu waiz teur cuhz kaai mus Ohz ne Ohz naeh kawmz keuh a diz.”

Pung taek kuanz leng nam plawiz lawt

²¹ Petros truz cu Yesuhz rae maanyz, “Tahz, beuk kuanz mai daehz cih kawi daehz ne bawnz plawiz lawt aez hnhz seu naeh laehz? Pulz laehz haz?”

²² Yesuhz mial daz, “Ohz lao mih, nam anz ²³pulz laehz, pulz ta pulz kawlz laehz. Kawp ceun diz prih kaang raaoz daz ne naeh ceun khunz nap craangz ni, kaai kuanz

²⁴leng daehz. Meuz seun teungz hnhz cao raak kuanz leng khamz ni daehz kingz

²⁵laanz. Keuiz daz hnhz nam maang seum phrawz rae tahz paz leng cao hnhz saz toz daehz, saz tang kuanz yah daehz boh saz phrihz phraz daehz hacz aamz keui

²⁶rae phrawz. Kuanz leng an diz seuk deumz kingz sangz rae daz, ‘Nyeun aez ohz lah tahz, ni ka maang ohz phrawz aez boh.’

²⁷Tahz paz leng hnhz teur yawng hnhz rae

nam aez phrawz leui teungz mah hacz aamz.

²⁸ Keuiz daz meuz kuanz leng an diz lae lan ne awlz boh daehz kuanz leng teur deuz an khamz daehz paekz seu cawi ne piatz kokz hnhz rae daz hnhz nahz, ‘Phrawz

²⁹ni ohz raez.’ Bohz hnhz kaw seuk deumz kingz sangz rae tawngz paan hnhz nahz,

³⁰‘Nyeun aez ohz lah, ohz phrawz boh.’ Keuiz daz kuanz leng an diz nam teuk ngarz, leh boh daehz sapz tuhz khawk thonz

³¹taw phrawz ni daehz. Meuz kuanz leng aarz diz ngarz ne phawmz nam rak rae lan lao plaez tahz paz leng daehz nahz lawng

³²an diz hacz aamz. Tahz paz leng an diz kaw cao ihz raak kuanz leng raai an diz rae daz, ‘Mih meukz, meuz mih maanyz

ohz ne ohz a wa teungz mah ni mih hacz ³³aamz. Ceun ohz teur yawng mih ne mih lo teur yawng kuanz leng teur deuz nam

³⁴anz haz?’ Tahz paz leng sunz ca baaiz rae cao sapz tuhz khawk aez taam thonz taw phrawz ni daehz hacz aamz.

³⁵ Beuk pehz kuanz mai teur deuz nam leh phawmz hacz aamz plawiz lawt ne Paz Ohz kaang raaoz kaw ngaz nam plawiz lawt pehz.”

Lawng tahz yah teur thengz

(Markus 10:1-12)

19 Meuz Yesuhz a wa lao keu diz ne moh prih Kalile lan thaz tui omz

²Yordan tuhz prih Yio. Wungz ihz heungz keui lan tawiz Hnhz rae a diz Hnhz cih aez keuh moh rak.

³ Pharise teur ka sunz caam yawt Hnhz rae truz maanyz Hnhz, “Kawp naehz se nam

daz ihz ehz thengz yah daehz ne anz tawiz
⁴ traz?” Hnhz mial daz, “Meuz seun teungz
 Phraz Pen Caoh phaan cih keur meh boh
⁵ keun nyah ne pehz nam ti rawz haz? Phraz
 Pen Caoh daz, ‘kawp ceun diz keur meh
 praasz mah paz, moh kawmz yah, kaar keu
⁶ ni naeh hawkz kawmz.’ Kaar nam anz keu
 aarz leui, naeh hawkz pan. An Phraz Pen
 Caoh kopz ku ne yak aez ihz teuk praasz.”
⁷ Pharise keui maanyz Hnhz, “Kawp naehz
 Moses seumz mok daz aez lik thengz rae
 thengz yah daehz hoh?”
⁸ Yesuhz mial daz, “Kawp pehz tiu rae
 Moses khwaangz mok pehz caang thengz
 yah daehz. Keuiz daz meuz seun teungz
 ne nam naeh ceun diz. Ohz lao pehz nahz,
⁹ neuz lak yah daehz cih pleung kamesuhz
 rae thengz yah daehz, leh thaengz hawkz
 ne cih pleung kamesuhz.”
¹⁰ Teu paez keui daz Hnhz nahz, “Beuk
 naeh ceun diz lawng tahz lawng yah ne
¹¹ nam teur leh baaiz rak long.” Yesuhz
 mial daz, “Mony reu ma an ni nam tawiz
 bawnz klawhz ihz, ihz an Phraz Pen Caoh
¹² khriungz aez keui pan tawiz bawnz. Kawp
 daz teur ka keut pa nam krang tae na
 kaang. Teur ka kawp ihz tawngz keuh rae
 nam krang tae na kaang. Teur ka kawp prih
 kaang raaaz rae nam tae na kaang. Ihz
 caang tawiz mony reu ma an ni keui aez
 keuh tawiz.”

Yesuhz aez reung dengz rak kuanz ihz

(Markus 10:13-16, Lukas 18:15-17)

¹³ Ihz teur ka leh kuanz ihz truz cu Yesuhz,
 aez tihz Hnhz taangz kaai keuh rae aez suz
 tawngz aez. Keuiz daz teu paez keui nae
¹⁴ keuh. Yesuhz daz, “Aez kuanz ihz keui truz

cu Ohz raez, yak kan keuh kawp daz prih
 kaang raaaz ne naeh prih ceun keuh.”

¹⁵ Yesuhz leh tihz taangz kaai kuanz ihz rae
 aez reung dengz rak, beuk a wa kaw Hnhz
 praasz lan thaz a diz.

Ihz plong maang

(Markus 10:17-31, Lukas 18:18-30)

¹⁶ Naeh seu laehz maang ihz hawkz truz
 cu Yesuhz daz, “Tahz sra, aez ohz bawnz
 phawmz cen cen ne ohz bawnz cih rak
 naehz?”

¹⁷ Yesuhz mial daz, “Cih naehz maanyz Ohz
 lawng an rak a? Tahz an rak ne naeh taw
 hawkz pan. Beuk mih sunz kut ti phawmz
 imz cen cen kaw cih tawiz sinz raez.”

¹⁸ Ihz an diz mial maanyz, “Sinz keu nae
 hoh?”

Yesuhz kaw mial daz, “Yak piamz ihz, yak
 kawi kamesuhz, yak rah, yak khaam saak
¹⁹ se an nam anz. Ro se mah paz daehz, rak
 ihz rim daehz ceun mih rak toz daehz.”

²⁰ Ihz plong an diz daz, “Ohz a wa cih tawiz
 sinz keu ni hacz aamz, lo thaengz naehz
 boh?”

²¹ Yesuhz mial daz, “Beuk mih sunz keunyz
 rak kaw lan saz phrihz phraz daehz aez
 ihz phaanz keui nahz, mih ngaz bawnz
 phan ta lang kaang raaaz tui. Beuk a wa
 kaw truz tawiz puatz Ohz.”

²² Meuz ihz plong an diz ngarz ceun diz ne
 phawmz kyehz lan kawp daz hnhz naeh ihz
 maang mawn.

²³ Yesuhz lao teu paez daehz keui nahz,
 “Ohz daz mawn pehz nahz, ihz maang keui

²⁴ kut kreuk baaiz tuh prih kaang raaaz. Ohz
 lao thaengz pehz nahz, meu rang maang
 soz plocz kut tuh bawngz peun lac ne

yoh lak ihz maang kut tuhز prih Phraz Pen Caoh.”

²⁵ Meuz teu paez keui ngarz an diz ne sangz mawn rae maanyz, “Yaeh ngaz bawnz reung dengz khyawt hoh?”

²⁶ Yesuhz yawt keuh rae daz, “An ni ihz cih nam penz bawnz kaw Phraz Pen Caoh cih penz bawnz klawhz meoz.”

²⁷ Petros lao Hnhz daz, “Ehz cunz hacz aamz rae lan tawiz Mih, ehz samz ngaz bawnz naehz?”

²⁸ Yesuhz lao keuh, “Ohz daz mawn pehz nahz, kraao meu rae teun mehz hacz aamz tui Kuanz Kingz Ihz keu dez kaai plaang bunz Daehz ne pehz an tawiz Ohz seu kawlz aarz keui bawnz keu dez kaai plaang daehz seu kawlz aarz rae ngaz bawnz tatz

²⁹ traz kaai kheuz Israel seu kawlz aarz. Ihz thengz kang, kuanz mai, mah paz, kuanz ihz boh sraakz maar kawp mus Ohz ne bawnz a keoz seu peur ya pun boh phawmz
³⁰ cen cen. Keuiz daz ihz tan aacz keui ngaz klaez thaz puatz, ihz klaez thaz puatz keui ngaz tan aacz.”

Pung taek ihz suamz caangz

20 “Prih kang raaoz ne naeh ceun ni. Maang tahz sraakz seu pit hawkz lan khahz ihz suamz caangz teuk

² ngup cao cao aez cih sraakz daehz. Hnhz prawm aez ihz suamz caangz keui nahz teur seu ngihz paekz ron teur pyaz rae cao

³ keuh lan cih sraakz seu pit daehz. Meuz kraao timz na ri ne hnhz awlz ihz laap nam cih kaanz naehz ceng boh tuhز teur

⁴ laas. Hnhz lao keuh, ‘Pehz lan cih sraakz ohz raez, ohz ngaz aez langz seu taan ne.’

⁵ Keuh kaw lan. Meuz seu ngihz keun cang boh teuk borz waiz na ri kaw hnhz lae lan

⁶ khahz raak thaengz ceun diz. Meuz kraao hanz na ri ne hnhz lae lan awlz thaengz ihz ceng boh aarz diz rae hnhz maanyz keuh, ‘Cih naehz nam cih kaanz rae ceng

⁷ boh a niz keutz seu ngihz a?’ Keuh kaw daz, ‘Nam maang ihz caangz ehz.’ Hnhz daz keuh nahz, ‘Lan cih kaanz tuhز sraakz seu pit ohz raez.’

⁸ Meuz teuk borz ne tahz sraakz lao ihz tawnz craangz daehz nahz, ‘Raak ihz suamz caangz, aez keuh nahz langz, tae leh ihz truz thaz puatz taw ihz truz aacz.’

⁹ Ihz an truz thaz puatz keui bawnz cih taw seu na ri pan kaw bawnz langz paekz ron

¹⁰ ihz teur pyaz. Ihz an truz aacz keui samz thaang daehz ngaz bawnz leuz. Keuiz daz keuh kaw bawnz paekz ron ihz teur pyaz

¹¹ leun. Meuz keuh a wa bawnz langz ne nae

¹² tahz sraakz nahz, ‘Keuh keu ni truz cih taw seu na ri pan, ehz samz bawnz cih naarz kawcz keutz seu ngihz langz samz bawnz

¹³ teuk rengz.’ Keuiz daz tahz sraakz daz hawkz an naeh tuhز keuh ne nahz, ‘Raen, ohz cih nam phrengz nam anz long, nam

¹⁴ anz mih prawm ohz paekz ron seu pyaz rae? Leh langz daehz lan raez. Ohz sunz aez ihz truz thaz puatz nahz teuk rengz

¹⁵ mih. Anz ohz nam caang cih paekz daehz ceun daehz sunz? Kawp ohz phawmz rak rae mih nam traz ohz nahz haz?’”

¹⁶ Yesuhz kaw daz keuh nahz, “Naeh ceun diz ihz klaez thaz puatz keui ngaz tan

aacz, ihz tan aacz keui ngaz klaez thaz puatz.”

**Yesuhz lao teuk aacz kaai waiz
laehz lawng an Daehz ngaz yam**

(Markus 10:32-34, Lukas 18:31-34)

¹⁷ Meuz Yesuhz lan weng Yerusalem tawiz reung dengz ne Hnhz raak leh teu paez
¹⁸ Daehz taw seu kawlz aarz rae daz, “Teuk ngarz raez, ehz lan weng Yerusalem, Kuanz Kingz Ihz ne talz ihz aapz Daehz kaai tihz beunz caangz boh ihz mawz
¹⁹ kyaamz. Keuh ngaz taap taam yam. Keuh ngaz aapz Hnhz tuh z tihz ihz nam anz kheuz Yio, keuh ngaz saehz Hnhz, rotz Hnhz, taw kz pi amz Hnhz kaai lakz klawngz klaengz. Keuz daz moh waiz seu ngihz meu rae imz boh.”

Mony maanyz mah keuh Yakop boh Yohn

(Markus 10:35-45)

²⁰ Meuz diz yah Sebede tang kuanz keur meh keu aarz ne truz cu Yesuhz rae seuk deumz maanyz aez daehz bawnz seu meoz meoz.
²¹ Yesuhz daz, “Pehz sunz maanyz naehz?” Keun nyah an diz kaw daz, “Aez kuanz ohz kaar ni bawnz keu dez takz kaaiz Mih hawkz, takz dahz Mih hawkz, tuh z prih Mih.”
²² Yesuhz daz keuh nahz, “Pehz nam mas tang daehz maanyz naehz lawh, anz paarz tiangz bawnz an Ohz ngaz tiangz?” Kaar kaw daz, “Bawnz.”
²³ Yesuhz daz kaar nahz, “Paarz ngaz bawnz tiangz klakz an Ohz ngaz tiangz. Keuz daz a khwaangz an ngaz keu dez takz dahz takz kaaiz Ohz ne Ohz nam aez

bawnz. Ti an keu diz naeh ta ihz an Paz Ohz ras mok.”

²⁴ Meuz teu paez seu kawlz keui ngarz lawng an diz ne keuh sunz ca kaar kuanz
²⁵ mai nahz. Keuz daz Yesuhz raak leh keuh, daz keuh nahz, “Pehz mas boh ihz mawh an nam anz kheuz Yio keui upz peung ihz prih daehz, khunz keuh keui kaw ngaai
²⁶ aamz taw ihz daehz. Keuz daz pehz yak cih ceun diz. Ihz sunz penz an mawh ne lo
²⁷ cih peur cao pehz. Tuhz pehz ne sunz penz peur aacz ihz kaw lo cih peur cao pehz.
²⁸ Kuanz Kingz Ihz keuz kaw truz ta cao suamz ihz nam anz, truz cih peur cao ihz, cunz phawmz Daehz, thutz leh ihz tang heungz.”

**Yesuhz cih aez ihz ngaai
bimz keu aarz awlz mial**

(Markus 10:46-52, Lukas 18:35-43)

²⁹ Meuz Yesuhz boh teu paez Hnhz keui lae truz thaz weng Yerikho ne wungz ihz
³⁰ heungz keui tawiz puatz Hnhz. Maang ihz ngaai bimz keu aarz keu dez boh waar reung dengz, meuz kaar ngarz Yesuhz datz lan ne, kaar raak daz, “Tahz, Kuanz khunz Dawit, teur yawng aaiz raez!”
³¹ Wungz ihz keui hiutz aez kaar moh pras pras, keuz daz kaar baaiz raak usz usz daz, “Tahz, kuanz khunz Dawit, teur yawng aaiz raez!”
³² Yesuhz kaw deukz rae raak kaar. Hnhz maanyz, “Sunz aez Ohz cih paarz nahz naehz?”
³³ Kaar mial daz, “Tahz, aez ngaai aaiz awlz.”
³⁴ Yesuhz kaw teur yawng kaar rae teu ngaai kaar. Meuz diz luat ngaai kaar a wa awlz rae kaar lan tawiz Yesuhz.

Yesuhz kut tuhz weng Yerusalem

(Markus 11:1-11, Lukas
19:28-40, Yohn 12:12-19)

- 21** Meuz keuh a wa thatz weng Yerusalem, phraeoz pruh Betphake, a rang Olip ne Yesuhz cao teu paez Daehz keu aarz, daz kaar nahz, “Lan cu pruh an naeh aacz ngaai paarz, paarz ngaz awlz meu rang mahz liz an peun tukz boh kuanz hnhz. Khawz nuarz leh truz a Ohz raez. Beuk ihz maanyz paarz kaw lao, ‘Tahz lo,’ beuk daz ceun diz kaw keuh ngaz aez luat paarz nahz.”
- ⁴ An ni aez keunyz mony reu ma ihz taangz phraz daz, “Lao ihz weng Sion, ‘Yawt, khunz pehz truz cu pehz, maang phawmz keu ceum rae tumz meu rang mahz liz boh kuanz hnhz.”
- ⁶ Teu paez kaar diz kaw lan cih tawiz ceun Yesuhz seumz daehz. Kaar leh truz meu rang mahz liz kuanz mah, keuh leh kreung daehz paelz kaai butz meu rang, Yesuhz raw tumz lang diz. Ihz heungz baaiz leh kreung daehz paelz tawiz reung dengz, ihz teur ka kaw mak kaakz khaehz paelz tawiz reung dengz. Ihz an lan aacz Hnhz boh lan thaz puatz Hnhz keui teur aacz daehz raak daz, “Hosanna kaai Kuanz khunz Dawit! Tahz an truz tawiz mus Phraz Cen Cen ne naeh an rak! Lupz phrawz Phraz Pen Caoh an trawng dutz!”
- ¹⁰ Meuz Yesuhz kut tuhz weng Yerusalem ne ihz tang weng keui haaiz haaiz rae maanyz daz, “Hnhz naeh yaeh?” Wungz ihz kaw daz, “Hnhz naeh Yesuhz, ihz taangz phraz weng Nasaret prih Kalile.”

Yesuhz kut tuhz wat

(Markus 11:15-19, Lukas
19:45-48, Yohn 2:13-22)

- ¹² Yesuhz kut tuhz teu laangz wat Phraz rae wah thengz ihz saz ihz yal a diz. Hnhz plaangz beungz thengz pheunz ihz teur yal paekz boh tangz ihz saz ploiz keui.
- ¹³ Hnhz daz keuh nahz, “Taemz mok tuhz kyaamz lik daz, kaang Ohz trohz naeh ti suz tawngz, keuz daz pehz cih aez naeh tham konz.”
- ¹⁴ Ihz ngaai bimz boh ihz cawng nam rak keui truz cu Hnhz a wat, Hnhz cih aez keuh moh rak. Keuz daz beunz caangz boh ihz mawz kyaamz keui awlz lawng an rak seum sangz Hnhz cih boh an kuanz ihz keui raak keurz a wat daz, “Hosanna kaai Kuanz khunz Dawit!” ne keuh ca. Keuh maanyz Yesuhz, “Anz Mih ngarz an kuanz ihz keui raak?”
- Yesuhz mial daz, “Ngarz boh, pehz nam ti rawz haz? ‘Phraz Pen Caoh cih aez kuanz ihz boh kuanz ngaak keui lupz phrawz Hnhz.’”
- ¹⁷ Hnhz kaw mok thengz keuh rae lan nawk weng a pruh Bethani, Hnhz moh a diz seu borz.

Yesuhz kin teungz laangz wah

(Markus 11:12-14,20-24)

- ¹⁸ Teuk ngup cao cao meuz Yesuhz yeung mial kut tuhz weng ne Hnhz a wa coh. Hnhz awlz teungz laangz wah naeh waar reung dengz. Hnhz lan dawmz yawt plaehz keuz daz nam awlz plaehz, naeh taw lahz pan.

Hnhz daz teungz laangz wah nahz, “Yak aez plaehz seu pawk leui.” Meuz diz luat teungz laangz wah kaw wiatz lan.

²⁰ Meuz teu paez keui awlz ne sangz, keuh daz, “Teungz laangz wah ne cih seu naez ²¹wiatz lan ez?” Yesuhz mial daz, “Ohz daz mawn pehz nahz, beuk pehz maang reung dengz yum, an nam thaang pleung kaw nam kaz taw cih kaai teungz laangz wah ceun ni, lao rang an ni nahz, ‘Kraai klaez sapz tuh z paang laai raez,’ daz kaw ²²ngaz naeh mawn. Meuz pehz suz tawngz ne beuk yum rae maanyz ne pehz ngaz bawnz.”

Ihz maanyz lawng a na Yesuhz

(Markus 11:27-33, Lukas 20:1-8)

²³ Meuz Yesuhz kut sawnz tuh z teu laangz wat ne beunz caangz boh ihz mawh keui truz maanyz Hnhz daz, “Mih leh a na naehz cih an keu diz hacz aamz? Yaeh aez Mih nahz a na an diz?”

²⁴ Yesuhz mial daz, “Ohz kaw ngaz maanyz pehz nahz seu meoz. Beuk pehz tawpz kaw Ohz ngaz lao, Ohz leh a na naehz cih an ²⁵keu ni. Teuk srucz Yohn ne naeh thaz kaang raaaz haz, naeh thaz ihz haz?” Keuh teur deuiz teur daz daehz nahz, “Beuk eh z daz naeh thaz kaang raaaz daz kaw Hnhz ngaz maanyz thaengz daz, ‘Cih naehz pehz paw nam yum Yohn hoh?’ Beuk eh z daz naeh thaz ihz daz kaw eh z bawnz doz ihz, kawp ²⁶daz ihz hacz aamz keui mok Yohn naeh ihz taangz phraz.” Kawp ceun diz rae keuh ²⁷tawpz daz Yesuhz nahz, “Ehz nam mas.” Yesuhz kaw mial daz, “Ohz kaw nam lao leh a na naehz cih an keu ni.”

Pung taek kuanz keur meh keu aarz

²⁸ “Pehz thaang ceun nae? Ihz hawkz maang kuanz keur meh keu aarz. Hnhz lan cu an mawh ne daz, ‘Kuanz, lan cih ²⁹aez sraakz seu pit ohz meu ni luz.’ Kuanz mawh ne daz, ‘Ohz nam lan.’ Keuiz daz hnhz mial seuk weur phawmz rae lan nahz ³⁰waaiz aw h. Waaiz an diz paz keuh lan cu kuanz kyehz daz ceun wawh. Kuanz kyehz daz, ‘Ohz lan boh.’ Keuiz daz hnhz nam lan. ³¹Kaar keu ni an nae cih tawiz paz daehz a?” Keuh tawpz daz, “Naeh kuanz mawh eu.” Yesuhz daz keuh nahz, “Ohz daz mawn pehz nahz, ihz seutz khawn boh yah mak damz keui bawnz kut aacz pehz tuh z prih ³²Phraz Pen Caoh. Kawp daz Yohn truz plaehz pehz nahz reung dengz keu sangz kaw pehz nam yum. Ihz seutz khawn boh yah mak damz keui samz yum. Sangz daz pehz awlz ihz yum truz kaw pehz nam caanz reung dengz kawi daehz rae yum hnhz.”

Pung taek ihz khaatz sraakz seu pit

(Markus 12:1-12, Lukas 20:9-19)

³³ “Teuk ngarz thaengz pung taek seu meoz raez. Maang tahz sraakz hawkz peuk seumz seu pit. Hnhz lawm tang khaehz sraakz, kawngz lu ti teur niat plaehz, cih tang khrengz pao yawt. Hnhz khaatz aez ihz cih sraakz keui nahz kaw lae reung ³⁴dengz. Meuz kraao a wa plaehz ne hnhz cao peur cao daehz truz maanyz plaehz ³⁵seu pit an naeh langz khaatz sraakz. Keuiz daz ihz khaatz sraakz keui cawpz peur cao keu diz rae hawkz keuh tiz, hawkz keuh piamz, thaengz hawkz samz keuh leh

³⁶ kawnz reu aangz wiurz piamz. Hnhz kaw plawiz lan thaengz peur cao daehz heungz lak laehz aacz. Ihz khaatz sraakz keui kaw

³⁷ cih kaai keuh ceun diz leun. Thaz puatz ne hnhz cao kuanz keur meh daehz lan, hnhz daz, 'Keuh ngaz nap suamz boh kuanz ohz

³⁸ keuiz.' Keuiz daz meuz ihz khaatz sraakz keui awlz kuanz tahz sraakz ne teur daz daehz nahz, 'Hnhz an ni naeh ihz caam a moi, truz raez, piamz thengz hnhz, aez ehz

³⁹ bawnz a moi hnhz.' Keuh cawpz leh hnhz laak plaehz thaz nawk sraakz rae piamz

⁴⁰ thengz hnhz. Meuz tahz sraakz weng truz ne ngaz cih seu naez kaai ihz khaatz sraakz keui nahz?"

⁴¹ Keuh tawpz daz, "Hnhz ngaz piamz teuk raang ca thengz ihz khaatz sraakz an meukz keui rae ngaz khaatz aez ihz an aez daehz nahz plaehz seu pit meuz phangz leh plaehz."

⁴² Yesuhz daz keuh nahz, "Pehz nam ti rawz tuh kyaamz lik haz? 'Reu aangz an ihz cih kaang keui mok thengz ne naeh mial reu aangz seu dukz thaz cawgz boh. An ni naeh Phraz Cen Cen cih, naeh an rak seum sangz tuh keutz ngaai ehz.'

⁴³ Kawp ceun diz Ohz lao pehz nahz, prih Phraz Pen Caoh ne leh thengz thaz pehz rae ngaz aez kheuz ihz an caang plaehz

⁴⁴ plaehz prih Phraz Pen Caoh keui nahz. Ihz an klaez sapz kaai reu aangz ne ihz an diz ngaz peukz penz patz, kaai ihz an reu aangz klaez sapz samz ihz an diz ngaz nyawi."

⁴⁵ Meuz beunz caangz boh Pharise keui ngarz mony pung taek Yesuhz lao ne mas

⁴⁶ Hnhz daz phaatz sapz daehz. Keuh khahz laai ngaz cawpz Yesuhz, keuiz daz keuh

doz ihz kawp daz ihz keui mok Yesuhz naeh ihz taangz phraz.

Pung taek pawiz kopz ku

(Lukas 14:15-24)

22 Yesuhz lao thaengz keuh nahz

² mony pung taek daz, "Parih kaang raaaz ne naeh ceun ni. Maang khunz hawkz raenz aez kuanz keur meh daehz

³ nahz pawiz kopz ku. Hnhz cao peur cao daehz khahz raak khaekz an paangz mok

⁴ keui truz kaw keuh nam kai. Hnhz cao thaengz peur cao daehz teur ka keui rae seumz tang keuh, aez lao khaekz daehz

daz, 'Ohz a wa raenz seum suamz, tangz meuk boh toz satz an keu buiz keui, a wa peun tan mok keunyz, truz kut tuh

⁵ pawiz raez.' Keuiz daz khaekz keu diz nam kut phawmz, hawkz lan maar, thaengz

⁶ hawkz samz lan khahz ka. Teur ka samz cawpz peur cao khunz keu diz rae tiz keuh,

⁷ piamz thengz keuh. Khunz kaw sunz ca rae cao siukz daehz phreoz thengz ihz piamz phawmz keu diz kaw tucz thengz weng

⁸ keuh. Hnhz lao peur cao daehz keui nahz, 'Sangz daz pawiz ne a wa peun tan mok boh kaw khaekz an paangz mok keui nam

⁹ theukz kut. Lan tawiz reung dengz rae

¹⁰ raak truz ihz an pehz awlz.' Peur cao keui kaw lan tawiz reung dengz, raak truz ihz rak ihz raai an daehz awlz keui rae pawiz an diz neuk taw khaekz.

¹¹ Meuz khunz truz dawmz yawt khaekz daehz ne awlz ihz hawkz nam kap kreung

¹² kut pawiz kopz ku rae, hnhz daz ihz an diz nahz, 'Raen, nam kap kreung kut pawiz samz kut tuh pawiz ceun nae?' Keuiz daz

¹³ ihz an diz nam rawhz. Meuz ceun diz khunz lao ihz daehz keui nahz, ‘Mat tihz cawng hnhz, wiurz plaез an bimz thaz nawk, a diz bawnz yaam boh teur kak raanz.’”

¹⁴ Yesuhz kaw daz keuh nahz, “Kawp daz ihz an talz paanz keui heungz kaw ihz an talz ras keui lany.”

Lawng thaamz khawn

(Markus 12:13-17, Lukas 20:20-26)

¹⁵ Pharise keui lae lan rae teur lao daehz

¹⁶ ceu dakz khahz mony reu ma Hnhz. Keuh cao teu paez daehz tang ihz khunz Herot lan cu Hnhz, keuh lao daz, “Tahz sra, Mih naeh ihz keu sangz, sawnz aez traz Phraz Pen Caoh tawiz traz an anz. Mih nam doz ihz daz Daehz, Mih nam yawt ngaai yaeh.

¹⁷ Lao ehz nahz luz, Mih thaang ceun nae? An thaamz khawn khunz longz Kaesar ne anz tawiz traz haz nam tawiz haz?”

¹⁸ Keuiz daz Yesuhz mas keuh kyaam meukz rae daz, “Pehz seuk cih daehz naeh ihz rak, cih naehz lah pehz kyaam ceu dakz Ohz

¹⁹ a? Plaез Ohz nahz paekz thaamz khawn seu pyaz luz.” Keuh kaw leh truz aez Hnhz

²⁰ nahz paekz Rom seu pyaz. Hnhz maanz keuh, “An ni naeh mus yaeh? Naeh raanz yaeh?”

²¹ Keuh mial daz, “Khunz longz Kaesar.”

Yesuhz daz keuh nahz, “Khangz khunz kaw aez mial khunz, khangz Phraz kaw aez mial

²² Phraz.” Meuz keuh ngarz an diz ne sangz. Keuh kaw lae lan thaz Hnhz.

Meu rae imz

(Markus 12:18-27, Lukas 20:27-40)

²³ Kaai seu ngihz an diz Saduse, an nam yum meu rae imz keui truz cu Yesuhz

²⁴ maanz daz, “Tahz sra, Moses seumz mok ehz nahz, beuk ihz hawkz leh yah maat maanz kuanz yam lan ne seum boh hnhz bawnz leh mawm daehz, aez maanz ceu

²⁵ kheuz mai daehz da. Maanz kuanz mai teu pulz tuhz ehz. An mawh lak ihz ne leh yah maat maanz kuanz samz a wa yam rae hnhz mok aez seum boh daehz nahz

²⁶ yah. Kaai keu aarz, kaai keu waiz, keuh teu pulz hawkz wa hawkz leh keun nyah an diz, nam maanz kuanz rae yam hacz

²⁷ aamz. Thaz puatz dutz keun nyah an diz

²⁸ kaw yam. Beuk naeh ceun diz kraao meu rae imz tui keun nyah an diz ngaz naeh yah yaeh? Kawp keuh teu pulz ne a wa leh keun nyah an diz klawhz ihz.”

²⁹ Yesuhz mial daz, “Pehz a wa pleung kawp daz pehz nam mas kyaamz lik boh taanz

³⁰ khoz Phraz Pen Caoh. Meuz kraao meu rae imz tui ihz keui nam teur leh daehz leui,

³¹ naeh ceun teu maanz kaanz raanz. Kraao ihz yam meu rae imz tui pehz nam ti bawnz rawz an Phraz Pen Caoh daz pehz nahz

³² haz? Hnhz daz, ‘Ohz naeh Phraz Abraham, Phraz Isaac boh Phraz Yakop.’ Hnhz nam anz Phraz ihz yam, naeh Phraz ihz imz.”

³³ Meuz wungz ihz keui ngarz ne teur aacz daehz sangz an Hnhz sawnz.

Sinz an myaat lak ihz

(Markus 12:28-34, Lukas 10:25-28)

³⁴ Meuz Pharise keui ngarz Yesuhz tawpz Saduse, aez keuh pras ne teur cuhz daehz

³⁵ truz cu Hnhz. Ihz mawz kyaamz hawkz an naeh tuhz keuh ne sunz caam yawt Hnhz

³⁶ rae maanz daz, “Tahz sra, tuhz kyaamz sinz traz ne sinz an nae myaat lak ihz?”

³⁷ Yesuhz mial daz, “Rak Phraz Cen Cen, Phraz Pen Caoh daehz kingz keu nuasz

hacz aamz, phawmz hacz aamz, nyaan
³⁸hacz aamz.’ An ni naeh sinz kaai hawkz
³⁹boh an myaat lak ihz. Thaengz hawkz kaw
 naeh ceun diz, ‘Rak ihz rim daehz ceun
⁴⁰mih rak toz daehz.’ Kyaamz sinz Moses boh
 kyaamz ihz taangz phraz keui hacz aamz
 tae mok kaai sinz kaar ni.”

Khris naeh kuanz yaeh?

(Markus 12:35-37, Lukas 20:41-44)

⁴¹ Meuz Pharise keui yeung teur cuhz boh
⁴²ne, Yesuhz maanyz keuh, “Pehz thaang
 lawng Khris ceun nae? Hnhz naeh kuanz
 yaeh?” Keuh mial daz, “Hnhz naeh kuanz
 khunz Dawit.”

⁴³ Hnhz daz keuh nahz, “Kawp naeh khunz
 Dawit raak Hnhz naeh Tahz tawiz Khuanz
⁴⁴a?” Khunz Dawit daz, “Phraz Cen Cen daz,
 Tahz ohz nahz, ‘Keu dez thaz takz kaaiz
 Ohz raez, thonz taw Ohz leh raan su Mih
⁴⁵keui mok tuhز keutz cawng Mih.’ Beuk
 khunz Dawit raak Khris naeh Tahz kaw cih
 seu naez caang naeh kuanz hnhz?”

⁴⁶ Nam maang yaeh tawpz bawnz mony reu
 ma Hnhz, tae leh seu ngihz an diz yaeh
 nam yaak maanyz naehz a Hnhz leui.

Seu tih ihz mawz kyaamz boh Pharise

*(Markus 12:38-39, Lukas
 11:43,46, 20:45-46)*

23 Meuz diz Yesuhz lao wungz ihz
 boh teu paez Daehz keui nahz,
² “Ihz mawz kyaamz boh Pharise keui naeh
 ihz an maang a na lao plaez kyaamz sinz
³traz Moses. Kawp ceun diz pehz teuk
 ngarz an keuh lao rae cih tawiz lah. Keuz
 daz yak cih yeung ceun keuh cih, kawp
 daz keuh lao boh kaw nam cih tawiz daehz

⁴ eunz. Keuh raenz lam an keu can baekz
 kreuk ne sapz kaai cawgz pahz ihz, keuz
 daz keuh samz nam sunz leh tang kuanz
⁵ tihz daehz kraai an keu diz. An keuh cih
 klawhz meoz ne cih aez ihz awlz. Yawt
 seu kiz hurz kyehz an keuh mar sapz lik
 traz, mat seu takz a daalz boh plaez
 tihz daehz ne mawh thanz teur nae boh
 kap kreung cih aez caam caai hanz hanz.
⁶ Keuh song ti keu dez an trawng lak ihz
⁷ tawiz pawiz tawiz crawp, keuh song ihz
 tak daehz tawiz teur laas, aez ihz raak
⁸ daehz ‘Tahz Sra.’ Keuz daz pehz samz yak
 aez ihz raak daehz naeh Sra, kawp daz
 Sra pehz naeh taw hawkz pan, pehz hacz
⁹ aamz naeh kuanz mai. Yak raak yaeh tuhز
 prih keu tehz naeh Paz, kawp daz Paz pehz
 naeh taw hawkz pan, an naeh lang kaang
¹⁰ raaoz. Yak aez ihz raak daehz naeh Tahz,
 kawp daz Tahz pehz naeh Khris taw Daehz
¹¹ pan. Ihz an mawh lak ihz peur lah pehz ne
¹² lo naeh peur cao ihz. Ihz mok seuk mawh
 toz daehz ne ngaz klaz daelz, ihz mok
 daelz toz daehz samz ngaz moh trawng.”

Yesuhz nae ihz mawz kyaamz boh Pharise

*(Markus 12:40, Lukas
 11:39-42,44,52, 20:47)*

¹³ “Ihz mawz kyaamz boh Pharise keui aez,
 pehz seuk cih daehz naeh ihz rak, pehz
 bawnz an nam rak! Pehz dapz keur wah
 prih kaang raaoz aacz ngaai ihz. Pehz
 kaw nam kut, ihz sunz kut keui nahz kaw
¹⁴ pehz nam aez kut. Ihz mawz kyaamz boh
 Pharise keui aez, pehz seuk cih daehz naeh
 ihz rak, pehz bawnz an nam rak! Kawp daz
 pehz rimz leh kreung kaang yah keu maaiz
 rae suz tawngz hanz hanz. Pehz ngaz talz
 taam an keu can leuz boh.

¹⁵ Ihz mawz kyaamz boh Pharise keui aez, pehz seuk cih daehz naeh ihz rak, pehz bawnz an nam rak! Pehz lo tawiz omz, lan tawiz pukz keui rae cih aez ihz kut tawiz phasa daehz. Meuz ihz kut tawiz pehz ne pehz cih aez hnhz naeh ceun pehz, aez keuh penz ihz prih ngal raai leuz pehz aarz pun.

¹⁶ Ihz ngaai bimz an plaez reung dengz keui aez, pehz bawnz an nam rak! Pehz daz beuk ihz teung kaa kaai wat ne nam kut, keuz daz beuk teung khamz a wat ne kut

¹⁷ boh. Ihz meukz ngaai bimz keui aez, an nae mawh myaat a? Naeh khamz haz, nam anz kaw naeh wat an cih aez khamz seu ngamz

¹⁸ haz? Pehz daz tang beuk ihz teung khrengz ne nam kut, keuz daz beuk teung kreung lu

¹⁹ kaai khrengz pukz caw samz kut boh. Ihz ngaai bimz keui aez, an nae mawh myaat a? Naeh kreung lu haz, naeh khrengz pukz caw an cih aez kreung lu seu ngamz haz?

²⁰ Kawp ceun diz ihz teung khrengz kaw teung kaai khrengz pukz caw boh teung tang an naeh kaai khrengz hacz aamz.

²¹ Naeh ceun diz, ihz teung wat kaw teung wat boh teung tang Tahz an moh tuhz wat.

²² Ihz teung kaang raaoz kaw teung plaang Phraz Pen Caoh boh teung tang Tahz an keu dez kaai plaang.

²³ Ihz mawz kyaamz boh Pharise keui aez, pehz seuk cih daehz naeh ihz rak, pehz bawnz an nam rak! Pehz leh phakz kiz, mul khaez, imz krim aez seu kawlz pun seu pun. Keuz daz pehz nam nap suamz sinz traz an mawh an naeh an cih phrengz, an teur yawng boh an cih yoz keui. Pehz lo cih an keu ni, an daz aacz keu diz kaw nam

²⁴ lo plawiz thengz. Ihz ngaai bimz an plaez reung dengz keui aez, pehz caet omz yak

aez mah phrihz kut, keuz daz pehz muang tang meu rang maang soz.

²⁵ Ihz mawz kyaamz boh Pharise keui aez, pehz seuk cih daehz naeh ihz rak, pehz bawnz an nam rak! Pehz khez thaz nawk klakz boh sroz, keuz daz tuhz nao samz neuk taw lawphahz boh an mawr suamz

²⁶ keui. Pharise ngaai bimz keui aez, khez aacz tuhz nao klakz boh sroz keui raez, beuk cih ceun diz thaz nawk kaw caangz daehz ne.

²⁷ Ihz mawz kyaamz boh Pharise keui aez, pehz seuk cih daehz naeh ihz rak, pehz bawnz an nam rak! Pehz naeh ceun thunz thukz tawiz peun lu keui. Yawt thaz nawk tae aatz baaiz, keuz daz tuhz nao samz neuk taw ceun aangz ihz yam boh an woi

²⁸ klawhz meoz keui. Naeh ceun khuz an diz pehz kiungz naeh ihz keu sangz aacz ngaai ihz, keuz daz tuhz nao pehz samz neuk taw an seuk cih daehz naeh ihz rak boh an nam phrengz keui.”

**Yesuhz lao teuk aacz lawng
taam an keuh ngaz talz**

(Lukas 11:47-51)

²⁹ “Ihz mawz kyaamz boh Pharise keui aez, pehz seuk cih daehz naeh ihz rak, pehz bawnz an nam rak! Pehz cih peun lu ihz taangz phraz boh seuk laep peun lu ihz

³⁰ keu sangz keui. Pehz daz, ‘Khanz daz ehz penz ihz co ihz keu daehz keu daepz ehz kaw ehz nam kut tuhz cumz piamz ihz

³¹ taangz phraz. Teur deuz tang pehz daz daehz naeh kheuz ihz piamz ihz taangz

³² phraz. Cih teuk neuk reung dengz kawi ihz keu daehz keu daepz pehz cih truz

³³ raez. Pehz naeh heunyz, pehz naeh kheuz

heunyz raai! Pehz ngaz cih seu naez tiunz
³⁴lawt thaz taam ngal raai? Kawp ceun diz
 ohz phuhz aez pehz nahz ihz taangz phraz,
 ihz maang pinya boh ihz mawz kyaamz
 keui. Teur ka pehz ngaz piamz, teur ka
 pehz ngaz tawgz piamz kaai lakz klawngz
 klaengz, teur ka pehz ngaz rotz tawiz
 crawp rawz traz rae wah thengz keuh kut
³⁵seu weng lae seu weng. Kawp ceun diz
 naamz ihz keu sangz an klaez tuhز keu
 tehز kaanz Abel taw phraeoz Sekhariah an
 naeh kuanz Berekiah, an pehz piamz peur
 lah wat boh khrengz pukz caw ne ngaz
³⁶naeh kaai pehz. Ohz daz mawn pehz nahz
 taam an keu diz ngaz klaez kaai pehz kaap
 seu ni.”

Yesuhz rak weng Yerusalem

(Lukas 13:34-35)

³⁷ “Oz weng Yerusalem, Yerusalem, mih
 naeh ihz piamz ihz taangz phraz, leh
 kawnz reu aangz wiurz piamz ihz an plawiz
 lan cu mih. Ohz sunz aez mih leh kuanz
 daehz ceun mah yaerz tum leh kuanz
 daehz tuhز keutz piangz ne thanz teur
³⁸nae. Keuiz daz mih nam kai. Yawt, kaang
³⁹pehz kaw ngaz raam rae pras. Ohz lao pehz
 nahz, thonz taw pehz maat daz, ‘Tahz an
 truz tawiz mus Phraz Cen Cen ne naeh an
 rak,’ ne pehz nam bawnz awlz thaengz Ohz
 leui.”

Lao teuk aacz lawng wat yaatz

(Markus 13:1-2, Lukas 21:5-6)

24 Meuz Yesuhz lae truz thaz teu
 laangz wat ne teu paez keui truz
 cu rae plaез Hnhz nahz kaang an naeh

² tuhз teu laangz wat. Hnhz daz keuh nahz,
 “Pehz awlz boh an keu ni nam anz haz?
 Ohz daz mawn pehz nahz, reu aangz keu
 ni nam baetz hawkz kaai hawkz leui, talz
 ya thengz hacz aamz.”

An peur teuk boh an ihz pae suamz

(Markus 13:3-13, Lukas 21:7-19)

³ Meuz Hnhz keu dez kaai rang Olip ne teu
 paez keui pan truz cu Hnhz. Keuh daz Hnhz
 nahz, “Lao ehз luz, an keu diz ngaz penz
 meu naeh, meuz Tahz ehз truz mial rae
 kam pha ngaz lawng ne maang an laak
 laaiz naehz?”

⁴ Yesuhz mial daz, “Seu tih yak aez ihz
⁵kaoz bawnz pehz. Kawp daz ihz keui ngaz
 truz kaai mus Ohz, daz daehz naeh Khriѕ
⁶rae kaoz suamz ihz heungz baaiz. Pehz
 ngaz ngarz reu oiz tiukz siukz ti thatz boh
 ti yaan, keuiz daz pehz yak ngaat. Kawp
 daz an keu diz ne bawnz naeh boh, keuiz
⁷daz maat phraeoz ti dutz. Ihz seu kheuz
 boh seu kheuz, seu prih boh seu prih kaw
 ngaz teur tiukz. Ngaz naeh an coh nguat
⁸boh reu yung keui ngaz kruhz klawhz ti. An
 keu ni naeh seun teungz tukz khahz peur
 teuk.

⁹ Ihz ngaz aapz pehz pae suamz pehz boh
 piamz pehz. Kheuz ihz hacz aamz keui
¹⁰ngaz ceuh pehz kawp Ohz. Meuz ceun diz
 ihz tang heungz keui ngaz pleung reung
 dengz yum daehz rae ngaz teur saz kokz,
¹¹ngaz teur ceuh. Samz thaengz ihz taangz
 phraz plawmz an heungz keui kaw paw
¹²truz rae ngaz kaoz ihz heungz baaiz. An
 meukz keui ngaz heungz truz, an rak yaw
¹³keui ngaz lany lan. Keuiz daz ihz yum
 klakz taw dutz ne ngaz bawnz reung dengz

¹⁴ khyawt. Reu oiz rak prih Phraz Pen Caoh kaw aez penz saak se kaai ihz hacz aamz ne ngaz rawz sirz tuhز prih keu tehز ne caang kai naeh an dutz.”

Phez mawh longz

(Markus 13:14-23, Lukas 21:20-24)

¹⁵ “Pehz ngaz awlz an peuk ceuh ceng boh ti seu ngamz, ceun ihz taangz phraz Daniel rawz mok. Aez ihz rawz lik keui loz
¹⁶ phawmz. Meuz ceun diz, aez ihz naeh tuhز prih Yio keui aez tiunz rawz kaai rang.
¹⁷ Aez ihz an naeh lang yaal keui yak aez kut
¹⁸ leh phrihز phrahز tuhز kaang. Ihz naeh tawiz sraakz maar keui yak aez weng leh
¹⁹ kreung kap daehz. Kaai seu ngihz keu diz kreuk baaiz ta keun nyah keun meur boh
²⁰ keun nyah maang kuanz buhz! Pehz suz tawngz aez kraao an pehz tiunz ne yak aez maen kaai kiarz katz boh seu ngihz sinz.
²¹ Kawp daz ngaz naeh phez mawh longz awh, kaanz prih keu tehز tae taw seu ni ne nam ti maang phez mawh longz ceun diz, waaiz an diz kaw ngaz nam naeh thaengz
²² leui. Beuk nam cih aez kraao an diz patz kaw nam maang ihz lawt. Kawp daz ta ihz ras keui nahz rae cih aez kraao an diz patz.
²³ Meuz ceun diz beuk ihz daz pehz nahz, ‘Yawt, Khris naeh a niz, naeh a tui,’ daz
²⁴ kaw yak yum. Kawp daz Khris plawmz boh ihz taangz phraz plawmz keui ngaz plaез an laak laaiz an mawh boh rak seum sangz ne beuk caang kaw aez daehz kaoz bawnz
²⁵ tang ihz an peun ras keui. Teuk ngarz raez, Ohz lao teuk aacz pehz nahz.
²⁶ Beuk ihz daz, ‘Yawt, Khris naeh tuhз ruk,’ daz kaw yak lan. ‘Yawt, Khris naeh tuhз

²⁷ lukz,’ daz kaw yak yum. Kawp daz meuz Kuanz Kingz Ihz ngaz truz ne naeh ceun laak lawk thaangz thaz reu lae taw thaz reu keutz.

²⁸ Toz yam naeh a naez kaw klaangz ta waet a diz.”

Lawng Kuanz Kingz Ihz truz

(Markus 13:24-27, Lukas 21:25-28)

²⁹ “Meuz seu ngihz peur teuk a wa hacz ne seu ngihz ngaz bimz, kiarz kaw ngaz nam aez an thaangz. Seuk muny lang plengz keui ngaz kur, taanz khoz lang plengz keui
³⁰ ngaz keusz. Meuz phangz an diz an laak laaiz Kuanz Kingz Ihz ne ngaz naeh lang plengz. Meuz ihz tuhз prih keu tehз keui awlz Kuanz Kingz Ihz tumz truz peu eumz, tawiz taanz khoz boh bunz mawh ne keuh
³¹ ngaz yaam lengz lengz. Kuanz Kingz Ihz kaw ngaz cao teu maan kaang raaoz Daehz putz piz usz usz, aez ihz an peun ras keui teur cuhz daehz seu dukz prih taw seu dukz prih.”

Pung taek teungz laangz wah

(Markus 13:28-31, Lukas 21:29-33)

³² “Yawt teungz laangz wah ne sawnz leh lah, meuz kaakz hnhz lae, lahz hnhz run ne pehz mas boh a wa thatz kiarz kawcz.
³³ Naeh ceun khuz an diz meuz pehz awlz an keu ni hacz aamz ne pehz lo mas Kuanz
³⁴ Kingz Ihz a wa thatz rim keur wah. Ohz daz mawn pehz nahz, co kheuz ihz seu ni maat dutz ne ngaz naeh an keu ni hacz aamz. Kaang raaoz boh keu tehз ngaz bilz, keuz daz mony reu ma Ohz nam bilz.”

Yaeh nam mas kraao boh seu ngihz an diz

(Markus 13:32-37, Lukas
17:26-30, Lukas 17:34-36)

³⁶ “Yaeh nam mas seu ngihz an diz boh kraao an ngaz naeh ceun diz. Teu maan kaang raaoz keui kaw nam mas, Kuanz kaw nam mas. Naeh taw Paz pan mas a.
³⁷ Meuz Kuanz Kingz Ihz truz ne naeh ceun
³⁸ co Noah. Kawp daz taw seu ngihz omz maat lumz ne ihz keui teur aacz daehz suamz suamz tiangz tiangz, leh tahz leh yah, thonz taw seu ngihz Noah kut tuhz
³⁹ ceun luang longz. Thonz taw seu ngihz omz lumz thengz keuh ne keuh nam mas ngaz naeh ceun nae. Meuz Kuanz Kingz Ihz truz
⁴⁰ kaw ngaz naeh ceun diz. Ihz keu aarz an naeh tuhz maar ne ngaz leh hawkz kiutz
⁴¹ hawkz. Keun nyah keu aarz leui ngohz kaw
⁴² leh hawkz kiutz hawkz. Kawp ceun diz rae seu tih pao raez, kawp daz pehz nam mas
⁴³ Tahz daehz ngaz truz peuk naeh. Keuiz daz pehz mas leh an ni, beuk tahz kaang mas kraao peun rah truz rah ne pao yak aez peun rah ya kut bawnz tuhz kaang
⁴⁴ daehz. Pehz peun tan mok raez, kawp daz Kuanz Kingz Ihz ngaz truz meuz pehz nam thaang.”

Kuanz leng an maang saetz ca boh an meukz

(Lukas 12:41-48)

⁴⁵ “Kuanz leng an maang saet ca boh maang pinya ne naeh yaeh? Hnhz an diz naeh kuanz leng an tahz daehz khaanz mok, meuz kraao maen ne hnhz mawz phraez aez kuanz leng keu diz nahz seum suamz.
⁴⁶ Meuz tahz paz leng truz awlz kuanz leng

⁴⁷ cih ceun diz ne bawnz an rak. Ohz daz mawn pehz nahz, tahz hnhz aapz aez hnhz nahz aez naeh ta khriungz phrihz
⁴⁸ phrahz daehz hacz aamz. Keuiz daz kuanz leng an meukz samz daz tuhz phawmz
⁴⁹ daehz, ‘Tahz ohz yeung hinz truz.’ Hnhz tiz kuanz leng daehz teur deuiz, suamz
⁵⁰ kawmz tiangz kawmz boh ihz cawc, tahz hnhz ngaz weng truz seu ngihz an hnhz
⁵¹ nam thaang ne, ngaz mak hnhz penz patz, aez hnhz nahz taam teur kawmz ihz seuk cih daehz naeh ihz rak, a diz bawnz yaam teur kak raangz.”

Pung taek trawsz teuk rac seu kawlz

25 “Prih kaang raaoz ne ngaz naeh ceun ni. Maang trawsz teuk rac seu kawlz, tawnz tang ngal ngawiz peun kleoz daehz rae lae saanyz tahz seu naaoz.
² Tuhz keuh ne khanz naeh ihz kleuhz klahz,
³ khanz naeh ihz maang pinya. An kleuhz klahz khanz keui khaenz ngal ngawiz keuiz daz nam khaenz teur dawngz nam man
⁴ tawiz daehz. An maang pinya keui samz khaenz ngal ngawiz boh teur dawngz an
⁵ maang nam man. Meuz tahz seu naaoz hinz phraez ne keuh seum ceuk rae yaetz reuk ngeut hacz aamz.
⁶ Meuz khinz sawmz ne maang reus hawkz daz, ‘Yawt, tahz seu naaoz a wa phraez,
⁷ lae saanyz hnhz lah! Trawsz hacz aamz kaw rawi wiak teun kaz ngal ngawiz daehz.
⁸ Trawsz an kleuhz klahz keu diz daz an maang pinya keui nahz, ‘Aez ehz nahz nam man pehz teur nyaenz luz, ngal ngawiz ehz
⁹ ngaz ngat.’ Keuiz daz trawsz an maang pinya keui mial daz, ‘Nam aez, beuk cih ceun diz nam kumz ta ehz boh ta pehz leui.

Khahz yal tawiz ti ihz saz nam man tui ta
¹⁰pehz nahz lah.' Meuz keuh yeung khahz
 yal ne tahz seu naaoz phraeoz truz, tang
 trawsz an peun tan keui kut tuhز pawiz
 kopz ku teur tawiz daehz rae dapz thengz
 keur wah.

¹¹ Trawsz an kleuhz klahz keu diz kaw
 phraeoz truz maanyz lawk keur wah daz,
 'Tahz, tahz, lawk ehz nahz keur wah luz!'

¹² Keuiz daz tahz seu naaoz mial daz, 'Ohz
 daz mawn pehz nahz, ohz nam mas pehz.'"

¹³ Yesuhz kaw daz, "Kawp ceun diz rae seu
 tih pao raez. Kawp daz pehz nam mas
 kraao seu ngihz an diz."

Pung taek kuanz leng keu waiz

(Lukas 19:11-27)

¹⁴ "Samz thaengz prih kaang raaaz ngaz
 naeh ceun ni. Maang ihz hawkz ngaz
 lae reung dengz rae raak kuanz leng
 daehz aapz aez keuh nahz phrihz phrahz
¹⁵daehz. Aapz aez keuh nahz tawiz reung
 dengz kyahz keuh, aez hawkz nahz khamz
 hanz cawi, hawkz nahz seu komz, thaengz
 hawkz nahz seu cawi rae hnhz lae reung
¹⁶dengz. Kuanz leng an bawnz hanz cawi ne
 lan ka luat daehz eunz rae myaat thaengz
¹⁷hanz cawi. Naeh ceun diz kuanz leng an
 bawnz seu komz kaw ka rae myaat thaengz
¹⁸seu komz. Keuiz daz kuanz leng an bawnz
 seu cawi ne kawngz lu rae unz mok khamz
 tahz daehz tuhز keu tehز.

¹⁹ Meuz a wa ceu nawhz baaiz ne tahz keuh
²⁰weng truz nap craangz keuh. Meuz ceun
 diz kuanz leng an bawnz kham hanz cawi
 ne truz aez tahz daehz nahz rae daz,
 'Tahz, mih aapz aez ohz nahz hanz cawi,

²¹ohz myaat thaengz hanz cawi.' Tahz hnhz
 mial daz, 'Kyahz, kuanz leng an rak boh an

maang saet ca aez, mih a wa cih tawz boh
 kaai an kyehz. Ohz ngaz aez mih khriungz
 kaai an heungz. Seuz tawiz tahz daehz

²²raez.' Kuanz leng an bawnz seu komz kaw
 truz aez tahz daehz nahz rae daz, 'Tahz,
 mih aez ohz nahz seu komz, ohz myaat

²³thaengz seu komz.' Tahz hnhz mial daz,
 'Kyahz, kuanz leng an rak boh an maang

saet ca aez, mih a wa cih tawz boh kaai
 an kyehz. Ohz ngaz aez mih khriungz kaai
 an heungz. Seuz tawiz tahz daehz raez.'

²⁴Kuanz leng an bawnz seu cawi kaw truz
 cu tahz daehz nahz rae daz, 'Tahz, ohz
 mas mih naeh ihz cih kreuk, woc leh ti

daehz nam plihz, rawmz leh ti daehz nam
²⁵peuk seumz. Kawp ceun diz ohz doz rae
 lan unz mok khamz mih tuhز keu tehز.

²⁶An ni naeh paekz mih.' Tahz hnhz kaw
 daz kuanz leng an diz nahz, 'Kuanz leng
 meukz rae raang laac aez, mih mas boh

ohz woc leh an daehz nam plihz, rawmz
²⁷leh an daehz nam peuk seumz haz? Kawp
 ceun diz mih taan leh khamz ohz plawiz

yangz. Beuk cih ceun diz meuz ohz phraeoz
²⁸ne bawnz tang toz tang yangz. Leh khamz
 seu cawi kaai hnhz rae aez an maang seu

²⁹kawlz cawi nahz. Kawp daz kaai ihz maang
 ne ngaz aez thaengz, kaai ihz nam maang
³⁰samz truatz leh tang an hnhz maang. Wah

thengz kuanz leng nam taap lan an bimz
 thaz nawk raez. A diz hnhz bawnz yaam
 boh teur kak raangz."

Soz boh paehz

³¹ "Meuz Kuanz Kingz Ihz truz pa tang bunz
 Daehz boh tawiz teu maan kaang raaaz
 Daehz ne Hnhz ngaz keu dez kaai plaang

³²maang bunz. Kheuz ihz hacz aamz keui
 ngaz teur cuhz aacz ngaai Hnhz. Hnhz

ngaz teur phraez keuh ceun ihz damz soz
³³ teur phraez soz boh paehz. Hnhz ngaz
 mok soz keui aez naeh thaz takz kaaiz
 daehz, paehz keui aez naeh thaz takz dahz
³⁴ daehz. Meuz diz Khunz ngaz lao ihz an
 naeh thaz takz kaaiz Daehz keui nahz,
 ‘Pehz an bawnz an rak Paz Ohz keui aez,
 truz caam a moi prih an raenz mok pehz
 nahz thaz meuz prih keu tehz tae ne raez.
³⁵ Kawp daz meuz Ohz coh seum suamz ne
 pehz aez Ohz nahz seum suamz, meuz
 Ohz coh omz kaw pehz aez Ohz nahz omz
 tiangz. Meuz Ohz penz ihz seuk laek kaw
³⁶ pehz damz Ohz. Meuz Ohz nam maang
 kreung kaw pehz aez Ohz nahz kreung kap.
 Meuz Ohz penz kaw pehz lum la Ohz. Meuz
 Ohz klaez thang kaw pehz truz yawt Ohz.’
³⁷ Meuz daz ceun diz ne ihz keu sangz keui
 ngaz maanyz Khunz daz, ‘Tahz, ehz awlz
 Mih coh rae ehz damz Mih nahz meu naeh?
 Ehz awlz Tahz ehz coh omz rae ehz aez
³⁸ omz tiangz meu naeh? Ehz awlz Tahz ehz
 penz ihz seuk laek rae ehz damz meu naeh?
 Nam maang kreung rae aez kreung meu
³⁹ naeh? Ehz awlz Mih penz rae ehz lum la
 meu naeh? Ehz awlz Mih klaez thang rae
⁴⁰ ehz lan yawt meu naeh?’ Khunz kaw mial
 daz, ‘Ohz daz mawn pehz nahz, an pehz cih
 kaai kuanz mai an kyehz lak ihz ne a wa cih
 kaai Ohz.’
⁴¹ Samz lao ihz an naeh thaz takz dahz keui
 nahz, ‘Ihz an talz kin keui aez, praasz Ohz
 rae lan cu tuhز ngal raai cen cen an raenz
 mok aez Manaat boh phiz hnhz keui nahz.
⁴² Kawp daz meuz Ohz coh ne pehz nam aez
 Ohz nahz seum suamz, meuz Ohz coh omz
 kaw pehz nam aez Ohz nahz omz tiangz.
⁴³ Meuz Ohz penz ihz seuk laek kaw pehz nam
 damz Ohz, meuz Ohz nam maang kreung
 kaw pehz nam aez Ohz nahz kreung kap.

Meuz Ohz penz, meuz Ohz naeh tuhز thang
⁴⁴ kaw pehz nam truz yawt Ohz.’ Meuz ceun
 diz keuh ngaz maanyz Hnhz, ‘Tahz, ehz
 awlz Mih ehz coh seum suamz seum tiangz,
 awlz Mih penz ihz seuk laek, awlz Mih nam
 maang kreung, awlz Mih penz, awlz Mih
 klaez thang rae ehz nam truz yawt Mih
⁴⁵ meu naeh?’ Hnhz mial daz, ‘Ohz daz mawn
 pehz nahz, an pehz nam cih kaai an kyehz
⁴⁶ lak ihz keu ni ne nam cih kaai Ohz.’ Keuh
 kaw bawnz lan ti talz taam cen cen, keuz
 daz ihz keu sangz keui samz bawnz lan ti
 imz cen cen.”

Ihz kyaam piamz Yesuhz

(Markus 14:1-2, Lukas
 22:1-2, Yohn 11:45-53)

26 Meuz Yesuhz a wa daz an keu
 diz ne lao teu paez Daehz keui
² nahz, “Pehz mas boh pawiz lawt phez ne
 lo thaengz taw aarz seu ngihz pan. Kuanz
 Kingz Ihz ne ngaz talz ihz aapz Daehz,
 tawkz piamz kaai lakz klawngz klaengz”
³ Meuz phangz an diz beunz caangz keui,
 ihz mawh tuhز ihz keui teur cuhz daehz
 tuhز hawz Kaiaphas an naeh ceu beunz.
⁴ Keuh teur lao daehz aez rah mat Yesuhz
⁵ rae piamz Hnhz. Keuh daz, “Yak maat cih
 kaai seu ngihz pawiz, doz ihz ronyz.”

Nam man hawm thawkz sapz kingz Yesuhz a pruh Bethani

(Markus 14:3-11, Yohn 12:1-8)

⁶ Meuz Yesuhz naeh pruh Bethani a kaang
⁷ keuh Simon ihz tut ne, maang keun nyah
 hawkz truz cu Hnhz, keun nyah an diz
 leh nam man hawm langz mawh seu teur
 dawngz reu aangz keun ra rae thawkz sapz

⁸ kingz Hnhz meuz Hnhz yeung suamz. Meuz teu paez Hnhz keui awlz an diz ne sunz ca rae daz, “Cih naehz cih aez thengz maat ⁹a?” Saz nam man hawm an langz mawh an diz rae aez ihz phaanz keui nahz luz.

¹⁰ Keuiz daz Yesuhz mas lawng an ni rae daz, “Cih naehz lah pehz ya phawmz ceum keun nyah an ni a? Hnhz a wa cih rak ¹¹kaai Ohz. Kawp daz ihz phaanz keui naeh kawmz pehz se se, Ohz samz nam naeh ¹²kawmz pehz se se. An keun nyah an ni thawkz nam man hawm kaai toz Ohz ne naeh an raenz mok ngaz saangz keo Ohz. ¹³Ohz daz mawn pehz nahz, meuz khahz krai reu oiz rak tuhز prih keu tehز klawhz ti ne ngaz bawnz krai tang reung cih keun nyah an ni aez naeh ta seum tang a hnhz.”

¹⁴ Meuz phangz an diz Yudas Iskariot an naeh tuhز teu paez seu kawlz aarz ne ¹⁵lan cu beunz caangz keui rae daz, “Beuk ohz aapz Yesuhz a pehz ne pehz ngaz aez ohz nahz seu naeh?” Keuh dawgz aez ¹⁶hnhz nahz paekz ron waiz kawlz. Tae leh seu ngihz an diz Yudas khahz kraao aapz Yesuhz.

**Yesuhz suamz kawmz teu paez
Daehz kaaiz pawiz lawt phez**

*(Markus 14:12-21, Lukas 22:7-13,
22:21-23, Yohn 13:21-30)*

¹⁷ Meuz kaai seu ngihz seun teungz pawiz kaaiz mun nam maang ceu ne teu paez keui truz cu Yesuhz maanyz daz, “Sunz aez ehز raenz Mih nahz ti suamz kaaiz pawiz lawt phez a naez?”

¹⁸ Yesuhz mial daz, “Pehz lan cu ihz hawkz tuhز weng rae daz hnhz nahz, ‘Tahz sra ehz daz, kraao Ohz a wa thatz, Ohz ngaz

suamz kaaiz pawiz lawt phez tang teu paez Ohz a kaang pehz.”

¹⁹ Teu paez keui kaw cih tawiz ceun Yesuhz lao rae raenz pawiz lawt phez a diz.

²⁰ Meuz teuk borz ne Yesuhz keu dez suamz kawmz teu paez Daehz seu kawlz aarz a ²¹pheunz. Meuz keuh yeung suamz boh ne Yesuhz daz, “Ohz daz mawn pehz nahz, Tuhz pehz ne maang hawkz ngaz saz kokz Ohz.”

²² Keuh teur aacz daehz phawmz kyehez baaiz rae teur aacz daehz maanyz Hnhz daz, “Tahz, naeh ohz haz?”

²³ Yesuhz mial daz, “Ihz an nyuh kawmz

²⁴ Ohz tuhز sroz ne ngaz saz kokz Ohz. Kuanz Kingz Ihz ne ngaz bawnz lan ceun taemz mok lawng Hnhz tuhز kyaamz lik. Keuiz daz ihz an saz kokz Kuanz Kingz Ihz ne bawnz an nam rak. Ihz an diz khanz nam keut baaiz rak.”

²⁵ Yudas an ngaz saz kokz Hnhz kaw maanyz, “Tahz, naeh ohz haz?” Yesuhz kaw daz hnhz nahz, “Naeh ceun mih daz ne.”

Pawiz Caoh

*(Markus 14:22-26, Lukas
22:14-20, 1 Korin 11:23-25)*

²⁶ Meuz keuh yeung suamz boh ne Yesuhz leh kaaiz mun, taang kez cuz Phraz rae pekz aez teu paez Daehz keui nahz, Hnhz daz, “Teur aacz daehz leh suamz raez, kaaiz mun an ni naeh toz Ohz.”

²⁷ Hnhz kaw leh thaengz tang klakz, taang kez cuz Phraz rae aez keuh nahz, Hnhz daz, “Teur aacz daehz tiangz an ni raez.

²⁸ Kawp daz an ni naeh naamz Ohz, an cih peuk klakz traz an prawm teun mehз Phraz

Pen Caoh, an lae ta plawiz lawt reung²⁹ dengz kawi ihz heungz keui nahz. Ohz lao pehz, co Ohz maat tiangz kawmz pehz omz seu pit teun meh tuhz Prih Paz Ohz tui, Ohz nam tiangz thaengz omz plaehz seu pit leui.”

³⁰ Keuh kaw ngawk lae lan cu rang Olip.

**Yesuhz lao teuk aacz
Petros tiunz thengz Daehz**
(Markus 14:27-31, Lukas
22:31-34, Yohn 13:36-38)

³¹ Meuz diz Yesuhz daz keuh nahz, “Borz meu ni pehz hacz aamz ngaz tiunz thengz Ohz ceun taemz mok tuhz kyaamz lik daz, ‘Ohz ngaz tiz piamz ihz damz soz rae³² wungz soz keui ngaz baak beuz.’ Keuiz daz waaiz Ohz meu rae imz tui Ohz ngaz lan aacz pehz prih Kalile.”

³³ Petros mial daz, “Sangz daz keuh tiunz thengz hacz aamz kaw ohz nam tiunz thengz Mih laz laz.”

³⁴ Yesuhz daz Petros nahz, “Ohz daz mawn mih nahz, borz meu ni co yaerz maat keu dawrz ne mih ngaz daz daehz nam mas Ohz waiz laehz.”

³⁵ Petros mial daz, “Sangz daz ohz bawnz yam kawmz Mih kaw ohz nam daz daehz nam mas Mih.” Teu paez keui hacz aamz kaw teur aacz daehz daz ceun diz.

**Yesuhz suz tawngz tuhz
sraakz Ketsemane**

(Markus 14:32-42, Lukas 22:39-46)

³⁶ Meuz Yesuhz boh teu paez keui lan phraeoz a sraakz Ketsemane ne Hnhz daz teu paez Daehz nahz, “Meuz Ohz lan suz tawngz a tui ne keu dez ngawm a niz raez.”

³⁷ Hnhz raak Petros boh kuanz Sebede keu aarz tawiz Daehz. Hnhz phawmz kyezh

³⁸ rae kinz phawmz. Hnhz daz keuh nahz, “Phawmz Ohz peur teuk baaiz paw raenz yam. Keu dez a niz rae pao yawt ohz raez.”

³⁹ Hnhz lan thaz ngaai teur nyaenz rae suz tawngz daz, “Oz Paz, beuk caang kaw kraai klakz peur teuk an ni thaz Ohz, keuiz daz yak aez naeh ceun Ohz sunz, aez naeh ceun Mih sunz.”

⁴⁰ Hnhz kaw mial truz cu teu paez Daehz keu waiz ne awlz keuh yaetz reuk ngeut rae daz Petros nahz, “Taw seu na ri kaw⁴¹ pehz nam ngawm bawnz Ohz haz? Yak aez pehz klaez tuhz reung dengz kyaam ya ne suz tawngz rae pao yawt raez. Khuanz phawmz ne sunz cih boh kaw toz ne caang onz onz.”

⁴² Hnhz mial lan thaengz seu laehz rae suz tawngz daz, “Oz Paz, beuk caang kaw yak aez Ohz bawnz tiangz klakz an ni, aez peun thengz Ohz lah, keuiz daz yak aez naeh ceun Ohz sunz, aez naeh ceun Mih sunz.”

⁴³ Hnhz mial truz thaengz kaw awlz teu paez keui yaetz reuk ngeut boh, kawp daz keuh nam pae plaakz ngaai daehz.

⁴⁴ Kaai waiz laehz ne Hnhz lan suz tawngz thaengz ceun Daehz suz tawngz laehz

⁴⁵ aacz ne leun. Hnhz kaw mial truz cu teu paez Daehz rae daz keuh nahz, “Pehz yeung yaetz preumz boh haz? Yawt, kraao

⁴⁶ Kuanz Kingz Ihz talz aapz tuh z tihz ihz raai ne a wa phraeoz. Rawi lah, eh z lan leuk lah! Ihz saz kokz Ohz a wa phraeoz.”

Ihz cawpz Yesuhz

(Markus 14:43-50, Lukas 22:47-53, Yohn 18:3-12)

⁴⁷ Meuz Hnhz yeung daz boh ne Yudas an naeh tuh z seu kawlz aarz kaw phraeoz truz tawiz wungz ihz an beunz caangz boh

⁴⁸ ihz mawh cao truz ne khaenz tang waac tang kaw n. Ihz an saz kokz Hnhz lao mok keuh nahz ti peun tang daz, “Ihz an ohz kuny ne naeh Hnhz keuz, mat Hnhz lah.”

⁴⁹ Hnhz truz cu luat Yesuhz rae daz, “Heuz Tahz.” Daz kaw kuny Hnhz. Yesuhz mial daz, “Raen, rip cih an mih lo truz cih raez.”

⁵⁰ Meuz ceun diz ihz keui truz cu Yesuhz rae mat leh. Meuz diz luat ihz hawkz an naeh kawmz Yesuhz ne truat z waac daehz, mak

⁵¹ peur cao ceu beunz, keu tiakz hnhz seu plaakz paw teutz. Yesuhz daz hnhz nahz, “Leh waac sapz mok tuh z kaang daehz

⁵² raez, kawp daz ihz tawnz waac ne yam kawp waac leun. Seu ni mih thaang Ohz nam maanyz bawnz a Paz Daehz, aez Hnhz

⁵³ plawiz truz luat tap mawh teu maan kaang raaoz seu kawlz aarz tap leuz haz? Beuk naeh ceun diz an taemz mok ceun tuh z

kyaamz lik daz ngaz bawnz naeh ceun ni ne ngaz cih seu naez keunyz?”

⁵⁵ Meuz phangz an diz Yesuhz daz wung ihz keui nahz, “Pehz khaenz waac, khaenz kaw n truz mat Ohz ceun conz haz? Ohz keu dez sawnz aez a wat klawh z seu ngihz ne

⁵⁶ pehz nam mat Ohz. Keuz daz an ni ngaz bawnz naeh hacz, aez keunyz kyaamz ihz taangz phraz keui.” Teu paez Hnhz keui kaw tiunz thengz Hnhz hacz aamz.

Yesuhz phraeoz a rumz

(Markus 14:53-65, Lukas 22:54-55,63-71, Yohn 18:13-14,19-24)

⁵⁷ Ihz mat Yesuhz keui leh lan cu Kaiaphas an naeh ceu beunz. Ihz mawz kyaamz boh ihz mawh keui a wa teur cuh z boh a diz.

⁵⁸ Petros kaw lan tawiz Hnhz nam that z nam yaan, taw phraeoz tuh z teu laangz hawz ceu beunz. Hnhz kut tuh z teun leukz, keu dez kawmz siukz an pao rae ngawm yawt

⁵⁹ ngaz naeh ceun nae. Beunz caangz boh ihz tuh z rumz hacz aamz keui khahz ihz khaam saak se an pleung rae aez caang piamz

⁶⁰ Yesuhz. Sangz daz ihz tang heungz keui khaam saak se an pleung kaw keuh nam awlz ti pleung. Maang ihz keu aarz truz

⁶¹ thaz puatz ne daz, “Hnhz an ni daz, ‘Daehz ngaz ya thengz wat Phraz Pen Caoh rae cih mial tuh z waiz seu ngihz.’”

⁶² Ceu beunz ceng maanyz Yesuhz daz, “Mih nam tawpz naehz leui haz? Ihz keu ni upz khatz Mih nahz naehz?”

⁶³ Keuz daz Yesuhz moh pras pras. Ceu beunz kaw daz Hnhz nahz, “Ohz teung kaa o kaai Phraz Pen Caoh an phawmz imz ne daz, anz Mih anz Khri s, Kuanz Phraz Pen Caoh hoh?”

⁶⁴ Yesuhz mial daz, “Naeh ceun mih daz ne. Ohz lao pehz nahz waaiz an ni pehz ngaz awlz Kuanz Kingz Ihz keu dez plaakz takz kaaiz Tahz taanz khoz mawh rae tumz truz peu eumz.”

⁶⁵ Ceu beunz kaw siarz thengz cung cui daehz rae daz, “Hnhz a wa upz pleung Phraz Pen Caoh! Ehz lo thaengz saak se

⁶⁶ naehz leui? Pehz thaang ceun nae?”

Keuh tawpz daz, “Hnhz a wa trohz yam.”

⁶⁷ Meuz phangz an diz keuh teuk chuz sapz omz nyaangz tawz ngaai Hnhz, leh keu neumz tihz phak Hnhz. Teur ka kaw paapz

⁶⁸ Hnhz rae daz Hnhz nahz, “Tak yawt luz Khriis, yaeh tiz Mih?”

Petros thiangz thengz Yesuhz

(Markus 14:66-72, Lukas 22:56-62, Yohn 18:15-18,25-27)

⁶⁹ Meuz Petros keu dez thaz nawk ihz tuh teun leukz ceu beunz ne maang keun nyah kyehz an naeh peur cao ceu beunz hawkz truz daz hnhz nahz, “Mih kaw naeh kawmz Yesuhz an naeh ihz prih Kalile.”

⁷⁰ Keuiz daz Petros thiangz thengz aacz ngaai keuh hacz aamz daz, “Ohz nam mas

⁷¹ mih daz naehz?” Meuz hnhz lan cu keur wah sraakz ne maang keun nyah thaengz hawkz awlz hnhz rae daz ihz an naeh a diz keui nahz, “Hnhz an ni naeh kawmz Yesuhz ihz weng Nasaret.”

⁷² Petros teung kaa rae thiangz thengz thaengz daz, “Ohz nam mas ihz an diz!”

⁷³ Moh thaengz seu co, ihz an ceng boh a diz ne truz cu thatz Petros rae daz, “Mih kaw naeh mawn cumz keuh, kawp daz teuk ngarz mih upz kaw mas boh.”

⁷⁴ Petros kaw teung kaa rae daz, “Ohz nam mas ihz an diz.”

Waaiz an diz yaerz kaw keu dawrz luat.

⁷⁵ Petros kaw tang mony reu ma Yesuhz lao mok daz, “Co yaerz maat keu dawrz ne mih ngaz daz daehz nam mas Ohz waiz laehz.” Petros kaw lae yaam lengz lengz thaz nawk.

Leh Yesuhz lan cu Khunz Pilat

(Markus 15:1, Lukas 23:1-2, Yohn 18:28-32)

27 Meuz teuk ngup cao cao ne beunz caangz boh ihz mawh keui teur lao ² aez daehz caangz piamz Yesuhz. Keuh mat Yesuhz lan aapz a Pilat, an naeh khunz Rom, an upz peungz prih Yio.

Yudas seuk ruat daehz yam

(Teu Maan Caoh 1:18-19)

³ Meuz Yudas an saz kokz Yesuhz ne ngarz Yesuhz talz taam yam kaw caanz daehz cih pleung, hnhz leh paekz ron waiz kawlz, lan aez mial tawz beunz caangz boh ihz mawh.

⁴ Hnhz daz, “Ohz a wa cih pleung kawp ohz saz kokz aez ihz piamz ihz nam maang reung dengz kawi naehz.” Keuh mial daz, “Nam anz thaz ehz, an diz naeh thaz mih eu.”

⁵ Meuz ceun diz Yudas wiurz teuk klaez paekz tuh wat kaw lae lan. Hnhz kaw lan aarz diz rae seuk ruat daehz yam.

⁶ Beunz caangz keui leh paekz an diz rae daz, “Paekz an ni naeh langz naamz, sapz tuh teuk paekz lu tuh wat ne nam tawiz

⁷ traz ehz.” Keuh kaw teur lao daehz yal

ti sraakz ihz mawz cih klohz, aez naeh ti⁸ peun lu ihz tang kheuz keui nahz. Kawp ceun diz ihz keui raak sraakz an diz naeh Keu Tehz Naamz taw phraeoz seu ngihz meu ni.

⁹ An ni aez keunyz mony reu ma ihz taangz phraz Yeremiah daz, “Keuh leh paekz ron waiz kawlz, an kheuz Israel keui phyaat¹⁰ langz Hnhz ne yal sraakz ihz mawz cih klohz, ceun Phraz Cen Cen lao mok ohz.”

Khunz Pilat caetz Yesuhz

(Markus 15:2-5, Lukas 23:3-5, Yohn 18:33-38)

¹¹ Meuz Yesuhz ceng boh aacz ngaai khunz Pilat ne khunz maanyz Hnhz,

“Mih naeh Khunz Yio haz?” Yesuhz mial¹² daz, “Naeh ceun mih daz ne.” Meuz beunz caangz boh ihz mawh keui maap Hnhz ne Hnhz nam tawpz naehz.

¹³ Khunz Pilat kaw maanyz Hnhz, “Mih nam ngarz ihz keu ni maap upz khatz Mih hiuz?”

¹⁴ Keuz daz Yesuhz nam thaw hawkz hawkz. Khunz kaw sangz mawn baaiz.

Yesuhz talz taam yam

(Markus 15:6-15, Lukas 23:13-25, Yohn 18:39, 19:16)

¹⁵ Tuhz pawiz lawt phez an diz khunz tomz plawiz aez ihz klaez khawk hawkz ceun¹⁶ ihz maanyz. Meuz phangz an diz maang ihz klaez khawk an reu oiz lae hawkz,¹⁷ mus hnhz daz Barapbas. Kawp ceun diz meuz wungz ihz keui teur cuhz daehz ne Khunz Pilat maanyz keuh daz, “Sunz aez

ohz plawiz pehz nahz ihz an nae? Barapbas haz, nam anz kaw Yesuhz an raak Khris¹⁸ haz?” Kawp daz hnhz mas keuh seuk ke rae keuh aapz Yesuhz.

¹⁹ Meuz Khunz Pilat keu dez kaai plaang tatz traz ne, yah hnhz cao ihz truz lao hnhz daz, “Yak cih naehz kaai ihz nam maang reung dengz kawi. Kawp daz seum wawh ohz awlz Hnhz tuhaz yaetz reu muh rae kinz phawmz baaiz.”

²⁰ Keuz daz beunz caangz boh ihz mawh keui sawz sawz wungz ihz maanyz aez khunz plawiz Barapbas rae aez piamz²¹ Yesuhz. Khunz kaw maanyz thaengz, “Kaar keu ni sunz aez ohz plawiz pehz nahz an nae?”

Keuh tawpz daz, “Barapbas.”

²² Khunz Pilat kaw maanyz, “Ohz ngaz cih seu naez kaai Yesuhz an raak Khris ne hoh?” Keuh hacz aamz daz, “Tawgz piamz Hnhz kaai lakz klawngz klaengz raez!”

²³ Khunz Pilat kaw maanyz thaengz, “Kawp naehz? Hnhz cih pleung naehz?”

Keuz daz keuh baaiz raak usz daz, “Tawgz piamz Hnhz kaai lakz klawngz klaengz raez!”

²⁴ Meuz Khunz Pilat mas daehz nam lao bawnz, naeh ti rawhz ronyz peun wany rae leh omz khez tihz daehz aacz ngaai keuh, hnhz daz, “Ihz an ni yam ne nam anz thaz ohz, naeh thaz pehz eu.”

²⁵ Ihz hacz aamz kaw tawpz daz, “Reung dengz kawi an piamz Hnhz ne aez naeh kaai ehz boh kaai kuanz ehz.”

²⁶ Hnhz kaw plawiz aez keuh nahz Barapbas. Samz cao ihz rotz Yesuhz rae aez ihz tawgz piamz kaai lakz klawngz klaengz.

Siukz cih peuk pyaak Yesuhz

(Markus 15:16-20, Yohn 19:2-3)

²⁷ Meuz ceun diz siukz khunz keui raak Yesuhz kut tuhz teu laangz hawz rae siukz ²⁸tang tap keui truz wit wit Yesuhz. Keuh pucz kreung Hnhz, aez kap cung cui rong ²⁹eurz. Keuh leh seur keutz taanyz cih paanz kumz rae supz sapz kingz Hnhz. Aez Hnhz tawnz kawn teor law thaz takz kaaiz, keuh seuk deumz aacz ngaai Hnhz rae cih peuk pyaak Hnhz daz, “Heuiz, Khunz Yio ne aez ³⁰naeh an rak se kamz.” Keuh teuk chuz sapz Hnhz nahz omz nyaangz rae leh kawn teor ³¹law tiz kingz Hnhz. Waaiz keuh a wa cih peuk pyaak ne keuh pucz cung cui, kap aez mial kreung Hnhz rae leh Hnhz ngaz lan tawkz piamz kaai lakz klawngz klaengz.

Ihz tawkz Yesuhz kaai lakz klawngz klaengz

(Markus 15:21-32, Lukas 23:26-43, Yohn 19:17-27)

³² Meuz keuh lae lan ne keuh awlz ihz weng Siren hawkz, mus hnhz daz Simon, keuh peun pae aez hnhz baekz lakz klawngz ³³klaengz Yesuhz. Meuz keuh phraeoz ti ³⁴Kolkotha, an loz daz ti klakz kingz ne, keuh aez Hnhz nahz omz seu pit an seuk rah mok an cangz. Hnhz cim yawt keuz daz nam tiangz. ³⁵ Keuh leh Hnhz tawkz kaai lakz klawngz klaengz rae pohz ceu kaw leh kreung ³⁶Hnhz. Keuh kaw keu dez pao yawt Hnhz

³⁷ a diz. Leh lik an maap taemz mok daz, “Yesuhz, naeh Khunz Yio,” ne tawkz lang ³⁸kol kingz Hnhz. Maang conz keu aarz tawkz mok kaai lakz klawngz klaengz ihz teor lakz kawmz Hnhz, takz kaaiz Hnhz seu lakz, takz dahz Hnhz lakz.

³⁹ Ihz datz lan keui krasz kingz daehz, ⁴⁰ saehz Hnhz daz, “Ihz an ya thengz wat rae moh waiz seu ngihz cih mial ne aez, beuk Mih naeh mawn Kuanz Phraz Pen Caoh kaw khyawt toz daehz rae cur thaz lakz klawngz klaengz raez.”

⁴¹ Beunz caangz, ihz mawz kyaamz boh ihz mawh keui kaw cih peuk pyaak tang daehz ⁴²ceun diz. Keuh saehz daz, “Hnhz khyawt bawnz ihz, keuz daz Hnhz nam khyawt bawnz toz daehz! Beuk Hnhz naeh Khunz Israel kaw aez cur thaz lakz klawngz klaengz seu ni luat, ehz kaw ngaz yum ⁴³Hnhz. Hnhz a wa yum Phraz Pen Caoh, beuk Phraz Pen Caoh sunz khyawt kaw aez khyawt leh Hnhz. Kawp Hnhz a wa daz, ‘Ohz naeh Kuanz Phraz Pen Caoh.’”

⁴⁴ Conz an tawkz mok kaai lakz klawngz klaengz kaar diz kaw saehz Hnhz ceun diz laai.

Yesuhz yam

(Markus 15:33-41, Lukas 23:44-49, Yohn 19:28-30)

⁴⁵ Kraao seu ngihz keun cang taw waiz na ri teuk borz ne an bimz reupz lan ⁴⁶tang prih. Kraao teuk borz waiz na ri ne Yesuhz raak reus usz usz daz, “Eli, Eli,

lama sabacthani?” An loz daz, “Phraz Ohz, Phraz Ohz, kawp naehz Mih caang daz plawiz thengz Ohz a?”

⁴⁷ Meuz ihz teur ka an ceng boh a diz keui ngarz an diz ne daz, “Hnhz raak Eliyas.”

⁴⁸ Tuhz keuh ne maang hawkz rip lan leh seuk pawhz nyuh sapz tuhز omz seu pit praang, mok a cawgz kawp teur law rae leh aez Hnhz, aez Hnhz nyuak.

⁴⁹ Ihz teur ka samz daz, “Teungz mah raez, ehz pao yawt anz Eliyas ngaz truz khyawt Hnhz.” Yesuhz raak reus usz usz thaengz rae plotz phawmz Daehz.

⁵¹ Meuz phangz an diz pahz kangz tuhز wat plaakz waak lae aarz plaakz thaz kol taw thaz wa. Reu yung kruhz rae reu aangz

⁵² mawh keui haakz. Peun lu keui seuk lawk rae toz yam ihz seu ngamz keui meu rae

⁵³ imz. Waaiz Yesuhz meu rae imz ne keuh lae truz thaz peun lu rae kut tuhز weng seu ngamz, plaehz ihz keui nahz toz daehz.

⁵⁴ Meuz ihz mawh siukz an upz seu peur ya boh siukz an pao Yesuhz keui, awlz reu yung kruhz boh awlz an naeh keu diz ne doz baaiz. Keuh daz, “Hnhz an ni naeh

⁵⁵ mawn Kuanz Phraz Pen Caoh eu.” Keun nyah an heungz a diz keui moh teun yaan yawt. Keun nyah keu diz truz tawiz Yesuhz thaz prih Kalile, an tawiz cih damz Hnhz.

⁵⁶ Tuhz keuh ne pa Mari Makdalen, Mari mah keuh Yakop boh Yosep, boh yah Sebede.

Yosep saangz keo Yesuhz

(Markus 15:42-47, Lukas 23:50-56, Yohn 19:38-42)

⁵⁷ Meuz teuk borz ne maang ihz maang hawkz phraeoz truz, mus hnhz daz Yosep, ihz weng Arimathea, teu paez Yesuhz kaw

⁵⁸ anz. Hnhz lan cu khunz Pilat maanyz toz yam Yesuhz. Khunz Pilat kaw lao aez hnhz

⁵⁹ leh toz yam. Yosep leh toz yam, leh banz

⁶⁰ aamz an rak ne wian toz Hnhz, mok tuhز peun lu tham reu aangz teun mehz, an daehz kawngz mok. Hnhz kling reu aangz mawh hawkz bitz tuhز peun lu kaw lae lan.

⁶¹ Mari Makdalen boh Mari thaengz hawkz keu dez waaiz ngaai cu peun lu.

Siukz an pao tawz peun lu

⁶² Ceun kap siz, kaai seu ngihz sinz ne beunz caangz boh Pharise keui lan cu khunz Pilat,

⁶³ keuh daz, “Ehz tang mony reu ma ihz kaoz an diz meuz Hnhz yeung naeh ne daz, ‘Moh waiz seu ngihz Ohz ngaz meu rae imz boh,’

⁶⁴ da. Kawp ceun diz lao aez pao peun lu thonz taw waiz seu ngihz. Doz teu paez Hnhz keui truz rah leh toz yam Hnhz mok yaan yaan rae daz ihz nahz, ‘Hnhz a wa meu rae imz thaz reung dengz yam.’ Kawp ceun diz an kaoz thaz puatz ne ngaz na lak laehz aacz boh.”

⁶⁵ Khunz Pilat mial daz, “Pehz maang boh siukz pao seu cumz, seu pehz penz bawnz ne lan pao peun lu raez.”

⁶⁶ Keuh kaw lan pao peun lu, maaiz mok tang reu aangz aez daehz mas ihz kling nam kling rae aez siukz keui pao.

Yesuhz meu rae imz

(Markus 16:1-10, Lukas 24:1-12, Yohn 20:1-10)

28 Waaiz seu ngihz sinz kaai seu ngihz seu teungz, meuz prih reum hongz thaangz ne Mari Makdalen boh Mari thaengz hawkz lan yawt peun lu.

² Meuz phangz an diz reu yung kruhz krang baaiz, kawp daz teu maan kaang raaoz Phraz Cen Cen cur truz thaz kaang raaoz ne kling thengz reu aangz bitz rae keu dez
³ kaai an diz. Raang hnhz aasz naeh ceun laak lawk, kreung hnhz kaw keun ra ceun
⁴ seur taapz. Siukz pao keui doz hnhz baaiz rae teur ceus thanz paw teur wil toz.
⁵ Teu maan kaang raaoz daz keun nyah kaar diz nahz, “Yak doz, ohz mas boh paarz khahz Yesuhz an talz tawgz piamz
⁶ kaai lakz klawngz klaengz. Hnhz nam naeh a niz leui, a wa meu rae imz ceun Hnhz lao mok. Truz yawt ti seuk yaetz Hnhz raez.
⁷ Pehz rip lan lao teu paez Hnhz keui nahz, ‘Hnhz a wa meu rae imz thaz reung dengz yam, lan aacz pehz prih Kalile. Pehz ngaz awlz Hnhz a diz.’ Tang tang ohz truz lao paarz.”
⁸ Keun nyah kaar diz kaw rip lae thaz peun lu tang doz tang seuz phawmz rae wang lan lao teu paez Hnhz keui nahz.
⁹ Meuz diz luat Yesuhz saanyz tak kaar nahz, “Aez moh rak.” Keun nyah keu diz lan cu Hnhz wam cawng rae waiz Hnhz.
¹⁰ Yesuhz kaw daz kaar nahz, “Yak doz. Lan lao kuanz mai Ohz keui, aez keuh lan prih Kalile, keuh ngaz awlz Ohz a diz.”

Mony reu ma siukz an pao

¹¹ Meuz keun nyah keui naeh kaai reung dengz ne siukz an pao peun lu teur ka keui kut tuh z weng rae lao plaiez beunz caangz

¹² keui nahz lawng an naeh hacz aamz. Meuz beunz caangz boh ihz mawh keui a wa teur lao daehz kaw keuh aez siukz keui
¹³ nahz paekz heungz baaiz. Keuh daz siukz nahz, “Pehz lo lao daz, ‘Meuz teuk bimz eh z yaetz reuk ngeut ne teu paez Hnhz
¹⁴ keui truz rah toz yam Hnhz lan.’ Beuk khunz ngarz reu oiz an ni kaw eh z ngaz khyawz hnhz nam aez pehz maang ti kawcz phawmz.”
¹⁵ Siukz keui kaw leh paekz rae cih tawiz ceun keuh seumz mok daehz. Mony reu ma an siukz lao kaw sirz peur lah kheuz Yio taw seu ngihz meu ni.

Mony seumz

(Markus 16:14-18, Lukas 24:36-49, Yohn 20:19-23, Teu Maan Caoh 1:6-8)

¹⁶ Teu paez seu kawlz disz kaw lan cu kaai
¹⁷ rang prih Kalile, an Yesuhz lao mok. Meuz keuh awlz Hnhz ne waiz Hnhz. Keuz daz
¹⁸ teur ka nam paw yum. Yesuhz kaw truz cu keuh rae daz keuh nahz, “A na hacz aamz an naeh lang kaang raaoz boh tuh z prih
¹⁹ keu teh z keui a wa aez Ohz nahz. Kawp ceun diz pehz lan rae cih aez kheuz ih z hacz aamz penz teu paez Ohz, aez teuk sruz keuh nahz kaai mus Paz, Kuanz boh
²⁰ Khuanz Seu Ngamz, sawnz aez keuh teuk ngarz an Ohz lao pehz. Tang tang raez, Ohz kaw naeh kawmz pehz se se thonz taw kam pha lawng.”